

# *Enkinosata*

## *Ororei le Nkai*

*Enotoki Rorei linono, nanya nanu ninche,  
neaku Irorei linono te nanu  
eng'ida o enchipai oltau lai;  
amu te nkarna ino aaipotoki nanu,  
OLAITORIANI, Enkai oo lororani.  
~ Yerehia 15:16*



**Community Christian Church ~ Christian Missionary Fellowship**

# ***Enkinosata Ororei Le Nkai***

## ***Enkibung'ata Bibilia Sinyati***

**Eninko Tenining Ororei le Nkai te Bibilia  
Nimbung Enkipirta enye:**

**Inkiteng'emat Tomon**

*Enotoki Rorei linono, nanya nanu ninche, neaku Irorei linono  
te nanu eng'ida o enchipai oltau lai; amu te nkarna ino  
aaiopotoki nanu, OLAITORIANI, Enkai oo lororani.*

~ Yerehia 15:16

**Ilaigerok-Ilaipurrok:**

Joshua (Lemayian) ole Barron, Ruth (Kiramatisho) enole Barron,  
James Olormuyei ole Kijape, Jim Saruni ole Kipees,  
Kijuku ole Kisimei, Jackson ole Meing'ati, Cosmas Lemein,  
Paul K. Lupempe, Samuel ole Mugur, Jonathan ole Narasha,  
John M. Neiliang, James Ole Sakat, Patrick ole Sayiaiel,  
James T. Sinkua, Jacob ole Sinkwa, John Tarimo Sosio,  
Ng'oto Tiwai, tenebo Francis K. Yenke

**Community Christian Church**



**ERISHATA NAIGEROKI O “COPYRIGHT” 2008**

Ore Copyright naa enena Enkanisa naji  
“Community Christian Church”  
PO Box 61006-00200  
Nairobi, KENYA

Eitobira (“printed by”) ena ampuni:  
Word Alive Publishers  
PO Box 4547-00100  
Nairobi, KENYA

**Iutunot oo Matuan:****enkardasi**

Embae e dukuya: Enashe ..... 3

Iutarot oo Laiteng'etak ..... 4

Eninko teniasishore kuna kiteng'emat

**Inkiteng'emat: Enkinosata o Rorei le Nkai**

(Eninko Tinining Irorei le Nkai Tiatua Biblia, Nimbang Enautu.)

Enkiteng'ena e Dukuya ..... 22

Elimunoto: Enkibung'ata Ororei le Nkai

Enkiteng'ena Iare ..... 32

Elimunoto: Amaa, ena kiteng'enare kene pooki ng'ae?

Enkiteng'ena e Uni ..... 48

Elimunoto: Kainyoo Bibilia?

Enkiteng'ena e Ong'uan ..... 61

Enkinosata Ororei le Nkai: Enkinining'oto aashu

Enkisumata

Enkiteng'ena e Miet ..... 73

Enkinosata Ororei le Nkai: Enkibung'ata Bibilia Aitobiraki

Eimu Eretoto e Nkiyang'et Sinyati

Enkiteng'ena e Ile ..... 86

Enkinosata Ororei le Nkai: Enkibirribirrata O Rorei le Nkai

Enkiteng'ena e Naapishana ..... 112

Enkinosata Ororei le Nkai: Enkibung'ata Ororei le Nkai

tiatua Indamunot Inonok

Enkiteng'ena e Isiet ..... 130

Enkinosata Ororei le Nkai: Enjurroto Ororei le Nkai

Enkiteng'ena e Naaudo ..... 142

Enkinosata Ororei le Nkai: Easata Irorei le Nkai

Enkiteng'ena e Tomon ..... 156  
Enkibung'ata Ororei le Nkai: Enkidipata o Enkomono

**Kulie Retot**

Inkipankat Naapaasha Nisumie Bibilia Nalulung'a ..... 167

Kulie Kererin Naaibung to Ltau ..... 175

## Enashe o Shakenisho

Ore etareto ilairukok kumok aagerr kuna kiteng'emat tomon. Kake etareto iyiook Enkai alang ilkulikae pookin. Kitomoono tenkaraki kuna kiteng'emat erishata naado, tenebo ilairukok kumok ootii ena kop Kenya, ata sii ilairukok kumok ootii Amerika. Neaku, ore teneretisho kuna kiteng'emat, neing'uaa nena retoto Enkai ang natii shumata.

Ore inkatitin kumok, eitu kiyiolo inkatinin aashu inkinyaanyukot naaret inkanisani oo Lmaasai. Ore oshi, kitonyuaa oleng te nkomono naaibung enkiteng'emare nayieunoyu. Ore oshiake, neyieunoyu nikianyu Enkai too mbaa pookin. Ore pee kisarisar aapuo dukuya, nimikitum enkiteng'ema sidai. Kake ore pee kianyu Enkai, neisiligayu oleng Olaitoriani oret iyiook pooki rishata. Neaku, neishoo iyiook Enkai pooki toki sidai tiatua kuna kiteng'emat.

Kincho Enkai enashe sapuk oleng tenkaraki kuna kiteng'emat.

Kijo ashe tenkaraki iltung'ana kumok:

Kijuku ole Kisimei, Simon Muya Olokkumum,  
Jonathan Olokkumum, Ng'oto Tiwai,  
Naomi Ntiwal enole Mpoya,  
o pooki aigeroni-olajurroni lena buku,  
too lchoreta lang tiatua Olaitoriani ootoomono  
tenkaraki ena siaai,  
tenebo ilkulikae airukok kumok.

Kiomon inchere ekindim aatareto iyie kuna kiteng'emat.

tenkaraki enkarna e Yesu,

~ iyiook, Lemayian tenebo Kirametisho

(Joshua ole Barron tenebo Ruth enole Barron)

~ 3 ~

**Iutarot Olaiteng'enani:**  
**Eninko teniasishore kuna kiteng'emat**

**Tang'asa isuma ena rubata eton eitu ingil aimaa inkiteng'emat!**

***Ilefeso*** 4:7, 11-16

*“Kake eishooki ake oltung'ani pooki te iyiook, empiris te risioroto enkishorunoto e Kristo. ... Ore nena kishorunot enyena naa ketejo pee eaku kulikae ilkipaareta, neaku kulikae iloibonok le Nkai, neaku kulikae ilalikiorok, neaku kulikae ilairritak o laiteng'emat, peyie erreteni lelo sinyat, te nkaraki ina siaai e ramatare, ene nchetata o sesen le Kristo, o metabaiki pooki naboisho naimu enkirukoto o eyiolounoto e ilo Inoti le Nkai, nikiaku iltung'ana ootubulutua aamitunye, aabaiki entemet e mbotoro nalulung'a e Kristo; pee mikintoki aaku nkera, naanang'ari idie o idie to lkatati ake pooki le nkiteng'emare, o losek loo ltung'ana ti atua esunkureisho o losekin le lejare. Ore enatii, emairoro esipata ti atua enyorrata, nikibulu too nkoitoy pooki aabulaki atua ilo ora elukunya ang; aabulaki atua Kristo, olaa ti atua ninye eruba osesen pooki, neidikidikokino atua ninye pooki rubata naishoro, easisho nena rubat pooki aaitobiraki, neitubulu osesen neitubulu kewan ti atua enyorrata.”*

Ore enkipirta kuna kiteng'emat naa pee eiteng'en ilairukok eneiko tenenining neisum Biblia te nkoitoy naret ninche metubulu. Aikiyiolo ajo ore metii endaa nemebulu iseseni lang aitobiraki. Tena oshi oitoy eitupukoo ate ntomonok oo Lmaasai enuta ejo pee eiu nkera kutiti. Kake ore eyia te shoruetisho ang to Laitoriani lang, meretisho katukul tenikintupukoo ate te nkoitoy e Nkai mataa kutiti. Eliko iyiook Paulo pee kibulu aabaiki entemet e mbotoro e Kristo. Ore tiatua Ilmaasai naa embae sidai tenepirr oltung'ani, amu kejo ninche olmonekie le karsisisho. Ore



ilairukok pooki naa karsisi te karsisisho Enkai, naa ore Orerei le Nkai naa ninye endaa naishoo iyook Enkai mainosa. Etiu anaa olokeri oleng. Eishaa naa ore ilairukok pooki nenyu Orerei, kake mme tenkaraki pee kipiru iyiook ake. Eiyieunoyu nikiraposho anaa inkishu te nkata olari, pee kitum kule kumok niking'arie ilairukok ootii.

Ore kuna Kiteng'emat netisiraki pee etum atareto lelo aiteng'emat ootii nkanisani egira aiteng'emat ilairukok. Mme ilkiliku lelikioroto ootisiraki pee eibeleyen lelo lemeyiolo Kristo, kake ilkiliku oitubulunyeke lelo oidipa ataa ilairukok tedukuya. Ore kuna kiteng'emat neme nkera e Sunday Sukul etisirakaki. Etisirakaki ilbarnot ootubulutua o Itung'ana kituaak, neaku kenare neiteng'emeki ilbarnot o Itung'ana kituaak oidipa ataa ilairukok.

Ore tiatua nkanisani oo Lmaasai nikindipa aataparana eseremare enye, ore erubata sapuk oo nkiteng'emat enye naa Inelumapili ake tedekenya. Kake tenetii nkanisa naata erishata e nkisuma oo nkera e Sunday Sukul o lbarnot arashu kulikae turrurri ootumo te mpolos e wiki naa keishiakino oleng te ninche. Keidimi sii ataashore kuna kiteng'emat te semina oo lairukok. Ore teina semina naa keidimi sii aatoor anaa rishat neiteng'enishoreki.

Ore pooki kiteng'emat neeta rubat kumok. Ore pooki rubata naa keeta tipat naa aikiret intobira enkiteng'emat nemeata tenena rubat enemeata esiai enye. Ore pooki kiteng'emat nepaashare enkae. Kake enyaanyuk rubat enye. Ore anaa anaata oltung'ani pooki nkejek are, o nkaik are, elekunya nabo. Ore hoo nepaasha kake keasisho te nkoitoy nanyaayukie enkae.

### **Erretenata:**

Ore erreten to laiteng'emani naa entoki e tipat pooki. Ore pee etum enkiteng'emat atisidana, naa pee erreten kewan olaiteng'emani te nkomono o nkisumata oo Sirat nelo aing'or

abaraki ina nagira arreten. Ore pooki tung'ani olo eng'orore naa keng'as aing'or enkawuo ombaa tenaa keisidain negoli sii. Eng'as adol tenaa kepi lmbaa naata. Neijia sii ninye etiu olaiteng'enani lo Rorei le Nkai te rreten naishaa neeta. Ore erreten e tipat naishiaa oleng naa pee eng'as oltung'ani ajurr kewan. Ejo Biblia, *"entang'as entayu esuama natii enkong'u ino eton etu intayu enchata te nkong'u e likae tung'ani."* Ore kirreten aiteng'en inkiteng'emat, nikiomon ina omono natoomono Daudi te **Olkerempe le Nkai** 139:23-24, nejo *"Tojurroki nanu, iyie Enkai, niyiolou oltau lai! Ineneng'aki nanu niyiolou ndamunot aainei! Nidol tenaa ketii enkoitoi torrono atua nanu, nikirikoo nanu te nkoitoi ntarasi!"*

Amaa, kejo ena pee mikinteng'enisho tenikigira aarare ing'ok o ntemat? Mme neijia pae. Tadamu enatejo Isaya, "Oi oltolut oji nanu! Ataruoyei amu ebore enkutuk ai ing'ok, naboitare lelo tung'ana torrok inkutukie enye too ng'ok. Etoduaa inkonyek aainei Olaiguanani, Olaitoriani loo njoreitin." Neitisiny olmalaika ninye nejo, "Ing'ura! kitoshoroiyie ena kukuo inchorito enkutuk ino. Eiwuang'ieki entorroni ino; nikitapalakaki ing'ok." (Ing'ura **Isaya** 6:1-7.) Kinteng'enisho neme tenkaraki esupatisho ang maate, kake tenkaraki esupatisho e Kristo. Ore lelo lemeishiaa neiteng'enisho naa lelo lemegira aarare intemat o ng'ok, nchere ninche eshipikino ninche.

Ore pee kiret iyie, naa kesipa teniata enkpankata esujaroto te pooki wiki:

Ewiki Nirretenare						
Juma Pili	Juma Tatu	Juma Ine	Juma Tanu	Alamisi	Ijumaa	Juma Mosi
Inchoo ilaisumak elukunya o lkilikuai o lelo aiguranak te nkiteng'ena enkae wiki.	Isuma isirat le nkiteng'ena enkae wiki. Toomono.	Isuma nena masaa pooki enkiteng'ena. Toomono. Imbirrabira. Inger enkigerore.	Ingila isuma ina kiteng'ena o nena masaa niasishore. Toomono. Imbirrabira. Inger enkigerore.	Ingila isuma nena masaa. Toomono. Imbirrabira. Inger enkigerore.	Intamoo kewan eninko tenisum. Toomono.	Nieng'teng'a.
Ewiki Ning'orie Esiaai Nindipa Ataasa						
Juma Pili	Juma Tatu	Juma Ine	Juma Tanu	Alamisi	Ijumaa	Juma Mosi
Toomono. INTENG'ENA ENKITENG'ENA.	Interu ing'ura nijurr enkiteng'ena wiki natulusoyie. Emparan.	Emparan. Ewalata enjurroto Inkilikuanat o Laiteng'anani.	Emparan. Isuma nena kulie Naaimakini. Inger enkigerore.	Emparan.	Emparan.	Nieng'teng'a.

Tayiololo: tenaa ilo aiteng'enisho kuna kisumaritin too wiki naa ilo arretena enaa pooki wiki tenkisuma nabo nintoki aata enkae wiki nijurr enkisuma natulusoyie. Te nkitanyaanyukoto, igira alo aiteng'enisho enkisuma eare teina wiki nigira alo ashukokino aing'or enkisuma e dukuya.

Tayiololo: tenigira aiteng'enisho kuna kiteng'emat te semina, naa pee irreten inkiteng'emat eton eitu eiteru semina. Eshiaa nirreten eng'or olapa obo dukuya.

**Inkipirtaat e Nkiteng'ena:** Ore kuna naa naanare neyiolou ilairukok te nkiting'oto e nkiteng'ena. Naa pee eiyolou ena too nadamunot ake, kake ata too nkiasin. Neme pee edamuni ake anaa enadamu oloiteng'eni te sukuul iwalat, kake eishaa neimakini tenebo enkata e nkiteng'ena pee etum ataa ina rubata o lairukoni, naa ore teina naa kelo olairukoni eeta eng'amurai nanyaal. Amaa, keidim olaiteng'enani atiaki iloiteng'ena ena eishaa ninteng'enana neirreiwaa ang meshomo aas? Mme neijia pae, lasima pee kinteng'enisho anaa Yesu, nikitui sii anaa olchekut orikoo intare enyena mme anaa oltung'ani oreu inkishu enyena. Eiteng'enishe Yesu erikoki iltung'ana enetii esipata eliki ninche inkatinin. Ore egira iltung'ana aanya nkaatinin, neiteng'ena nerikori metuguto negutu tiatua ina sipata naiteng'ena too nkatinin.

**Enkisumata e Biblia:** Ore kulo naa isirat oishiaa neisum olaiteng'enani egira arreten pee eiteng'enisho ena kiteng'ena. Ore hoo nikitoomonutuo eng'eno e Nkai kingerito kuna kiteng'emat, naa ore enkipirta e kuna kiteng'emat naa pee eitagol iltung'ana meinosa Orerei le Nkai. Ore anaa enapi esong'ouna o nkiri esumash, neme inoo nkiri oshi nikinya aiput inkoishuaa. Eishaa neisum olaiteng'enani ina matua anaa enaas oshi enkiteng tenenyaal endaa enye; kenyaal ake neitoki ainyaku ing'amura aigil neigil. Eishaa neisum olaiteng'enani kulo Sirat eton eng'or ewiki nabo. Ore te nkitanyaanyukoto, tenaa Juma Pili egira olaiteng'enani aisumisho kuna kiteng'emat, neishaa neiteru aisum ina Juma Pili arashu Juma Tatu eng'or enkae, neomonu Enkiyang'et Sinyati metareto meibung'a nena. Neiteru anyaal ninche, neisum irishat kumok nelo adamu ninche ata egira airrita inkishu enyena, arashu erripito olduka ashu eas esiaai enye. Neaku lelo Sirat erubata nabo enye, pee etum aitotio ilairukok te Juma Pili nalotu.

**Inkitayunot e kewan o Laiteng'enani:** Ore ena pukunoto o mbaa naadamu olaiteng'enani naa nabo o Nkoitoi nairorie

oltung'ana le Nkai. Ore teina oitoi nelo olaigeroni adol empashata naata Ororei le Nkai olomon le nkop namanita ninche. Anaa enatisira ajo, keisho meshomo irorei le nkop neisho ninche Enkai, neya Ororei le Nkai. Neitayu kewan tialo Ororei le Nkai. Ore ena naa empukunoto o lning'o arashu enkigeroto naata enyorrata. Etejo **Olkerempe** 42:1-2, "*ore anaa enayieue enkoilii enkare naruko, neijia etiu oltau lai, kiyieue iyie, Enkai. Eeta oltau lai enkure tenkaraki Enkai, Enkai naishu. Kanu kenya alotu aing'or enkomom e Nkai?*" Nejo ilkererin 5 o 11, "*kainyoo pee itapalari iyie, lo tau lai, naa kainyoo pee itanyamala iyie tiatua nanu? Isiliga Enkai, amu kaitoki ake aisis ninye, ninye eretoto ai naa Enkai ai.*" Ore ena damunoto naa empukunoto eanyunoto enkitayunoto e kewan tialo Enkai, naa ore ilo aigeroni neisho ilkulikae metoning'o irorei lenye Enkai pee etumi aateshet sii ninche.

Kitipika ena kipirta pooki kiteng'ena tenkaraki ena kipirta. Ore enedukuya, naa aikiyieue neilepunyeki tiatua Kristo iyiook ilairukok tenebo. Anaa enatoomono Yesu abuaak tenkurare e Lasaro "pee ereti lelo oitashe" teine niaku eishaa nikiruk sii iyiook to ltoilo tedukuya Enkai tenkaraki lelo oiteng'enita nena kiteng'emat. Kisuma Isirat te pooki nikiterretenie enkiteng'ena nikisuma to ltoilo pee etumi aatamayian iyiook tenebo olaiteng'enani. Kira pooki ilaalashera o nkanashera to Laitoriani, mme ntoiwuo o nkera. Anaa enang'arie olalashere olikae indamunot o nkiguanat, neaku king'arita kuna ang olaiteng'enani. Ore eniare, naa kiyieue nikincho olaiteng'enani nkitanyaanyukot enikinko te nikinya Isirat. Keiyieuni naa ore inkiteng'emat naa pee eitagol neiteng'en ilairukok metayiolo ainosa Isirat, naa ore enkoitoi sidain naiteng'enieki naa tenikias.

Ore enkoitoi nadamishore olaiteng'enani naa keret elo anya Isirat. Mme Isirat. Keaku ore eneing'or olaiteng'enani makewan naa Isirat maate. Neaku, ore hoo nelo olaiteng'enani aisum Isirat eton eng'or ewiki naiteng'enishore enkiteng'ena, mmelo



olaiteng'enani adamu ena kiteng'ena eton eitu eisum Isirat. Amu keisho ena, Enkiyang'et erishata meirorie olaiteng'enani eimu Isirat eton eng'or indamunot oo lkulikae.

**Enkomono:** Eiteng'en iyiook Biblia nchere mme ake keyieu Enkai neirorie iyiook, kake pee kirorie sii iyiook ninye. Eiteng'en iyiook Biblia nchere keeta enkomono tipat neasisho sii oleng. Kitoomono kigira aing'oru eng'eno nikigelunye kuna kiteng'emat. Kitang'asa aomonu enjurrunoto erikoroto e Nkai kigira aarreten kuna kiteng'emat. Kitoomono Enkai meishoo iyiook ilaretok, anaa ilaibeleyenak le nkutuk, ilautarok, tenebo ilajurrok neisho sii ninche Enkai eng'eno o kulie kishoorot nikiyieu pee etum aataret iyiook. Kitoomonokito sii ninche ilaiteng'enak, nikiomonoki ilooiteng'eni. Kitoomono sii Enkiyang'et e Nkai metaasishore kuna kiteng'emat pee eret intae o nkaisani oo Lmaasai tenebo nena anisani naaretito iyiook pee etum pooki aatubulu te nkirukoto o enikinko tenikirorie Enkai eimu kuna kiteng'emat. Ejo Bibilia ore enetonging'ore aare aashu okuni te mbae naje te nkarna e Yesu naa kewaliki Enkai. Neaku ore te pooki kiteng'ena nikitoponikitia enkomono ang, paa ore intae ilaiteng'enak nitumokiki atoomon tenebo iyiook. Metaa Enkiyang'et e Nkai tenebo iyiook kinteng'ena nikibulu tenebo te nkirukoto, neisisi Enkai eimu iyiook.

**Enkigerore too naaigeri:** Ore ena rubata naa enolaiteng'enani pee eigerisho edamisho neomon tenkaraki Isirat erretenita kewan pee eiteng'enisho. Ore ena naa erubata olaiteng'enani pee eirorie Enkai anaa ina naas terishata nagira adumu Enkai. Naa tene ejoki Enkai meiwuang'ie intubulo natii inkonyek enyena pee etum aterretenayu aiteng'enisho netum aisho kewan Enkai aigil nedol anaikununo inkiasin enyena neibeleyenya oltau lenye tenkaraki enaisuma Isirat. Ore ena rubata naa enatumie olaiteng'enani enkiyeng'iyeng te dukuya Enkai. Nejo ***Enaidurra*** 33:14, "newaliki Olaitoriani, 'kalo enitii tenebo iyie, naa kaisho nanu enkiyeng'iyeng'." Nejo ***1 Yohana*** 3:18-20, "Nkera aainei

kutiti eminyorrisho too rorei ake aashu too lng'ejepa kake te asata ote sipata. Ena kiyiolounyie ajo kira iyiook ile sipata, nikintadedeyie iltauja lang tedukuya ninye enoshi kata naiguanare iyiook iltuaja lang. Amu kitok Enkai alang iltauja neiyiolo pooki toki." Naa kiaku kitabaikitia enkipirta ang tenaa aikigira aing'oru nikiyeng'iyeng'a meitotio iyiook neaku Isirat kinya nikiyeng'eyeng'a te Nkai pee kiaku iloidim aatabaiki enkipirta ang kinteng'enisho Ororei le Nkai.

### **Enkiteng'ena:**

Ore Enkiteng'ena naa nabo omasaa naasishore olaiteng'enani aiteng'enie kanisa. Ore erreten etiu anaa endaa naidimie olaiteng'enani meteretenayu pee eiteng'en kanisa. Ore anaa enanya enkiteng nkujit pee etum kule tenkaraki olashe lenye o ltung'ana, neijia etiu enkiteng'ena amu ninye endaa naisho olaiteng'enani kanisa. Eishaa neng'as olaiteng'enani aisum ena kiteng'ena irishat naapaasha eton eitu eiteng'enisho pee eng'as amoku. Neitamoo sii aiteng'enisho to ltoilo makewan eton eitu eiteng'en kanisa. Tadamu mpaashat natii tenining oloisumita ematua e Biblia olalikioroni ogira alikioo olkilikuai. Ore irishat kumok teneisum oltung'ani, naa kebaraki neing'ash. EtIU anaa meiyiolo ororei ogira aisuma, neitoki ake aigil. EtIU anaa oloikuma kiti, kake ore ake pee eidip aisuma neiteru airo ina naisuma easishore irorei lenyena naa keeta enkitieunoto nelikioo eeta enkima oleng. Netiu anaa olowuaru otoduaa eng'ues nelu aibung. Etisiraki ena kiteng'ena pee eiteng'enishoe anaa enoshi ake nalikioo olalikioroni, mme keisumi, naa ina pee eishaa netamoo olaiteng'enani ena kiteng'ena eton eitu eisumisho ina. Ore kuna kiteng'emat neigeroki pee elimu enkipirta e kulikae rorei; neaku keishaa to laiteng'enani pee eiteng'en ena kipirta easishore irorei lenyena makewan. Meishaa netum olkob te lelo rorei likingero.

**Elimunoto:** Ore pooki kiteng'ena neiteru te limonoto. Eeta ake tipat ena enoshi ninteru airoroki oltung'ani ninteruru aanya ilomon eton eitu iroro kulie baa o ninye, keeta tipat pee eng'as olaiteng'enani alimu enkiteng'ena aitobiraki. Eidimayu naa ore ilimunoto naa enkatini arashu enkiguran arashu kulie limunot naaret ninche meibung'a olkilikuai leina kiteng'ena.

**Inkatinin o Intepen o Inkitanyaanyukot:** Eetai mpukunot ong'uan oo nkatinin naa ninche kiasishore aiteng'enishore enkipirta e nkiteng'ena. Ore kuna naa intepen e Biblia o inkatinin e Biblia (Inkitanyaanyukot) tenebo nena kulie tepen neme ine Biblia o kulie atinin neme ine Biblia (Inkitanyaanyukot). Keishaa olaiteng'enani neiyolou neibung enkipirta e kuna atinin pee etum aiteng'enisho aitobiraki. Meetai oltung'ani oidim aiteng'enisho ina nemeyiolo. Neaku mme nabo kata ake eisum olaiteng'enani ina atini, kake eisum aigil ometaba anaa neiyiolou neibung sii. Ore nkatinin naa keishaa nelikiori te nkoitoi naibala, mme ake aisuma. Tadamu enataasa inoo kokoo oloo nkakuiyaa kinosaki nkatinin ira enkerai, neaku ilikioo sii iyie kuna atinin. Anaa oltung'ani, ariya oyiolo anosai nkatinin. Mincho oltoilo lino metaa irerei ake ejo, kake nchoo sii elikioo empukunoto eina ateni. Te nkitanyaanyukoto, tenaa kegira oltung'ani alimu enkatini olayioni oimina te mbuku e **Luka** 15 naa keaku ore oltoilo lenye neme olenkanyit egira alimu irerei leilo barnoti oti, otejo "Papa, nchooki nanu erubata ai ele shamba metaa enaai." Ore etulusoite nkolong'I, neitoki ajoki Papa lenye, "Papa, ataasa eng'oki tekeperr o tedukuya iyie; meekure eishaa paaji oinoti ino," ore ebaiki ine neisha meibeakenya oltoilo lenye metotiu ana ololtungan'I oiridua neitadoiyie kewan nenoto ninye enkanyit.

**Enkisumata oo Sirat:** Ore telimunoto enkatini keibeakenya irerei telimunoto o telimunoto. Kake ore te nkisumata oo Sirat nemeibeakenya irerei, kake keret iyiook Enkiyang'et Sinyati

matayiolu enkipirta Oroi le Nkai te nguton. Ore Enkisumata oo Sirat naa entoki e tipat oleng. Kitipika Enkisumata oo Sirat atua enkiteng'ena pee kitum aisuma eton eitu kintengen'isho enkipirta eilo Sirata. Kake ore tenena anisani naata erishata Enkisumata oo Sirat naa ketum erishata siai naimarie aitobiraki. Ore too nkanisani kumok naa ore olaisumuni loo Sirat naa kegeluni meisuma te nkata esaremare anaa too nkanisani oo Lmaasai amu kegelu oshi olaitasheikinoni le seremare. Ore te kulie naa olaiteng'enani aashu olairritani ninye oya ina kiteng'ena.

Ore esiaai Enkisumata oo Sirat to ltoilo sapuk naa keata tipat oleng. Teneme olaiteng'enanai oisum Isirat naa pee eliki oloisum terishata naado pee eyiolou neretena ajo kalo Sirata eisum. Amu keisho ina oloisum erishata meimai ina matua katitin kumok. Nemoku, neyiolou te nguton. Amu meisum olaisumani aitobiraki teneitu emoku ina matua. Kenare neitamoo olaisumani aisuma ina matua to ltoilo sapuk tiang eton eitu elotu aisum te kanisa. Keret ena olaisumani meisuma ematua teleleki metii olnaash, aashu enkipidipid irorei egira aisum te kanisa. Anaa te nkunoto e nkatini, ore olaisumani naa pee eisum to ltoilo sapuk pee ening'I empukunoto o eyieunoto.

**Enkiguran:** Ore nkiteng'emat naa indim atipika enkiguran atua. Eatae nkiguraritin mpukunoto are. Ore enedukuya neata irorei oigero abaraki telelo otii ina kiguran, olelo oiguran too rishat netayioloto aitobiraki irorei otii atua enkiguran too nkitodolunot, anaa ake olalimunoni loo nkatini, anaa olaisumani loo Sirat. Ore irorei naa keidimi ake atadamu alang enkisumata. Ore ena pukunoto e nkiguran nemeata ninye irorei oigerokoki oloiguran kake keata endamunoto ake ena naigero naa ore ilaiguranak neasishore irorei lenye maate. Ore lelo oiguran te mpukunoto ena kiguran nenare neyiolou enkipirta e nkiguran nereten irorei lenye eng'or enkata pee eidim aibalie enkipirta enye aitobiraki. Ore lelo oiguran loo rubat naapasha naa pee

eiteru aaret irorei lenye eng'orr ewiki nabo. Neaku kenare neisho olaiteng'enani pooki tung'ani enkardasi naipirta ina kiguran arashu eng'ar nkardasinini. Ore lelo pooki oiguran neishiakino tenetumo aitamoo enaiko tenedala enkiguran. Neaku eishiakino nening'okino erishata napuonu aitamoo eng'or enkata aitamoo isinkolioitin. Ore pooki kiguran nenare neata iutarot emaate tialo enaikunani enkiguran naa keishiaa neasishore nkiasin tenebo imasaa tenebo ntokitin nautu enkiguran.

**Ilimunot & Enkiteng'enare:** Ore Ilimunot o nkiteng'emat naa inkibalat naautu tipat enkiteng'ema. Ore nkatini, o inkisumat oo Sirat, tenebo inkiguraritin neitodolu enkipirta enkiteng'ema. Ore ilimunot o inkiteng'emat neibalie aitobiraki enkiteng'ema. Keidim elimunoto o enkiteng'ema tenebo enkiguran aiteru aashu esuju te siadi, neaku lasima pee iriamari tenebo. Ore enkatini neti anaa enkawuo nang'oroo imbaa aipirie eneyieu. Naa ore nkiteng'emat naa ninche imbaa. Ore anaa enayieu enkawuo imbaa pee etum ataasisho aitobiraki, neijia etiu nkatini o nkiteng'emat eyieunoyu pokira eiriamari.

**Inkikilikuanat Naaimakini Tenebo:** Ore nkilikuanat naaimakini naa nkikilikuanat olaiteng'enani naitagol iloitem'eni pee eimaki terishata e nkiteng'ema. Etaasishore Yesu ena abila oo nkiteng'emat too rishat kumok tenkata enkisiyaiare enye. Keidim aikilikuana iloitem'eni lenyena aashu kulikae ake enkikilikuanata enkilianyaanyukoto te mbuku *Matayo* 16:13-20.

Ore nkikilikuanat naaimakini naa nedupoto to laiteng'enani o to loitem'eni. Amu ore iwalat nayau iloitem'eni naa keret olaiteng'enani metayiolo ajo ainyioo eidipa iloitem'eni aibung'a naa kainyoo etalaikinotoe iloitem'eni. Keret sii olaiteng'enani matayiolo ajo kainyoo enare neitem'enisho amu eitu eyiolou iloitem'en aitobiraki. Amu ore enkitok meidim atayiolo eluso te nkaji ometaba anaa neisha pee edol enenetawe pee emur. Neijia



sii etiu enkiteng'enare, meidim olaiteng'enani atayiolo enchalan enetii ometaba anaa neisho iloitenteng'eni erishata meimaki nkikilikuanat natayioloito o neitu.

Ore nkikilikuanat naa ine tipat to loitenteng'eni. Amu eng'enu iltung'ana oleng to mbaa nayiolou. Amu ore oltung'ani oishori iwalat anaake naa meyioulou toki, nemeitoki adamisho aashu aomon, neing'oru ewalata embae naje. Tadamu ajo etiaka iyiook Enkai nchere entang'as eng'oru enkitoria e Nkai. Eisidai enking'orunoto oleng naa ene tipat sii oleng te iyiook. Kadamu apa aagira yeyio aiteng'en anaiko tenayier endaa. Kaikilikuan ninye anaake ena kikilikuanata pooki rishata nayier endaa, ajo "kebaa enkare naapik olmushele? Kebaa olmushele lapik atua? Kebaa enkima nainok? Kaja ildakikani layier ele mushele?" Kaikilikuan ninye ena kikilikuanata amu kayiolo ajo keyiolo naa kaaliki. Matem ninye ajo adamu openy. Ore pee eidip neipang yeyio naing'uaa maing'oru openy nanyok atam aitobir openy. Kenare nikincho loitenteng'eni lo Rorei le Nkai erishata naanyok aing'oru ewalata. Keas nikilikuanat nikindim aitobira teleleki, naa keisho iyiook erishata nikisisie nikilepunye Enkai tinikining mbaa naishoo Enkai ninche irorei o damuni.

**Enkibung'ata Ororei le Nkai:** Nejo *Olkerempe le Nkai* 119:11, "Atushuma nanu Ororei lino to ltau lai, pee maas ake eng'oki tialo iyie." Etimira Yesu intemat to lpurkel pee edamu neuro irorei ooling'u Isirat. Enyanyukie olkerempe o Yesu, kenare nikinyok aiteng'enuo Irorei ooling'uaa Isirat pee kindim atimiri intemat o ng'ok. Ore pooki kiteng'ena kitipika Osirata pee eisum olaiteng'enani olkereri aisumaki kanisa nesuju kanisa tesiadi aisum to ltoilo sapuk tenebo ninye katitin kumok pee ert ninche meitenteng'enuoto Irorie. Ore sii ninye olaiteng'enani naa pee eimaki enkipirta olkereri te nkanisa, amu tiniyiolo irorei nimiyoilo enkipirta neitu anaa tiniata enkawuo o mbaa nimiyoilo atasishore. Kenare nikiyoilo enkipirta o lkereri pee kindim atasishore anaa apa enataasa Yesu. Keidim isinkolioitin o

nkiguraritin ataret iltung'anak meteng'enita, neaku kenare olaiteng'enani metayioloitoo ilkererin aitobiraki. Ore iltung'ana le kanisa naa kenare neitagoli pee edamu kulo rorei tiatua ewiki nejo lelo rorei nkolong'I pooki. Keliki olaiteng'enani ilairukok pee eponaa irorei ena kereri airo enkata enkirorokino o tenetumo olkulikae airukok te wiki pooki.

**Shakenisho:** Ore shakenisho naa keponaa iltauja lang ore tenkaraki ena nikitoponaitie shakenisho te kuna kiteng'emat, ltoo neishiaa apa niking'orutua shakenisho te kulie reishat ote kulie wuejitin, kitoduaa pee kitukunyaki shakenisho tialo nkanisani CCC te Kenya. Ore amu kimanya enkop oo Lmaasai, ore ena shakenisho eing'uaa enkorok olairukok loo Lmaasai o nkanisani, kinoto shakenisho te nkomoi hoo hetii nkomok mmikiyiolo. Keidim ataa keata olaiteng'enani kulie shakenisho nemetii atua ena kiteng'ema naa keata tipat pee eidim atoponiki atua. Ore enkae, naa pee eidim aitagolo iloiteng'eni amu eisidai teneng'arie ina shakenisho enaikununo enkiteng'enare ewiki natulusoyie neitijing oleng ninche te shakenisho e jumapili.

**Too Nkoitoo Naatonyorrayioki Aasishore:** Nejo 2 *Timoteo* 3:16-17, "Ore ilkegerot pooki naa Enkai naiyang'ua, neeta dupoto te nkiteng'emare, ote nkisikong'at o ererioroto, ote nkitubulunoto tiatua esupatisho, paa ore oltung'ani le Nkai neitabari te nkias pooki sidai." Eiteng'ema iyiook Paulo te kulo kererin entoki naidipa Yesu aitodolu terishata enye oo ntemat to lpurkel. Ilo Sirat taa oata tipat oleng. Elikii sii iyiook Paulo, "ore nena kishorunot e Kristo naa ketejo pee eaku kulikae ilkipaaaret, neaku kulikae iloibonok le Naki, neaku kulikae ilalikirok, neaku kulikae ilairritak o laiteng'emak, peyie erreteni lelo sinyat, te nkaraki ina siaai e ramatare, ene nchetata o sesen le Kristo, o metabaiki pooki naboisho naimu enkirukoto o eyiolounoto e ilo Inoti le Nkai, nikaku iltung'ana ootubulutua aamitunye, aabaiki entemet e mbotoro nalulung'a e Kristo" (*Ilefeso* 4:11-13). Ore te *Ilefeso* 6:17, nejoki ilairukok pooki (inkera, intoiwuo, irrindiki,

tenebo ilaitoriak) meludumu “olalem le Nkiyang’et laa ninye Ororei le Nkai.”

Keyiolo iloo papa nchere mme pee inyang’akiki ilayiok lenye ilalema nirriwaa meshomo aarare oln’atuny. Amu ore olpayian pooki onyorr olayioni lenye naa keinyang’aki olalem neliki anaiko teneasishore. Amu ore olayioni oata olalem nemeyiolo ataasishore naa bata teninye olool kulikae. Tenedol ng’otonye aashu menye enkerai oo larin aare ake edalare olalem nekuet nabo kata aoru ninye tenkanyiano enye makewan. Amu keidim enkerai atadalare nedug’ie kewan aashu kulikae lo Imarei lenye. kake ore pee ebulu enkerai naa keishori olalem neiteng’eni enaiko tenaasishore. Ore paa ketaa olmurani oidim ataarare oln’atuny kenare neyiolo enaiko tenaasishore olalem pee mearie ilkulikae oboitare tenkarki nemeyiolo ataasishore ina are.

Neaku, ore iyiook ilaiteng’anak, mme pee kirreteni iyiook iltung’ana to Rorei le Nkai ake, kake pee kinteng’enisho iltung’ana enaiko tenpuo aasishore. Ore tena kitamooto nadumuni, nimikigira aishoru enkias nalulung’a. Mme pee ening olaiteng’enani nchere lazima pee enteng’enisho nena kitamoot naadamuni. King’utua iutarot too larikok le kanisa “Community Chrisitan Church” te nkop o Lmaasai kigira aitamoo nikidamu, kake neitodolu ena nchere ore olaititani naa meata elakunoto te nkitamoot. kenare neing’oru te nkomono Enkai neiteng’en enchula meitamoo ate nena naanare kanisa naagira aiteng’en. Tadamu ajo ore Paulo neitu eiger empalai nabo aigerolki nkanisani pooki ata sii ninye Enkai te mbuko **Embolunoto**. Ore pooki anisa neata iyieunot enyena makewan, naa ore Enkai naa keisho pooki olaiteng’enani oing’one eng’eno enye egira aitengen’isho kuna kiteng’enat le nkanisa enye (ing’uru **Yakobo** 1:5).

**Irorei oo Bayie:** Ore te nkoitoi naijo ina naa keeta tipat enkirorokino tenikibaiki ilchoreta lang o lelatia, neijia sii ninye

etiu enikenoto keeta tipat. Ore olkuaak loo Lmaasai o nkitanyaanyukot naatii Biblia naa keiteng'en iyiook empukunoto nemayia naishiaakino. Ore te **Nkikena** 6:22-27, neitanap Enkai Musa,

*"Tiaki Aron o layiok lenyena nji enkuna ti nimayianana iltung'ana le Israel entejo,*

*'Mikitamyiana Olaitoriani nikigolie:*

*'Mikintawang'aki Olaitoriani enkomom enye, niking'urrie:*

*'Mikinchoo Olaitoriani omom, nikincho seriani.'*

*"Naa nchoo ninche metipika enkarna ai shumata lelo tung'ana le Israel pee amayian nanu ninche."*

Eitanapaki ilapolosake pee emayian Israeli, "pee amayian nanu ninche." Eishoo Enkai lelo arikok loo ltung'anak esiaai namayianie iltung'ana, ore anaa enkomono, ore sii ninye emayian neata sii ninye eng'olon neasisho. Eikeno Paulo impala enyena pooki meteleku nabo ake te nkoitoy emayianata. Ore irishat kumok mme te mayian ake, kake sii o te nkisisa Enkai.

**Enkigerore Too Naaigeri:** Ore ena rubata naa enolaiteng'enani pee eigerisho edamu neomon too naipirtat lelo Sirat o Enkiteng'ena. Ore pooki tururr nepaashare olikae nepaasha iyieunot enye. Ore sii pooki olaiteng'enani nepaashore olikae neata nkishoorot naapasha. Neaku ore ena rbata naa keisho olaiteng'enani erishata naigerie indamunot ng'ejuko egira alo arretena.

### **Enjurroto:**

Kitaasishore enkitanyaanyukoto e ng'orore ombaa enkauwuo pee kilimunye esiaai olairritani (aashu olupastai) arashu olaiteng'enani eeta Enkiteng'ena oltururr le Kanisa. Maape dukuya aaimaki eng'orore. Oo naaji tenetii oltung'ani ogira

oretena ang'orr entaraku et naitotiye olmarei lenye. Amaa, keng'oroo ake oltung'ana imbaa neshuko alo ang? A-a, kelo asuj embae enye neing'oru tenaa ketitila entaraku et. Neaku ore sii sinye olairritani naa pee elo asuj imbaa enyena pee eyiolou tenaa te ketitila enkipirta enye. Naa tenetadia enkipirta enye, naa keitamoo nkatitin kumok enkawuo enye neigil atem. Meisho ake duo metaa kediak anaake. Kake keing'oru ajo kainyoo naisho ninye metadia enkipirta enye. Kenkawuo, kembrae, kosiwuo, kosiwuo, kenduata enye, kengolon napi too nkonyek enyena? Neaku keiten'ena teina batatai enye paa ore tenkae rishata netil enkipirta enye. Amu keyiolo ajo ninye oing'uraki olmarei lenye entoki nanya, neaku, kelo dukuya eitengena pee eaku olang'oroni padan netum aing'uraki olmarei lenye. Keishiakino naa neijia sii ninye eas olaiteng'enani.

Otenetil olang'oroni enkipirta? Basi, nenap nkiri ayaki olmari lenye. Neshipa tenebo te nchipai sapuk einosita nkiri. Neaku, ore olairitani padan nenap ashuk shakenisho e nkanisa enye pee etum atishipata teebo. Ore olang'oroni otara entaraku et naa pee eyiolou enaikuna pee ebaiki ina kirpirta enye, pee ore tenkae rishata netum ataara enkae taraku et. Neaku ore ake aitoki ore olaiteng'enani naa pee eyiolou ajo kaji eikuna pee eiteng'enisho enkiteng'ena enye aitobiraki pee eitoki ake aidim aiteng'enisho tenkae kata. Keidim sii olaiteng'enani atadamu aisho enkisisa Enkai kake mme kewan. Amu tenebik Enkai tiatua iyiook nikindim aiteng'enisho Ororei le Nkai nikindim atabaiki enkipirta ang.

**Kulie Naaimakini o Laiteng'enani:** Ore kulie naaimakini o laiteng'enani naa nkikilikuanat naidim olaiteng'enani aikilikuana kewan egira aing'uraa tenaa ketitila enkipirta enye naa kainyio pee etitila ina kipirta aasuu kainyoo pee eitu etil. Ore tenaa kata endamunoto naa ene tipat oleng to laiteng'enani. Kenare sii neomon neing'oreu eng'eno te Nkai egira awal nena kikilikuanat.



**Emparan:** Mme pee eikilikuanu olaiteng'enani kewan inkikilikuanat tenaraki esidano e nkariyano enkisuma enye. Eishaa sii neikilikuan oltururr lenye, neikilikuan sii ninye oltururr inkikilikuanat. Neaku eishaa nebaiki sii ninye olaiteng'enani ilooiteng'eni lenyena too nkang'itie teina wiki. Meitodolu ena ajo kebaiki pooki ang kila wiki, kake pee eitaa ina olkereti oas abaiki ilooiteng'eni lenyena too nkang'itie airoroki too Sirat nanya ilomon oipirta enkisuma enye neng'ar inkikilikuanat tenenbo ninche.

Ore irishat kumok naa kepuonu ilkipaareta le Yesu enetii Yesu neikilikuan ninche metareto meibung'a nena kiteng'emat aitobiraki. Ore nkikilikuanat naaing'uaa ilo turrurr lang neme olmonekie oitodolu ajo mikira ilaiteng'enanak oo dupa. Keitodolu ajo olmonekie te nkariyano ang enaa apa enatiu ene Eristo. Tadamu ajo ore enkipirta ang neme pee kintoti oltururr alng enaa enikintoti enkerai kiti, kake ore enkipirta ang naa pee kinchooyo endaa nikinteng'en ninche metayiolo enaiko teneitoti ate teina daa. Nikitum sii enkipirta nikintaa lelo oiteng'eni metotiu enaa iyiook. Mikiyieu inkera ang nebik aa nkera. Kake aikiyieu ninche nebulu aaku iltung'ana kituaak oota ilmareita lenye oidim aataramat.

Ore tialo embaikino [? emparan] ang too lturrurri lang matadamu ena nikishipakino inkikilikuanat. Amu keitodol ajo ore oltung'ani ogira aikilikuana naa etiu enaa egira adumu enkijiko esaani aitoti kewan enye. Eishaa sii niking'or lelo oogira aabulu negira aanyamaliki nkolati oo lkulikae meilepu neas enkisiaiyare e nkanisa. Nejoki iyiook Yesu pee kiomon Olaitoriani le Nkisampuaare meinu ilaisiayak le nkisampuaare (Matayo 9:37-38, Luka 10:1). Aikiindim sii aatoomon oloopeny le "nkishu naatii indoinyo inkalifuni" pee eiriu ilchekuti metaasishore Kristo Olchekut Osipa. Eisapuk enkisampuaare. Eisapuk enkirita. Ematishipata teneibung'are iyiook ilkulikae te nkisiaiyare e siai.

**Mbaa Naaponaro Naaimakini:** Ore te nkikinoto naa aikiponaa kulie damunot te nkaraki olaiteng'enani egira alo aing'or enkisuma enye. Ore kuna damunot naikenieki naa keisho olaiteng'enani endaa nalo anyaal. Mme pee elo ake olaiteng'enani dukuya aing'or esidano enkiteng'ena eilo tururr lenye. Kake pee eing'or sii ninye abaraki enaikununo ninye makewan. Eishaa nelo sii ninye olaiteng'enani anya Osesen le Kristo, neok Osarge le Yesu Kristo, neok enkare e nkishui, arashu eaku sii ninye olemeidim aiteng'ena ilkulikae. Mee pee elo ake anya neok enaa enaas enkiteng te nkata olameyu, kake enaas enkiteng te nkata olari, kake pee edaa araposho pee etum kule. Neijia etiu Kristo te iyiook anaa enkata o lari te nkiteng.

**Enkigerore Too Naaigeri:** Ore ena rishat enkigerore naa enolaiteng'enani neig'eni indamunot enena o pooki ae bae naba enaa enataboloko Enkai eidipa aiteng'enisho. Ore kuna naa indamunot naaitodol esiaai nataasa te nkiteng'enare. Keidim atisira ajo kaa rubata enkisuma nataasishe oleng naa kaa neitu easisho. Neigerr sii ina naiteng'enate oltururr neitamooto teina kisuma. Eishaa sii neiger olaiteng'enani ina naiteng'ena Enkai teina kisuma enkata [? nyurito] kewan. Ebaiki neiteng'ena Enkai olaiteng'enani ajo eishaa nebulu too nkisumaritin, arashu eiteng'ena enaiko tene rretena aiteng'enisho enkae kisuma. Neaku ore ena rubata naa keisho olaiteng'enani ewueji neigerie ina naiteng'ena Enkai ninye te nkoitoy enkitayunoto Enkai kewan o teilo turrurr lenye.

Enkiteng'ena e Dukuya - Elimunoto: Enkibung'ata  
Ororei le Nkai

Iutarot naaidim Olaiteng'enani ataponai te nkiteng'ena e dukuya.

**Enkipirta e Nkiteng'ena:**

1. Ore te nkiting'oto ena kiteng'ena, neyiolou ilooiteng'eni inchere ore enkinosata Ororei le Nkai naa keisho iltauja lang engolon etiu ake anaa tenikinya endaa o seseni amu keisho iseseni lang engolon.
2. Ore te nkiting'oto ena kiteng'ena, naa keyieu katukul ilooiteng'eni nepik Ororei le Nkai atua iltauja lenye te nkinosata Ororei le Nkai tiatua Bibilia.

**Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:**

1 Ilaiguanak 19:1-8, Yohana 6:22-35  
Enkigilata oo Nkitanapat 8:3, Matayo 4:4  
Yeremia 15:16, Esekiel 3:1-3, Embolunoto 10:9-10  
Olkerempe le Nkai 34:8

**Enkitayunoto e kewan o Laiteng'enani:**

Eishiakino nenyorraa pooki ng'ae inchere ore apa Eliya naa oltung'ani le tipat tedukuya Enkai, oltung'ani apa oata enkirukoto sapuk. Ore pee eiteru Iloibonok le lejare aashipa neiteru sii adung ate eitodolu inchere eitayutuo ate tedukuya enkai e lejare naji "Ba-al," ore ele oiboni le Nkai neitu ninye eshilaa katukul. Amu eisilig ninye Enkai katukul ometiaki lelo oibonok le lejare, "Entang'as entoomon intae pooki peyie idolidolo tenaa kewaniki intae enkai inyi naji Ba-al. Naitoki taa nanu aomon Enkai ai e Israeli. Peyie kidol Enkai nawal.

*Tenaa kenkai naji Ba-al tenaa Kenkai e Israeli naa ore Enkai nawal nikitumoki pooki aisiayia nikiomon ninye.” Hoo naa ore apa Oloiboni le Nkai Eliya naa aikumok oleng olorere oogira agilunore ninye. Kake eitasho te nkirukoto nauno naa etaa sii oloisiligayu tedukuya Olaitoriani Enkai nasipa.*

*Kake ore nabo kata etulusoyie emirishoi kitok neiteru aureishoyu neaku imeisilig Olaitoriani. Neiteru ashalu neirrang te nkop neomon Enkai peyie eidim atua. Neaku meokisho nemedaa. Ore nabo kata nelotu olmalaika oing’uaa shumata neisho ninye endaa neisho sii enaok. Nejoki olmalaika ninye inchere keshal osesen lenye naa ina peyie meata engolon neaku emeidim ataasa esiaai tenemenya endaa. Nening Eliya olmalaika nenyaa endaa neokisho. Neitoki ake airrag. Ore te nkata eare nelotu olmalaika neisho ninye endaa nanya. Nejoki olmalaika ninye, “Mitum engolon tena lototo teniminya endaa.” Neitoki Eliya adaa neokisho enkata eare. Ore teina golon naisho endaa ninye, neidimu katukul elototo oo nkolong’i artam kewarie o dama ometabaiki Horeb ilo doinyo le Nkai.*

*Neaku aikitiu ake anaa Eliya. Inchere tenimikinya endaa nimikiokisho nesipa inchere imikitum engolon nikiasie nena baa naishiakino nikias. Ore te rishata apa natulusoyie ore Israeli to lpurkel nenyaa ninche “emukate naing’uaa shumata.” Kake etubulutua nemorua neye. Kake ore Yesu neliki iyiook inchere ninye kewan emukate nasipa naing’uaa shumata. Naa ore ake peyie eitukinya irorei lenyena, nimikiata katukul enkishui nasipa tiatua ate. Yesu ninye emukate e nkishui naa ninye enkare enkishui. Teina rishata ake nikinya nikiok Ororei lenye kiindim anoto enkishui nadede o ntarasi tiatua iltauja lang. Neaku keishiakino katukul nikiya erishata aadaa tiatua Ororei le Nkai*

*tiatua Bibilia, nikinya ninye katukul naa ina kata ake kiindim ashom dukuya tiatua Olaitoriani.*

*Kayiolo inchere kara olairukoni tiatua Yesu Kristo. Kake kaji aiko peyie ayiolou Ororei le Nkai tiatua Bibilia laa ninye oyau enkishui? Kaiteng'en ilkulikae inchere ore Isirat Sinyat naa keata tipat oleng. Kake kagira pasa doi nanu anya Ororei le Nkai makewan? Ekayieu naiteng'en ilkulikae te nkitanyaanyukoto naa kaasita nanu makewan.*

**Enkomono:**

*"Naai Papa, kayiolo inchere iyiolo iyiook naa ainyorr sii iyiook naa ina peyie iyieu iyiook nikinya Ororei lino. Kayiolo inchere inchoo iyiook Ororei lino peyie eretoo iyiook matubulu nikindim sii aashom dukuya te nkirukoto ang. Enkai ai, inchooki eyieunoto peyie aidim ashomo atua enegut to Rorei lino tiatua Bibilia. Taretoki peyie aidim aiteng'ena iltung'anak tipat enkinosata Ororei lino, laa ninye opik inkiteng'emat e Bibilia atua nanu peyie eaku tenebo nanu. Maatorikoi Enkiyang'et ino Sinyati peyie aidim aiteng'enisho, neret ilooiteng'eni metoning'o nena ninteng'en ninche. Naomon iyie te nkarna e Yesu. Esai.*

**Naaigeri:**

**Elimunoto:**

Ore oshi enkata nataaniki aashu natumore Lmaasai oltung'ani ake pooki moruo, aikiyiolo aitisip inchere pee eitorioo enkaina enye aairoroki, "Ng'asak." Ore ake pee kintorioo enkaina, nikigira pee kitum aishoo ilo tung'ani moruo meiteru airo. Neaku, pee kiaasaki entoki neijio ina Ilkigerot Sinyat. Entejo, "Ng'asak!" nikintoki ainining, te eanyunoto pooki toki naliki iyiook Isirat.

ENKIKILIKUANATA EDUKUYA NAIMAKINI TENEBO: Amaa, kainyioo peyie kinining aitobiraki Ororei le Nkai?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Isuma kulo Sirat:**

1 Ilaiguanak 19:1-8

ENKIKILIKUANATA EARE NAIMAKINI TENEBO: Eimaki enkitanyaanyukoto e Eliya. Kainyioo apa peyie eeta tipat tenedaa neokisho Eliya eton eitu eiteru elototo enye?

**Elimunoto o Laiteng'enani te Nkibalakinoto:**

Ore oloiboni le Nkai Eliya netashala te rishata apa natetema Enkaiguanani Yesebel ajo aar ninye metua. Neiteru neitasheyie aaku menyokita tenarishata neirrag neiteru aomon Enkai peyie eye. Ore tiatua irashat are naapashipaasha, nelotu olmalaika lo Laitoriani neitanap ninye nejoki, "Tudumunye tadou." Etoliki olmalaika ninye, "tudumunye tadou, amu kegolu elototo te iyie." Neaku ore te yiook naa peyie kinya Ororei le Nkai arashu eaku naa mikitum engolon sii iyiook tiatua elototo ang, ina kata kigira airiamari tenebo te lototo o Yesu Kristo te nkoitoi.

ENKIKILIKUANATA EUNI NAIMAKINI TENEBO: Kainyioo paa ore enkinining'oto e Bibilia eisumitae aashu enkisumata e Bibilia pee enyaanyukie enkinosata endaa?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Enkiguran:**

(Ore ilaitobirak le nkiguran neasishore irorei lenye.)

Ilaiguranak 1, 2, 3 & 4: neishopo ilbarnot ong'uan arashu ilmurran ong'uan loo Lmaasai tenkishopo enye anaa oshiake to rkuak loo Lmaasai.

*Neitaman isoito tenebo iljipeta enkima anaa enoshi kima nagirae ayierishore. Ore okuni lenye negira aatoni aman enkima. Egira aitaakuno kepejisho neinosita inkiri to lpul. Negira aaimaki esidano tenebo emeloni naata inkiri.*

*Ore olikae liong'uan nejingu neiteru airoroki ilchoreta lenyenak. Ore ilchoreta lenyena pokira neitoomon ninye neiteru aisho ninye inkiri naapejo. Nejoki, "igira aing'uaya eropili sidai?" Hoo duo negira iladuo shoretta okuni aarrep esidano oo nkiri, aajo kejaa orkishamui tenebo o emeloni o erropili, ore hoo neishoo ninye ildung'ot otegelaka kewan, kake ore etii nena pooki netanya enya inaduo kiri. Neiteru aitayu inkitolonyat naapaashipaasha, naa ninche kuna:*

- \* "ore paa anya, naa kagolu oleng, naa kaisho intoiwuo aainei esiaai sapuk mataasa. Nemayieu naas ae siaai."*
- \* "naa ore paa anya, naa kegolu sii ninche indamunot aainei naa kang'enu sii oleng, naa keiteru iltung'anak aapuonu enatii eing'oru eutaroto ... nemayieu naret likae tung'ani"*

\* *“ore paa anya, naa kapiru, naaiteru iltung’anak ayanyitu naaku oltung’ani le tipat tiatua emurua ... nemayieu naaku oletipat aashu oltung’ani oyanyiti.”*

**Elimunoto o Laiteng’enani te Nkibalakinoto:**

Tadamu empejoto o nkiri te nkima. Keng’ou erropili? Ekintaar kuuru? Kake amaa tenaa igira ake aitashe aing’uaya esongouna nigira aining irkitong’at le ilata, mikincho nena kiri engolon. Ore aashu ishomo aekata elototo naado too nkejek neirowua enkolong? Ebaiki naa ore peyie ibaya enaduo kop niloito, nebukoki oltung’ani enkare nairobi enkikompe. Naa kening’o oltoilo sidai – etiu anaa osinkolio iata enkure! Kake ore ake paa empikunoto ake enkare ining’ito ninteru ayieu nidamu ajo aisidai nesila, ore naa enkure ino nemeishunye. Naa ore sii ninche inkiri naa aikincho engolon teina rishata ake nipik atua osesen te nkinosata. Ore sii ninye enkare naa pooki kata ake kiishunye enkure naa teniok ake apik atua osesen lino. Naa neijia sii etiu Ororei le Nkai tiatua enkishui ang tiatua enkirukoto.

Lelo kulikae Sirat oidim aiteng’ena iyiook enkinosata Ororei le Nkai.

**Isuma kulo Sirat:**

Enkigilata oo Nkitanapat 8:3, Matayo 4:4  
Yeremia 15:16, Esekiel 3:1-3, Embolunoto 10:9-10  
John 6:27

**Enkinyaanyukoto:**

Neaku ore peyie kiyieu nikitum engolon tiatua Olaitoriani, naa keishiakino naa nikinya Ororei le Nkai. Naa tenesipa inchere aikiyieu nikiata ening’unoto oo Rorei le Nkai, keyieunoyu nikinya Ororei le Nkai. Amu ore enkinosata Ororei le Nkai naa



keishiakino nikituu anaa enkiteng nanyaal ing'amura neitoki ainyiaku.

*Kenare neutu Olaiteng'enani ena kitanyanyukoto te nguton. Eipirakinore enkoitoo enkiteng nainyiaaku ing'amura, nemetiu anaa oltome. Indim atoduaa empaashata too modiok. Ore te nkiteng, mindim atayiolo ajo kainyioo einosa tening'or imodiok. Kake ore to ltome naa indim atayiolo tening'or imodiok ajo kainyioo einosa amu menyaal ninye endaa katukul.*

Amu ore oltome naa keijoo endaa pooki menyaala. Naa ina paa ore peyie idol imodiok enyenak naa aidol pooki toki duo nainosa naaidol too moduok amu eitu errarra. Kake ore enkiteng tenebo enker o enkine naa kenyaal endaa enye te rishata naado oleng. Ore enedukuya kepik inkujit inkutukie neitoki anyaal te rishata naado. Neaku ina rishata ade eidipa atanyaala te rishata naado idol eijioo. Neitoki aisho endaa meirraga enkite rishata tiatua inkoishua enye. Neitoki taa ainyiaku ing'amura neigil aanyaal neya erishata neitoki ake aijioo. Naa keyiolo enkiteng teneyieu netum esidano o engolon pooki o nkujit. Naa kenyaalisho ake neijioo neinyiaku ing'amura too rishata pooki.

**Osirata Oishiakino Nidamu:**

Matayo 4:4

**Irorei oo Bayie:**

Tenikiyieu nikipik Ororei le Nkai atua iltauja lang, nenare katukul nikituu anaa enkiteng nanyaal ing'amura. Neaku, matusuj enkitanyaanyukoto e Daudi tiatua embuku Olkerempe Le Nkai 34:8, "Wootu enchamishama pee idolidolo aajo eisupat OLAITORIANI!"

Emitiu ake anaa oladuo barnoti tenaduo kiguran! Ematonyok oleng peyie kipik Ororei le Nkai atua iltauja lang!

**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kiteng'ena alang ena kiteng'ena?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

**Emparan:**

Ore olaiteng'enani tenebo kulikae aisiaayiak le sirit naa keishiakino pee eparan kulikae tung'ana te nchula pee eisho erishata meibirribirra nkiteng'emat neng'arr sii Isirat oodamu. Naa kenare ena naa erishata sii enkomono. Naa erishata ena sidai naishiaakino olaiteng'enani pee eikilikuanu ajo kaa rubata enkiteng'ena nataa enetipat oleng. Ore tena kisuma, nkilikuana ajo ekat aja etii enkinosata Ororei le Nkai. Aitoo Jumapilini ake, aashu tiatua e wiki pooki?

**Kulie Naaimakini:**

Ore Yesu makewan naa emukate enkishui. Ore te nkiyang'et, ore osesen lenye naa nkiri ang nikiok osarge lenye. Ore Ororei le Nkai naa ninye kule nikiok. Ore tenimikinya nimikiok tena oitoi, naa ekishalu. Ore ilkumok lang naa ekiok shaai anaake tadekenya. Naa ore tenikitum erishata, naa ekiok kule nikinya nkiri anaake. Ekiyiolo aajo ore kuna daiki naa keisho engolon iseseni lang. Kake kelo oshi nikiany kinya endaa Enkiyang'et Sinyati. Ekinya oshi Ororei le Nkai anaake? Aashu ninye te pooki wiki? Ore tenaa orkitong'ati ake le kule ake iok kata nabo te wiki ninya orkiti dung'oti le nkiring'o kata nabo to lapa, niminya ae daa pooki, niyiolo ajo eishalu niaku mira ole toki. Kake, teniyieu nibik igol aashu teniyieu nintoki atum engolon etulusoyie emoyian arashu olbae, naa iyieu ninye endaa niok kule nikincho engolon osesen lino. Ore teina oitoi ake, tonyuaa ntubulu orkuak le nkinosata Ororei le Nkai.

Ore anaa ilaiteng'enak tiatua Esirit e Kristo, tenikiyieu nikiata kule nikincho emurua anaa enkiteng naitotioki aitobiraki aashu tenikiyieu nikitum engolon nikiramatie emurua, kenare nikincho Enkai meitagolo iyiook te nkinosata Ororei lenye. Ekiyiolo pooki

aajo ore nkituaak naaitanakisho naa keyieu nanya endaa neok enkare sapuk pee etum kule naanaku enkerai kiti. Neijia sii eikununo too laisiayiak le Sirit. Eishiaa naa nikinya Ororei le Nkai nikiok ina Are e Nkishui anaake tenikiyieu nikindimu aishooi nkiteng'emat sidain o nkikoot naasipa.

**Naaigeri:**

Enkiteng'ena Iare – Amaa, ena kiteng'ena kene pooki ng'ae, aashu kenoo larikok ake?

Iutarot naaidim Olaiteng'enani atoponai te nkiteng'ena iare:

**Enkipirta e Nkiteng'ena:**

1. Ore te nkiting'oto ena kisuma, naa keyiolou ilooiteng'eni inchere keipot Enkai pooki airukoni aipotoki embulunoto tiatua esiaai oo Lomon Supati.
2. Ore te nkiting'oto ena kisuma, naa keyiolou ilooiteng'eni inchere eishoo Enkai pooki ng'ae Ororei lenye mme ake duo too lkuti arikok.
3. Ore te nkiting'oto ena kisuma, naa keyieu ilooiteng'eni netum enkure tenebo o embulunoto Ororei le Nkai tiatua maate peyie eidim atubulu neasisho tiatua esiaai Enkai aaitobiraki.

**Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:**

Enaidurra 19:16-19, Enaidurra 20:18-19  
Enaidurra 33:12-20, Enaidurra 34:29-35  
Enkikena 11:16-17, 25-29  
2 Ilkorintio 3:18; Ile Efeso 4:11-13

**Enkitayunoto e kewan o Laiteng'enani:**

Ore apa Israeli naa iltung'anak gelunot le Nkai makewan, kake meyieu apa ninche neirorie Enkai maate. Kake etiakita Musa meirorie Enkai tenkaraki ninche. Neitoki taa ninche ainining ninye. Etejo, "Kake inchoo metaa mme Enkai nairorie iyiook, mikiye ake." Kake etapaasha ninye Musa ina. Neomon Enkai nejo, "Inteng'enaki taata nanu inkoitoi inono, pee aatum nanu atayiolo iyie natum kirotetisho too nkonyek inono," nejo, "ore tenakata intoduaaki enkitoo ino."

*Amu kenyor Musa Olaitoriani neata eyieunoto peyie eyiolou ninye oleng. Neiteru taa ajing entii Enkai nelo dukuya. Neaku kedol pooki ng'ae ajo etaa tenebo Enkai tenkaraki ore enkomom enye naa kewang aitodolu inchere ketii entii Enkai tenebo ninye.*

*Naa Musa apa oltung'ani opaashari tiatua Israeli amu eitu ninye eureyu atijinga atua entii Enkai. Kake keata sii empaashata tiatua osiligi lenye tenebo o enkanyit nayanyit Enkai. Ore apa enkumoi oo Israeli neitu apa ninche eidim aisiliga Enkai katukul nepuo dukuya aitodolu inchere etogolong'utua. Neipot Enkai Israeli ajo inchere etanyaita Olaitoriani neany Olaitoriani eiriamarie ninche tenkaraki keidim otumuta ninche te ngoro enye. Kake etiaaka Olaitoriani Musa, "Inoto iyie omom te nanu." Neyiolou Musa inchere eyiolounoto ake Enkai nikindim aishoo omom tenenbo entii Enkai nitum taa omom tedukuya ninye. Nejoki Musa Olaitoriani peyie eiriamariye ninye, peyie eitodol Enkai ninye enkitoo enye, neiteng'en sii Olaitoriani inkoitoy enyenak, tenkaraki keyieu apa Musa neyiolou Olaitoriani neing'oru sii oleng omom tedukuya ninye.*

*Ore Musa, ele tung'ani onoto omom tedukuya Enkai, nemeata apa ninye olom tenkaraki omom naishoo Enkai ninye tenebo sii o erikore naisho Enkai ninye. Etayiolo apa ninye inchere ore erikore naishoo Enkai metoriko Israeli naa olola apa oiroshi oleng laa meidim apa ninye atanapa openy. Neomon Musa Enkai eretoto, neimaki Bibilia inchere neya Enkai enchoto enkidimata e Nkiyang'et Sinyati apa naata Musa neisho aoriki kulikae arikok, neiteru aibonisho. Neaku Yoshua, laa ninye apa olaretoni le Musa, negoro neyieu neitasheyie ilkulikae arikok peyie meitoki aibonisho. Nejoki Musa ninye, "Iata olom tenkaraki nanu? oo napaji tenaa ore iltung'ana pooki lo Laitoriani, naa loibonok, naaji te nepik Olaitoriani Enkiyang'et enye shumata ninche!"*

*Naa ore ilaiteng'anak tenebo ilairritak, naa ore erikore ang neme peyie kintashe te rishata Enkai o Ltung'anak lenyena. Amu ore iltung'anak pooki le Nkai, ilairukok pooki, neipotoki pee epuonu pooki ng'ae tedukuya Enkai peyie "kiwariwaru anaa kiok teina kishaa o Laitoriani, eibelekenyitai iyiook matotiu anaa ninye eponari ake ina kishiaa." Kipuonu dukuya Enkai peyie eitodol neisho enkisisa enye netum enkibelekenyata atum nyaanyukie Enkai naa ninye meiting enkitoo enye intarasi." Ore erikore ang kira ilaiteng'anak aashu ilairritak naa "peyie iltung'anak lenyenak tiatua enkisiyaiare enye ... o metabaiki pooki ... nikiaku iltung'ana ootubulutua aamitunye." Neaku ore erikore ai ara olaiteng'enani naa peyie alotu ajing atua entii Enkai, naiyiolou Enkai, naitogol sii olkulikae nepuonu aajing atua entii Enkai. Amaa, kara pasa ena pukunoto olarikoni tiatua kanisa, olarikoni laiyo Musa, laa kelotu nenyor katukul atijinga atua enkitoo aashu entii Enkai laa keyieuaki sii iltung'anak le Nkai pooki nepuonu sii ninche ajing atua katukul enkitoo aashu entii Enkai nebulu sii aamitunye?*

***Enkomono:***

*Papa lai Enkai, aomon tenebo Musa, "Inteng'enaki nanu inkoitoo inono peyie aayiolou iyie natum sii aing'oru omom tedukuya iyie." Anaa Musa, kayieu katukul nadol enkitoo ino naiwariwaru enkitoo ino. Taretuoki nanu peyie aidim atijinga naton tiatua enitii. Kaomon sii, Olaitoriani Enkai ai, inchere tubukoki Enkiyang'et shumata iltung'anak linono pooki paa ore tenebo o kanisa ino neitodolu enkitoo e nkisisa ino te nkop pookin.*

*Naaigeri:*

**Elimunoto:**

Kelimu olaiteng'enani ena kiteng'ena aimaki indaiki naapashipaasha naa aing'ae eitoomonoki teine. Naa keasishore imuain uni aashu ong'uan naapashipaasha neimaki ninche tendorrop. Nemeimaki sii duo oleng te rishata naado, kake te rishata dorrop, peyie eidim anoto erishata naimakinye inkiri tena kisuma. Neimaki telulung'ata inkitanyaanyukot oo ndaiki aashu eiuloki aimaki inkitanyaanyukot oon daiki anaa enaasa oshi tiatua imurua ang. Naa ore enkipirta ena naa pee eret ilooiteng'eni metadamu inchere kaa mua nabo endaa Bibilia, naa aing'ae nanya ninye.

Imuain oo ndaiki tenebo:

1. Enchula osirua, naetuo iltung'anak botorok temurua kake netoni ninche inkera ti ang.
2. Olpul laa mepuo ninche inkituaak, meteleku ilewa ake aashu ilbarnot aashu aa olturur oje ake opuo.
3. Enashe e ndaa naishoo entomononi inchorueta enyena natereto too lkeek aashu te nkare tenkaraki einoto enkerai.
4. Ewueji naidimi aaitoomonie pooki tung'ani neyau iropiyiani naalakie endaa aashu enaoki.



5. Enchula arashu semina naitobiraki endaa netii ilgelunot arikok kake lelo ake oitoomonoki oopuonu.
6. Endaa o Imarei, naa keishori ilomon tene puonu teina rishata nainosi endaa.
7. Aashu kulie muain oo ndaiki.

**Elimunoto o Laiteng'enani te nkibalakinoto:**

Tenesipa naa inchere ore Ororei le Nkai naa endaa, neishiakino naa nikiyiolou inchere aing'ae eitoomonoki te nkinosata.

ENKIKILIKUANATA EDUKUYA NAIMAKINI TENEBO: Aing'ae eitoomonoki to sirua lo Rorei le Nkai tiatu Bibilia.?

*[Neitagol aashu eitukuj olaiteng'enani arashu olalikiaroni ilkuti tung'ana metawala.]*

**Isuma ele Sirata:**

Enkigilata oo Nkitanapat 5:22-33

**Enkiteng'enare:**

Etegelua Enkai olosho loo Israeli anaa iltung'anak lenyenak neirorie ninche to ltoilo laa kening ninche too nkiyia enye maate. Ore apa Irorei ogira airorie naa olning'o te rishata enye o ninche. Kake eitu eyieu ninche Israeli nening oltoilo le Nkai maate. Nepuo enetii Musa nejoki ninche ninye meinining'o oltoilo le Nkai tenkaraki ninche peyie meinining ake ninche oltoilo le Nkai katukul. Nejo ninche kitoning'o ninye Olaitoriani kata nabo neitu kiye. Kake ore pee kining ninye aaigil nebaiki naa aikiiye. Ometabaiki ilarikok loo ltung'anak netanyaita sii ninche ening oltoilo le Nkai maate. Nejing Musa aaku ninye otii erishata oltung'anak o Enkai. Keliki iyiook Bibilia inchere eiroro Musa tenebo o Enkai engura too nkomomi peyie etum atoliki iltung'ana loo Israeli enatejo Enkai.

Nejo Enaidurra 33:12-13 neomon Musa Olaitoriani, nejo, "Ninyaaka ajo, 'Kaayiolo nanu iyie te nkarna, ninoto sii omom too nkonyek aainei.' Ore naa taata, aatoomono, tenaa kanoto omom too nkonyek inono, ntoduaaki taata nanu inkoittoi inono, pee aatum nanu atayiolo iyie natum omom too nkonyek inono." Neyiolou Musa inchere eyiolounoto ake Enkai tenebo inkoittoi enyenak naidimie menoto omom tedukuya Enkai, neaku neing'oru ninye neyiolou Enkai te nguton. Ore Daudi laa ninye eimaki Bibilia ajo oltung'ani lo ltau le Nkai makewan, neomon tiatua Olkerempe le Nkai 27, "Etejo oltau lai te iyie, 'Ing'oru enkomom enye!' Enkomom ino, Olaitoriani, ninye nanu aing'oru ... Nteng'enaki nanu enkoittoi ino, iyie Olaitoriani." Kake ore ilkumok loo Israeli neshomo ninche dukuya aas entorroni ore teina nelau omom tedukuya Enkai.

Neaku, amaa, aisidai teneaku ilarikok ake openy oing'oru enkomom Enkai neing'oru sii pee eyiolou ninye te ng'uton? Ore te nijoki, "ee, ilairukok ake," peyie eaku ilarikok oiteng'en lelo leme ilarikok tiatua kanisa nena naipirta Enkai.

ENKIKILIKUANATA EARE NAIMAKINI TENEBO: Amaa, aing'ae naaku olarikoni, aashu olaisiyiani, tiatua kanisa?

**Enkatini:**

Kelimu olaiteng'enani enkatini tene naing'uaa enkarriyiano enye makewan. Naa ore ena atini naa keipirta erishata nagira intoiwuo oo Lmaasai aiteng'en enkerai metassa esiaai neitu aekata eas. Neiterunye ena atini tena rishata naa meyiolo enkerai enaduo siai katukul. Neimaki sii ena atini tiatua enyuaata nagira ina kerai aiteng'ena o elototo naloito esiaai akiti alang oshiake tenkaraki nagira ina kerai aretisho. Neaku kelimu olaiteng'enani enkatini aibalie te nguton.

Kuna muain esiaai natii atua ina siai:

1. Eyierata endaa.
2. Enchetata enkaji.
3. Aasishore enkawuo tenebo ombaa te nkalamasisho.
4. Aing'or inkishu aitobiraki.
5. Ashu kulie muain esiaai naanyaanyukie inoolmaasai..

**Enkibalakinoto Olaiteng'enani:**

Ore te kulie rishat naa aikiiruk aajo imikias esiaai e Nkai tenkaraki nimikiyiolo enikinko tenikias. kake Enkai Papa ninye Papa lang laa ninye oipot inkera enyenak pooki peyie eret aas esiaai o Imarei, naa ore Enkai naa Olaiteng'enani ongiri too nkera enyenak peyie eisho nena kera enyena meiteng'enata nebulu aas esiaai enye. neaku imikiindim aatejo inchere nemeas inkera ang esiaai o Imarei amu meyiolo enaiko teneas. Aisidai tenikijo peyie eas egira aiteng'ena. Naa kesipa katukul neijia sii etiu tiatua kanisa.

**Enkiguran:**

(Ore enkiguran e nkiteng'ena eare naa keigurani tene. Naa ore irorei lena kiguran netii enkiting'oto ena kishuma. Ore peyie eiguran olaiteng'enani inaaipirta Yesu. Ore oltung'ani oinguran anaa Nikodemo neas anaa apa Nikodemo ina kata egira olaiteng'enani aibalie nena kiteng'enat naaji endukuya naagira aibalie.)

**Enkibalakinoto Olaiteng'enani:**

Ore ilairukok kumok naa inji etiu anaa iltung'anak tena kiguran. Meyiolo aajo keyieu Olaitoriani ninche nebulu aagolu naa imeyieu ninche katukul neaku ilaisiayiak arikok tiatua kanisa. ore peyie eipot Enkai Musa te nkata edukuya, neomon Musa Enkai te sipata neigil katitin kumok pee eirriwaa Enkai likae tung'ani. Nejoki Musa Olaitoriani, "mara nanu arriyia tena siai niyieu iyie nalo nanu aas." Kake, etiaka Enkai ninye, "nanu

Olaitoriani olo tenebo iyie naa kaalo nanu aret iyie.” Neyanyit Musa Enkai. Neiriamarie Olaitoriani ninye neisho Enkai ninye pooki toki o pooki kidimata naasie esiaai e Nkai.

**Enchakenisho:**

**SHAKENISHO E KANISA OLEPISHET**

Ore to lari 1988, nepuonu ilmusheni le C.M.F. aalikioo Ororei le Nkai te nkop ang. Naa yioloti apa anaa Oltulelei. Neun inkanisani isiet. Kake ore tiatua ninche teina kata neitu eitashe pooki meteleku Olepishet ake. Meisisi Olaitoriani. Kitotona tiabori olchani ilarin 18. Ore te nkanisa ang netii oltasat oji Ole Kijabe. Naa oseuri ninye neure Olaitoriani. Nenyorr apa atoomono tenkaraki kanisa peyie etum kanisa ilasho aataa elelero. Newal Enkai enkomono enye. Ore tenakata, enkanisa e Olepishet naa keata ilpayiani imiet oiteleikino inkaik. Kiata sii elelero kumok oleng.

Ore kanisa e Olepishet nimikiata olpastai kake kitishipakinote erikore oo lpayiani alang tenikiata olpastai amu keyanyita ilpayiani oleng maate. Ore kanisa Olepishet naa keeta iltung’anak elakunoto peyie easishore oltung’ani pooki enkishooroto enye naishoo Enkai ninye. Ore kanisa ang naa ilpayiani le nkanisa oibatisa iltung’anak. Aa taa lelo payiani oiteleikino inkaik. Ore tenakata, netubulua kanisa oleng oleng. Kiata ilng’osil ng’ejuko ile. Meisisi Olaitoriani. Kiata taata naboisho sidai tenebo nkanisani pooki naamanita iyiook, neme ne C.C.C. ake. Keeta kanisa Olepishet naboisho tenebo emurua nikimanya. Keisho emurua kanisa enkanyit sapuk oleng. Meisisi Enkai.

*~ nanu Patrick ole Saiyialel, olpayian le nkanisa Olepishet*

**Isuma kulo Sirat:**

Ile Efeso 4:11-13

**Elimunoto o Laiteng'enani te nkibalakinoto:**

Eipotito Enkai pooki airukoni peyie ebulu agolu. Neishiakino nikiyiolou pooki ng'ae olaitoriani nikirretena aabulu te pooki kisiayiare. Aikiyiolo aajo ore erreten naa pesho teneitu iyasishore ina rreten. Neaku keyieuaki Olaitoriani pooki airukoni pee eas pooki kisiayiare. Neaku eipotoki iyiook pooki te siai e kanisa. Tadamu inchere etejo Enkai ore lelo arikok tiatua kanisa naa peyie eaku ilaisiayiak tiatua kanisa. Naa teina rishata ake kitum erishata tenebo Enkai niking'oru peyie kiyiolou ninye nikitum taa aatubulu nerreteni iyiook te pooki siai e Nkai.

**Osirata Oishiakino Nidamu:**

Olkerempe le Nkai 27:8

**Enkoitoi Naasishoreki:**

Ore pooki tung'ani otii atua ena shula arashu ele turrurr, neishiaakino nejurr kewan pee edol ajo kalo porrror etii tiatua ina Sirit e Kristo. Kegira oshi abulu anaake peyie eaku olotubulua amitunye te nkirukoto?

**Irorei oo Bayie:**

"Wooi kebaa enguton o enkarsisisho o enkarriyiano e eng'eno nagut e Nkai!

Meing'orunoyu nkiguanat enyena,  
nemeturunoyu nkoitoi enyena!

'Amu ai ng'ai doi otayiolo oltau le Nkai?

amu ai ng'ai otaa oloiguan ninye?'

'Amaa, ai ng'ai oishoo ninye enkishorunoto  
metaa keyookini aalaaki?'

Amu ninye eing'uaa naa ninye eimu naa enetii ninye epuo  
intokintin pooki.

Metaa enenye enkitoo ntarasi! Esai. (Iroma 11:33-36)

Emaing'oru pooki enkomom e Nkai nikinining oltoilo lenye eimu Ororei lenye, peyie kiyiolou ninye nikitum enkibelekenyata nanyaanyukie ninye.

## **Naaigeri:**

---

### **Enkiguran (Ing'ura *Yohana* 3:1-21, *Marko* 10:17-31)**

(Eatae ilaiguranak ong'uan tiatua ena kiguran. Neishopo pooki anaa enaiko oshi Ilmaasai tiatua orkuak lenye.)

Oloiguran 1 – Nicodemo (eata ninye orinka oipila loo saen tiatua osirua)

Oloiguran 2 – Yesu

Oloiguran 3 – Olpayian karsis le tipat (eibung'ita entirma osirua naipila)

Oloiguran 4 – Oloiteng'eni arashu enaiteng'eni

*Ore te nkiterunoto ena kiguran neitashe Yesu tedukuya eilo gilata, naa ore oloiteng'eni netonita tenebo lelo looiteng'eni ooing'or enkiguran. Nejing'u Nikodemo egira adamu nenyok sii peyie medol hoo oltung'ani ninye anaa olang'oroni o isudori tiatua entim.*

*Nejo Nikodemo:*

Yesu, atayiolo inchere iyeyo iyie ing'uaa Enkai. Ore anaa peyie aiteru alotu kanisa nikinchoo iyie nanu intokitin kumok. Kara oshi aisinani amu maata inkishu nemaata enkitok nemaata iropiyiani nalakie enkiyama. Kake ore tenakata nataa karsis, aata enkitok tenebo inkera, naata entonata sapuk. Naa ore too nkolong'i naa kaitoki atum enkae kitok tenebo inkera o tenebo o nkulie kishu kumok. Paa ore pee aing'ori nedol pooki tung'ani inchere iyie Enkai naishooyo karsisisho.

*Nejo Yesu:*

Kaaliki esipata, meetai olodol enkitoria e keper teneitu eini aigil.

*Nejo Nikodemo:*

Ekesipa! Atoiwuoki aigil nara olairukoni. Naibatisaki apa tiatua ilarin tomon o miet otulusoitie.

*Nejo Yesu:*

Emiyiolo Nikodemo ajo kebulu inkera? Itejo kitoiwuoki aigil tiatua ilarin tomon o miet. Kake eton ake ilioo itiu anaa enkerai kiti.

*Nejo Nikodemo:*

Kainyioo enkipirta eina? Naa kara oltung'ani oyanyiti oleng.

*Nejo Yesu:*

Meeta enkerai kiti eneipirare kake keishori ninye pooki toki nayieu, te rishata pooki naishir aomonu entoki naing'uranie aashu kule. Ore ng'otonye aashu enkanashe neisho ninye pooki toki nayieu. Iyieu iyie Nikodemo naaisho nanu iyie pooki toki, kake imias iyie hoo ae siaai ai.

*Nejo Nikodemo:*

Kake atoiwuoki aigil.

*Nejo Yesu:*

Kake amaa anaa pee ibulu aaku olayioni shekut kanu, itareto olairritani aing'or lelo airukok ng'ejuko te nkirukoto? Kanu doi inchorua maatumurata oltau lino metaa itaa oltung'ani le tipat tedukuya Enkai? Kanu doi itaa olmurrani le Yesu otubulua neyiolou Ororei le Nkai neret emurua arishie oln'atuny oikurrukur laa ninye Shetani? Itayieua ninye apa niaku olupayian too nkera – otoo iltunganak apa litoriko tenebo oina siana apa ino oina luata naa kanu ing'ura?

*Nejo Nikodemo (neiro egira aipung):*

Kake mayieua doi naaku olupayian le kanisa. Aidipa doi oshiake ataa olupayian le tipat matii atua kanisa.

*Nekuetu olupayian karsis le tipat enetii Yesu negil kung agilaki Yesu kung.*

*Nejo olupayian karsis le tipat:*

Lo Inoti le Nkai! Kainyoo aidim ataasa peyie aidim atujung'o enkishui o ntarasi?

*Nejo Yesu:*

Lasima pee iyanyit enkiteng'ena tiatua kanisa.

*Nejo olupayian karsis le tipat:*

Aibung'a nena pooki nataasa. Amu imeekure apa alo iloibonok. Meekure sii arr enkitok tenebo inkera aainei nemagorokino ninche. Karet sii entomononi ai – katitin are! – te ndama aorr boo o lasho asishore kulibaro ai.

*Nejo Yesu:*

Kake eton ake eeta enikitong'orikia. Inchoo ae toki ilaisinak? Kainyoo paa ore ematua e tomon oo nkishu naishoo nanu iyie neton ake eipurito nening'o enkorui tiatua ina luata ino e atua emboo ino?



*Nejo olpayian karsis le tipat:*

Amu inaainei ninche! Naa kayieu ninche neaku naing'or olmarei lai.

*Nejoki Yesu ninye:*

Nanu laishoo ninche peyie itumoki aing'ura olmarei LAI. Neaku, kaiwuang'ie ninche katukul nikilotu iyie asuj nanu.

*Nejo olpayian karsis le tipat:*

Pamaa, aasuj iyie? Kaji doi ilo iyie?

*Nejoki Yesu:*

Kaloito enetii ilaisinak peyie alo aitoti ninche. Naloito enetii ilootig'ilate iltauja peyie alo aitagol ninche. Naloito enetii lelo oiturrayioki peyie alo aisho ninche ilmareita. Naloito enetii iloomuei aishiunye ninche. Naloito enetii inkituaak aret ninche. Naloito enetii inkera aibung ninche. Naloito enetii Irkisii o Lumpua aitoomon ninche tiatua enkitoria e shumata. Naloito alo aye to salaba tenkaraki pooki tung'ani. Naitoki apiu aishooyo enkishui o ntarasi. Naitoki alo shumata aitobir irgilat le pooki tung'ani. Naa ore too rishat pooki natii tenebo Papa lai te shumata, aomonito, ainosita Bibilia aa Ororei le Nkai, nanyorrita Enkai katukul nagira aisho Enkai pooki toki naata ometabaiki ninye ina naa ninye pee aimayie ingolikinot.

*Nejo olpayian karsis le tipat (neiro eipang'ita alo boo neing'unie elekunya):*

Majo kaidim atusuja aikuna neijia.

*Nejoki Yesu:*

Kegol oleng to lpayian ejing enkitoria e shumata alang olcharkuk tenejing atua enkaji oo Lmaasai.

*Nejo oloiteng'eni (Neipotisho abuaku etonita to lorika tenebo ilkulikae looiteng'eni):*

Aing'ae pasa ojeu?

*Nejoki Yesu (neing'or Yesu ninye tenebo ilooiteng'eni ooboitare ilo oiteng'eni):*

“Meidimayu ina too ltung'ana, kake eidimayu pooki te Nkai.” Mayieu nagil emurt o lairukoni; kake pee aiteng'en meirrugoyu neitobor kewan. Naa ina pee ajoki pooki ng'ai olotu enatii metotiuo anaa enkerai kiti, nemeeta ae naipirare, naa kaing'or nanu ina kerai kiti. Kake ore enkerai naa kenyor menye neyieu katukul nebulu anyaanyukie menye. Ayeuo pee aitodol intae Papa naret sii intae pee inteng'enana atiu anaa ninye anaa enigirara aabulu too larin aaku iltung'ana le Nkai. Mesioki aasa tesiokinoto kuna, kake “wootu enatii intae pooki oonyamal niatata ilolan ooiroshi, pee ayeng'iyeng'ie intae. Enteleiki ate enchata ai oo murto, enteng'ena ate te nanu, amu kabor nemawuasa to ltau, naa itumutu intae enkiyeng'iyeng'ata ti atua iltauja linyi.”

---

### **Enjurroto:**

#### **Inkilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katterretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Naa kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Naa kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Amaa, ketii oltung'ani otii atua ena shula, ogira aitodolu ilbulabul te mbulunoto o erreten pee itumoki ataasisho tiatua kanisa? Kainyoo inkishoorot enye? Naa ae tiaa oitoo eipotito ninche Enkai? Aing'ae naa oidim aiteng'ena ninche metaasishore inkishoorot enye enaiko arashu te nkoitoo oshi naiteng'enie intoiwuo inkera enye?

Na amaa, ketii iltung'ana lele turrurr lemegira aitodolu ilbulabul le mbulunoto tiatua erishat naado? Kaji sa doi eikoni tenesheti ninche arashu eitubuluni peyie etum naa atubulu? Naa, kaing'ae oitaa ninche iloiteng'eni?

**Emparan:**

Ore pee eparan olaiteng'enani o lelo kulie aisiayiak le Sirit iltung'ana le nchula, neitayioloo ninche imbaa nayieunoyu te Sirit o te murua tenkaraki enkisiayiare. Toliki ninche enaiko teneponu aaku erubata tiatua esiaai Ororei le Nkai. Inkilikuana ninche enaiko na pee eipot Enkai ninche metaa erubata eina kisiayiare. Iimakinnye ninche enaiko teneponu aaku iltung'anak ooterretenate te nkaraki ina kisiayiare.

**Kulie Naaimakini:**

Kiyiolo inchere ore inkera nemeiteng'eni nemererei nemebulu to rkuak sidai. Ore nena kera naa keaku keilepie ate negolong'u arashu eaku meyiolo aataas ae siaai neaku naa meeta ae retoto nayaki olmarei. Kake ore tenena kera naiteng'eni nererei aitobiraki naa kebulu too rkuak sidai. Eitu eitanap iyiook Yesu pee kipuo enkop pooki pee kintaa iltung'anak loibebelekenyate ake inchere nejoki, "Kairuk Yesu." Amu etiu ena anaa ekitoishote ake, kake mikinteng'en nimikintamok inkera ang. Eitanapa iyiook Yesu pee kintaa iloreren, ilooiteng'eni. Keitodolu ena inchere ore pee eidim iltung'ana aatang'amu ninye, neitokini aiteng'en nereti sii metayioloitoe esiaai olmarei le Nkai ometaba ana nebulu tukul aabaiki entemet embotorro, neaku keidim o ninche atorikoi ilkulikae metoini aigil, neiteng'en esiaai olmarei le Nkai. Ore tiatua Esirit, keishiaa nerikori iltung'ana metoini aigil, neaku ilooiteng'eni, neitoki ninche aaku iltung'ana oiteng'en ilkuliaae.

**Naaigeri:**

## Enkiteng'ena e Uni – Elimunoto: Kainyoo Bibilia?

Iutarot naaidim Olaiteng'enani atoponai te nkiteng'ena e uni:

### **Enkipirta e Nkiteng'ena:**

*Ore te nkiting'oto ena kiteng'ena, naa keyiolou ilooiteng'eni irubat naapashaasha tiatua Bibilia naidim aatadaare tiatua Ororei le Nkai. Keyiolou sii kuna baa naaipirta Bibilia.*

- 1. Ore Bibilia naa Ororei le Nkai, netii atua Ororei le Nkai, netii atua irorei le Nkai. Neaku ore amu keisiligayu Enkai, enarikino nikipik enkirukoto ang o osiligi lang atua Ororei lenye.*
- 2. Ore Bibilia naa iorot are: Osotua Musana tenebo Osotua Ng'ejuk.*
- 3. Etii imbukui ntomoni ile o ile atua Bibilia. Ore Osotua Musana neata imbukui tomoni uni o naudo. Ore Osotua Ng'ejuk neata tikitam o naapishana.*
- 4. Eeta Bibilia Inkigerot kumok naapaashaasha tiatua: etii intepen, netii inkaatini, netii inkomonoritin, netii isinkoliotin, netii ilkerempe, netii inkitanapat, netii inkiteng'emat, netii inkitanyaanyukot, netii inaibonoritin, netii inkiguraritin.*

### **Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:**

Enkigilata oo Nkitanapat 30:1-20  
2 Petero 1:19-21, 2 Timoteo 3:16

### **Enkitayunoto e kewan o Laiteng'enani:**

*Ore te kulie katitin nemoda oshi nkerra meeta eng'eno. Naa ina oshi pee eyieu ninche olchekut. Ore sii ninye te yiook etejo Yesu kira nkerra naa ninye Olchekut lang Supat.*

*Ore enkoitoi nabo naitodolu ajo kemoda inkerra naa nchere keidim atishipakinoto aadaare ewueji nebo ometaba anaa nemut nkujit o ntona neaku enterit nainyiototo. Naa ina oshi pee epuo ilchekuti airrita inkerra pee erikoo ninche nenen neenyori oleng. Ore te kulie katitin kituu oshi iyiook anaa nena kerra naamoda! Ebaiki oshi netii atua Bibilia enkatini naje nikinyor arashu ematua naje nikinyor oleng aatadaare, neaku mikintoki aing'uraa kulie daat oo matuan e Bibilia. Neaku ore amu nena matuan ake e Bibilia kiyiolo oleng, ninche naa ake kipuo airritayie eluata e Nkai. Ore nena neitu kiyiolou tiatua ate, nikiany sii tiatua enkiteng'ena ang.*

*Ore tiatua Yohana 21:15-17, neitanap Yesu osinka lenye Petero katitin uni ejoki, "Ore tenikinyor, intotio ilkuoo laainei le kerra. Ore tenikinyor, irrita nkerra aainei. Ore tenikinyor, intotio nkerra aainei." Ore ake anaa esipata ina tialo Petero neijia ake sii etiu tialo iyiook. Tena a aikinyor Yesu naa meeta inchere aimikintoti nkerra enyena. Neaku ekinteng'ena pee kintoti te yieunoto te nena pooki enkirrita naatii atua Bibilia, nikintoki arik kulie kerra nenen nenyori enkirrita aiko neijia. Neaku ekipuo dukuya pooki rishata aing'oru nenen wuejitin enkirrita tiatua Ororei le Nkai, nikitum aatayiolo Ororei le Nkai te nguton tiatua ate, nikitum atorikoi inchularitin ang ewueji pooki enkirrita tiatua Ororei le Nkai pee epuo sii ninche ayiolou Ororei le Nkai te nguton oleng.*

**Enkomono:**

*Naai Papa, ira iyie Olchekut lai Supat. Ekirikoo nanu enetii enkare e nkishui namelok nesila. Ekirragie iyie nanu too nkujit sapuki naanyori tiatua Ororei lino pee atum atadaayu ometaba anaa naraposho naaku biyoto.*

*Taretuoki maatusuja nanu iyie, olchekut lai, te lulung'ata  
oto ltau lai pooki. Nyaaki sii taretuoki matorikoi ilkulikae  
atua nkujit nairrusha tiatua Ororei lino, pee eidim sii  
ninche aanoto shoruetisho sidai tenebo iyie. Tiatua  
enkarna e Kristo, aatomono. Esai.*

**Naaigeri:**

**Elimunoto:**

Keiteru olaiteng'enani ena kisuma nalimu enkatini oo ntare aashu inkishu naagira airrita ilooti ayiok. Eitu eyiolou lelo ayiok iwuejitin kumok naidim atereo inkishu, neaku ewueji nebo oshiake ereo aapuo airritayie. Neaku eitu epiru nena kishu aasapuku amu etumuta naa inkujit tenooshiake wueji. Neaku sii imeata kule kumok naa lepuni. Neitu sii ninche eitoki inkujit aabulu aitobiraki tenkaraki nanyaita inkshu anaake. Neaku ore pee elotu olameyu, neiteru nena kishu aamuoyu tesiokinoto neye sii inkumok. Neaku kelimu olaiteng'enani ena atini easishore irorei lenyenak tenebo o enkarriyiano enye, eing'or ina nyamali nanotito inkishu tenkirrita o tenebo enoshiake wueji nebo neirritayieki.

Naitoki aimaki enkatini o lchekut ng'en oirrita inkishu too wuejitin neepaashipaasha. Nebulu nena kishu aapiru netum sii

kule kumok. Neisho ilo shekut inkujit erishata nabalunye tenkaraki nareuta inkishu iwuejitin neepaashipaasha. Neaku ore pee elotu olameyu, naa kepir nena kishu neitu sii eye. Neaku keimaki olaiteng'enani ena atini te nguton penyoy.

### **Elimunoto o Laiteng'enani te nkibalakinoto:**

Keliki iyiook Bibilia inhere ekira intare e Nkai e nkirrita enye.

Enaishiaakino neyiolou olaiteng'enani: Keimaki Bibilia ena katitin naudo. Te nkitanyaanyukoto, ing'urai Olkerempe le Nkai 100:3.

Keret iyiook ena atini matoning'u inhere pee kirritishore iyiook Bibilia te lulung'ata, metaa ime ake pee kisum aashu kining iloshiake Sirat nimikintoki ainining kulikae. Amu eishoo iyiook Enkai enkop sapuk nikirritishore tiatua Bibilia naa keishiakino naa nikirritishore pooki Rorei le Nkai tiatua Bibilia. Amu tenimikirritishore Bibilia te lulung'ata naa keaku imikibulu nimikipiru tiatua Ororei le Nkai. Naa keaku sii imikintoki aata kule Ororei le Nkai nikindim aatang'arie ilkulikae. Ata ometabaiki inkujit o Rorei le Nkai nemeitoki aabulu atobiraki tiatua iltauja lang. Amu ore ake pee kining Bibilia te lulung'ata nikitum enkipirta enajo isirat naa ketum katukul erishata naibalunyie Ororei tiatua iltauja lang. Naa keaku sii imikitum erishata nikirretenare too rishat olameyu le nkiyang'et. Naa keaku ore pee elotu osina atua iltauja lang, naa kelelek oleng kibatata niking'ua enkirukoto tiatua iltauja lang. Kake ore ake pee kirritishore Bibilia te lulung'ata naa aikibulu nikipiru nikigolu nikitum kule kumok oo Lomon Supati nikiindim aatang'arie ilkulikae. Ore enkirrita o Rorei le Nkai naa kebulu aadoru nenyoriju sii, naa keaku aikiindim aatoning'u oleng te guton. Neaku ore pee elotu osina lo lameyu atua enkishui ang, ore ina kirukoto ang nagol neitobik iyiook tiatua Olaitoriani ometaba anaa nelotu enkata o lari.



## ENKIKILIKUANATA NAIMAKINI:

Indim aterewa iyie inkishu inonok tenebo ntare alo airrita te wueji netii inkujit naanyori naaronkeri needo o naa tenimiyiolo enetii inkujit sidain?

### **Elimunoto o Laiteng'enani te nkibalakinoto:**

Naa neijia etiu te yiook keishiakino nikiyiolo ajo kaji kipuo aing'orunye inkujit sidain nikirritishore. Keishiakino sii nikiyiolou aing'oru inkoitoi naapaashipasha nikirritishore tiatua Bibilia.

### **Enkiteng'enare:**

Ore Bibilia Sinyati naa enkishooroto makititiai e tipat naing'uaa Enkai. Naa kenapita Irorei le Nkai laa ninye ooyau enkishui naa ninye sii ooiteng'en iyiook maape te nkoitoi naa keitiship Enkai. Naa ena embuku embukunoto o rorei le Nkai tenkaraki yiook. Naa ore Bibilia naa keyau embolokinoto Enkai atua iyiook. Ore tiatua Bibilia, neitoduaa iyiook Enkai empukunoto enye eimu Irorei lenyenak, o tiatua inkitanapat enyenak, o tiatua inkiteng'emat enyenak, o tiatua inkiasin, nikisiai olikae olikae too ltung'anak. Eimu kigira aiteng'ena empukunoto e Nkai tenebo inkoitoi enyena, ekinteng'ena pee kinyorru ninye o pee kitum sii omom enye. Ekinteng'ena sii enikinko pee kitu anaa ninye niking'oru omom te ninye. Ekinteng'ena sii enikinko pee kisis ninye anaa enikinko pee kiro o ninye anaa enikinko pee kinining ninye anaa enikinko tenikiomon. Ekinteng'ena enikinko teniking'ar osotua o eseriani tenebo ninye.

Ore menye inkera oo Lmaasai neisilig ajo ore egira airorie inkera enyenak naa kening ninche ninye. Ore sii olpayian loo Lmaasai naa keisilig egira airorie enkitok enye ajo keinining enkitok enye irorei lenyena. Ore egira ilchoreta are loo Lmaasai aanya ilomon naa keinosakino pokira aare te nguton oleng nemeeta olemenyok ainining olikae te nguton oleng. Neaku keiro Enkai amu keyieu

iyiook nikining ninye. Ore kanisa naa ninye esiankiki e Yesu naa ore pooki airukoni naa ninche inkera e Nkai.

Nikiyiolo pooki aajo keata irorei engolon o enkidamata. Ore ildeketa naa keitame oltung'ani kake ore imayianat naa keret naleng oltung'ani. Ore tedede, Irorei le Nkai tiatua Bibilia naa irorei oata engolon o enkidamata. Ore te lelo ooany einining naa ore kulo Rorei naa keyau oldeket le enkiguana e Nkai tenebo keeya naa ninye apa enedukuya naiterua ajing enkop ina kata apa peyie eiteru Adam aany enining Irorei le Nkai. Kake ore te lelo oinining neyanyit ninye, naa ore kulo Rorei naa imayianat naayau omom tedukuya Enkai neyau enkishui ng'ejuk tiatau Kristo.

**Isuma kulo Isirat:**

Enkigilata oo Nkitanapat 30:11-20  
2 Petero 1:19-21, 2 Timoteo 3:16

Neaku, matejo "Ng'asak!" aajoki Bibilia nikingteng'ena inkumok naaipirta kulo kiliku makititiak oing'ua Enkai.

**Enkiteng'enare:**

Ore terretenata ena kiteng'ena, naa keretoo olaiteng'enani embuku kiti naji "Kainyoo doi Bibilia?" erubata ele sototi e nkiteng'enare naji "Enkibung'ata e Bibilia."

Ore Bibilia naa osototi loo mbukui ntomoni ile o ile. Neipoti aajo "Sinyati" amu eing'uaa Enkai ilo laa aisinyati ninye naa keiteng'en iyiook eninko pee kiaku sinyat. Etii Bibilia isirat katitin kumok naaimaki intokitin naapaashipaasha: etii intepen, netii inkaatini, netii inkomonoritin, netii isinkoliotin, netii ilkerempen, netii inkitanapat, netii inkiteng'emat, netii inkitanyaanyukot, netii inaiborioritin, netii inkiguraritin.

Keatai iorot are tiatua Biblia: Osotua Musana tenebo Osotua Ng'ejuk. Naa ore imbukui o Sotua Musana nenotoki ninche te rishata eton eitu elotu Yesu naa keiteng'en iyiook naipirta Olning'o Musana laa ninye apa eeta iltung'ana loo Israeli tenebo Enkai eimu Inkitanapat e Musu. Naa ore imbukui Osotua Ng'ejuk neiteng'en iyiook naipirta Olning'o Ng'ejuk laa ninye kiata tenebo Enkai tiatua Yesu.

Naa ore imbukui pooki neiteng'en iyiook empiris o olgur tenebo o enyorrata Enkai neiteng'en sii iyiook pooki enikinko pee kiata osotua ogut – eshoruetisho nagut o eseriani – tenebo Olaitoriani lang Enkai ang.

### **Imbukui o Sotua Musana**

Etii imbukui ntomoni uni o naado naapaashipaasha auta Osotua Musana.

Ore imbukui imiet, naa “Imbukui e Musa,” naa keji ninche “Imbukui e Nkiteng'ena” arashu “Imbukui oo Utarot” arashu “Imbukui oo Nkitanapat.” Naa ore nena bukui naa Enkiterunoto, Enaidurra, Ilawi, Enkikena, tenebo Enkigilata oo Nkitanapat. Naa ore kuna bukui naa keiteng'en iyiook enkitobirunoto enkop o enoo ltung'ani o pooki toki naitobirua Enkai. Naa keliki sii iyiook intepen apa musan edukuya tenebo o engolong'u o eng'oki apa nikitaasa tedukuya Enkai. Naa keliki sii iyiook enkiterunoto apa enkipank'ata e Nkai eneikuna pee ekordu iyiook o pee eitajeu iyiook. Ekinteng'ena sii inkaatini o nkitanyaanyukot kumok oo ltung'anak le tipat. Keiteng'en sii iyiook inkitanapat Enkai tenebo o enkishui esinyatisho aashu esupatisho tenebo enkiterunoto oo ntepen oltung'anak gelunot lo losho le Israel.

Ore naa kulie bukui tomon o aare, “Imbukui oo Ntepen.” Naa ore nena bukui naa Yoshua, Ilarishak, Rusi, 1 o 2 Samuel (ledukuya tenebo oliare), 1 o 2 Ilaiguanak (ledukuya tenebo oliare), 1 o 2

Intepen (edukuya tenebo eare), Esra, Nehemia tenebo Esta. Naa ore kuna bukui neiteng'en iyiook inkaatini naasipa oo nyuaat naanyokita iltung'unak le Nkai. Ore te kulie rishat neaku apa iltung'unak ooisiligayu neining Irorei le Nkai ore teina nemayian Enkai ninche. Kake ore tiatua rishat kumok netanyaita einining Irorei le Nkai ore teina neitamei to ldeket le Nkai.

Ore naa kulie bukui imiet, "Imbukui e Ng'eno o Noosinkolioitin." Naa ore nena bukui naa Yoab, Olkerempe le Nkai, Ndung'eta e Rashe, Olaikooni, tenebo Osinkolio le Solomon. Ore kuna bukui neng'arie iyiook en'geno nagut oo laiteng'enak loo Israeli, tenebo isinkolioitin kumok o inkomonoritin kumok.

Ore naa kulie bukui tomon o naapishana, naa "Imbukui oo Loibonok le Nkai." Ore inedukuya naa imbukui imiet naado. Naa keji ninche "Iloibonok Kituaaki le Nkai." Naa ore nena bukui naa Isaya, Yeremia, Nkishirat, Esekiel tenebo Daniel. Neitoki atii kulie bukui tomon o are dorropu. Naa keji ninche "Iloibonok Kititi le Nkai" arashu "Embuku oo Tomon o Aare." Naa ore nena bukui naa Hosea, Yoel, Amos, Obadia, Yona, Mika, Nahum, Habakuki, Sefania, Hagai, Sakaria tenebo Malaki. Ore kuna bukui, naado tenebo indorropu, naa Irorei le Nkai too ltung'unak lenyenak gelunot. Naa kenapita kuna bukui kuna pokira enkikoo o enkitamioto tenimikining Irorei le Nkai tenebo inkisiligat naadede empiunoto o imayianat tenikirridu nikinining Irorei le Nkai tiatua iltauja lang pooki nikias.

### **Imukui o Sotua Ng'ejuk**

Neatae kulie bukui tikitam o oopishana tiatua Osotua Ng'ejuk. Naa keiteng'en iyiook enikinko peyie kibik te nkishui e nkirukoto neata osotua ogut tenebo Enkai tiatua Yesu Kristo eimu Enkiyang'et Sinyati. Naa keiteng'en sii iyiook inaaipirta Kanisa, Esirit e Kristo.

Ore inedukuya, eetai imbukui ong'uan, "Imbukui oo Lomon Supati." Naa ore nena bukui oo Lomon Supati le Kristo naa Matayo, Marko, Luka tenebo Yohana. Naa keliki iyiook inkaatini o enkishui o enkisiayiare o Laitoriani lang Yesu Kristo. Ore kuna bukui naa kenapita irorei kumok ooyieu Yesu neliki iyiook naa keishiakino niking aitobiraki pooki rorei le kulo.

Ore neatae ae "Buku oo Inkaatini" naa embuku oo lasat. Naa ore ena buku neiteng'en iyiook inaipirta enkiterunoto e kanisa o enkisiayiare tenebo nkiteng'emat apa embata oo lkipaareta.

Neetai kulie Pala tikitam o obo naaigerokoki inkanisani aashu iltung'anak. Ore nena pala nenapita olkikikuai le Nkai too lairukok tiatua inkanisani naa keishiaino katukul nikiyanyit katukul amu keret iyiook peyie kibulu nikipuo dukuya tiatua Olaitoriani. Netii kulie pala naaudo naaigero olkipaaret Paulo aigeroki iltururi too wuejitin neepaasha. Naa ore nena bukui naa Iroma, 1 o 2 Ilkorintio (ledukuya o liare), Ilgalatia, Ile Efeso, Ilfilipi, Ilkolosai, tenebo 1 o 2 Ilesalonike (ledukuya o liare). Netii kulie pala uni naigeroko Paulo ilarikok tiatua inkanisani: naa 1 o 2 Timoteo (edukuya o eare), Tito tenebo Filimon. Netii kulie pala isiet naaigero ilkipaareta oopaashipaasha le Kristo aigeroki ilairukok oomanya iwujitin kumok. Naa nena pala kuna: Ilhebrania, Yakobo, 1 o 2 Petero (edukuya o eare), 1 o 2 o 3 Yohana (edukuya o eare o euni), tenebo Yuda.

Neetai ae buku naji Embolunoto. Naa ore sii ena buku empalai naigerokoki inkanisani, kake nemeji "empalai" amu keado. Naa ore ena buku neigero olkipaaret Yohana eitagol ilairukok oogirae aisilisil. Ore imatuan naabayie ena buku, ematua e tikitam o obo o ene tikitam o aare, neitodolu te yiook esidano enatiu enkishui oo lairukok ina kata teneshukunye Yesu.

**Osirata Oishiakino Nidamu:**

Enkigilata oo Nkitanapat 30:14

**Enkoitoi Naasishoreki:**

Ore ena kiteng'ena naa keishoru enduaata dorrop ake naipirta enkiteng'ena nagut naleng tiatua Bibilia. Te pooki ng'ae oisum neitobirr sii enkipank'ata sidai pee eidim aisuma Bibilia pooki te lulung'ata neisum sii anaake. Naa tenaa ketii oltung'ani obo to Imarei oidim aisuma Bibilia. Ore ilo tung'ani nenyok aisum tembuakunoto anaake, te nkipirta enkisumata e Bibilia pooki. Ore tena oitoi, keidimi iltung'anak lemeidim aisuma aanoto erishata nainining irorei pooki tiatua Bibilia te lulung'ata. Neishiakino neata ilairritak arashu ilpayiani le nkanisa enkipirta naisumie Bibilia te lulung'ata tenebo o nkanisa, nenyok aisum te nkiti rishata peyie etum ilotururr eretoto peyie eaku ore te lelo lemeidim aisuma neton ake einining'ito pooki Rorei le Nkai tiatua Bibilia netum enkitotioto sapuk.

**Irorei oo Bayie:**

Neaku kelimu olaiteng'enani enkatini naipirta inkishu naatishipate amu etayioloitoo ajo etasha neyiolou sii aajo ore etulusoyie enchan ore tadekenya naa kenana nkujit. Neaku kelimu olaiteng'enani ena atini eimu enkarriyiano enye makewan te ndorropo.

Naa inji etiu ena kiteng'ena. Ore anaa enikining ena kisuma nikiyiolo aajo kelotu enchan aashu eiterua doi ninye. Nikiyiolo aajo kenana neipilipil inkujit negira aiteru aabulu. Neiput iyiook pookin enchipai nikiyooki ainyototo anaa inkishu epuo adaa.

Meiputa iyiook pooki eyieunoto oo nkishu o enkinyotototo eyookinoto pee kipuo enkirrita o Ororei le Nkai.

**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Naa kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Naa kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Keyioloi naba aa atayiolo Biblia? Katayiolo ninye te nkiputakinoto metaa kaidim aiteng'enishore pooki buata tiatua ninye?

Neaku amaa, nanu tenebo olkulikae arrikok tiatua ena shula ekitorikoitie ilkulikae airukok pooki tiatua enkirrita e Bibilia? Naa amaa ketii intokitin nikiindim aibelekenya pee kindim aanoto erikoroto naikash nikirikorie enchula tiatua elulungata pooki e Bibilia?

**Emparan:**

Ore pee eparan olaiteng'enani tenebo olkulikae arikok lelo kulikae airukok tena wiki, neiteru aakilikuan inkikilikuanat naalelek pee edol eyioloi nayiolo lelo kulikae airukok Bibilia. Nebaiki neikilikuan aajoki, "Iyiololo aajo aing'ae Abraham tiatua Bibilia naa kaji eikununo?" "Iyiololo inkatinin naaje naaipirta Eliya?" aashu "Kaji eikuna olkipaaret Paulo pee eaku olairukoni?" Neishiaakino neing'or oleng lelo airukok tiatua Esirit lelo laa keya nepuonu kanisa te kulie rishat kake mme ilarikok ninche. Naa keret taa katukul ena olaiteng'enani metayiolo aitobiraki eyioloi natayioloto lelo kulikae airukok Bibilia neret ninche metayiolo enaiko teneiteng'en ina shula aitobiraki.

**Kulie Naaimakini:**

Nikinteru aaimaki enaiko inkayiok kutiti enkata nemeyieu nereu inkishu airrita tenenen wuejitin nemeyiolo. Naa neijia sii etiu sii ninye olaiteng'enani imeyieu nerik nena shularitin enye nenen neegut nemeyiolo tiatua Bibilia aitobiraki. Naa ore kira ilchekuti, keishiaakino nikiimaa ena kirrita nalala e Bibilia. Nikintisip aajo kitayioloto aaitobiraki te nguton pee eaku ekiindim atorik iltung'ana le Nkai atua nena rubat pooki enkarsisisho enkirrita. Ore tiatua Olkerempe le Nkai 23, nejo Daudi inji Olaitoriani ninye olchekut lenye laa ninye orik airragie ninye tenkirrita neirragie



ninye too nkujit nanyori nerikoo ninye too nkiopat oonkariak naaitirringa. Naa neijia sii etiu te yiook. Ematorikoi eluata e Kristo tiatua nenen pooki e nkirrita tiatua Bibilia.

**Naaigeri:**

Enkiteng'ena e Ong'uan – Enkinosata Ororei le Nkai:  
Enkinining'oto aashu Enkisumata

Iutarot naaidim Olaiteng'enani atoponai te nkiteng'ena e ong'uan:

***Enkipirta e Nkiteng'ena:***

- 1. Ore te niking'oto ena kiteng'ena, naa keyieu neng'uar oloiteng'eni neining Ororei le Nkai tiatu Ilkigerot.*
- 2. Ore te niking'oto ena kiteng'ena, neaku keunokino oloiteng'eni aining Ororei le Nkai anaake eisum to ltoilo sapuk..*
- 3. Ore te niking'oto ena kiteng'ena, ore ilo oiteng'eni oyiolo aisuma neunokino anaake aisum Ororei le Nkai tiatua Bibilia.*

***Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:***

*2 Ilaiguanak 22:1-14 (ore ilaisiayiak le Yosia enotito ina buku oo nkitonapat neisumi)  
Nehemia 8:1-8*

***Enkitayunoto e kewan o Laiteng'enani:***

*Ore iyook mikindim aatoor eyiolounoto te ning'unoto tenikiyieu nikiyiolou esipata eina bae. Kaishiakino katukul niking'oto inchot pokira are eina bae. Tenikiyieu nikiyiolou ilchoreta lang tenaa aisupati naa enoshi kata tenikinya ilomon tenebo nitum taa aining'oto enajo. Ore tiatua Bibilia netii iwuejitin tikitam o ile naaiteng'enie iyook Enkai inchere teneitu kining aashu teneitu kinining neaku imikindim katukul aanoto ening'unoto.*

*Ore tenaa kira ilairukok, naa aikijo pooki inchere eikiyieu nikiyiolou Enkai nikiyiolou eyeunoto enye nikisuj*

*inkoitoi enyenak. Kake imelelek kiyiolou Enkai te nimikinining ninye. Neishoo iyiook Enkai Irorei lenyenak peyie kiyiolou ninye nikitum shoruetisho sidai o ninye. Neaku ore paa aikii yieu nikijing enguton eyiolounoto Enkai. Naa keshiaakino inchere pee kiya erishata ainining enayieu Enkai nejoki iyiook nikinining ninye katukul tedede to Rorei le Nkai otii atua Bibilia.*

*Amaa, tenelotu olomon oing'ua enkop nalakua netem alotu arik nena tare inonok metusuja ninye. Naa ore tenkaraki olomon nemesuj ninye intare. Kake ore iyie olopeny intare pae irikoo ninche anaa olchekut lenye, naa aikisuj ninche iyie pooki wueji nirik tenkaraki aikiyiolo ninche iyie naa keyiolo sii oltoilo lino. Nejo Yesu, "Kening inkerra aainei oltoilo lai, nayiolo ninche, naa kaasuj ninche" (Yohana 10:27). Amaa, ekiyiolo iyiook oltoilo lo Laitoriani? Ekining Irorei le Nkai too rishat pooki pee eaku eikiyiolo oltoilo lo Lchekut lang nikindim aatusuj ninye?*

*Neaku emaiteng'ena kanisa nikirikoo sii, kake ime too rorei ake kake too nkitanyaanyukot naa aikiasita iyiook maate. Nikiya erishata katukul ainining Ororei le Nkai.*

***Enkomono:*** *Papa Olaitoriani lang otii shumata, kayiolo eneba esidano tenayiolou oltoilo lino nainining katukul Ororei lino. Kake ore te kulie rishat nikining kulikae toiloishi, iltoiloishi leme oltoilo lo Lchekut lang Supat, naa ore te kulie rishat nikincho metorikoi iyiook aarik enkiminata. Taretuoki nanu peyie aidim ataanyu oltoilo lino nainining Ororei lino. Taretuoki nanu matoning'u Ororei lino te sipata. Taretu sii ninche ilooiteng'eni te kanisa pee eiteng'ena enkinining'oto Ororei lino neinining oltoilo lino eimu ena kisuma. Naaomon te nkarna Olaitoriani lang Yesu Kristo. Esai.*

***Naaigeri:***

**Elimunoto:**

Neiteru olaiteng'enani ena kisuma elimu enkatini e nkiteng te rishata olameyu. Ore tenkaraki immetii ine enkare nemegira sii ninche inkujit aabulu. Ore ina kiteng nesasu oleng. Ore nabo kata, neiteru amuoyu. Ore enabayie neye. Neaku kelimu olaiteng'enani ena atini penyo te nguton te nkarriyiano enye makewan.

**Elimunoto o Laiteng'enani te nkibalakinoto:**

Ore ena kiroroto naa keipirta lelo otoiwuoki aagil are neitoki abatata neaku ninche lelo oo sasu nemuoyu neya olameyu.

Meidim oltung'ani atopuaa te nemenya endaa osesen. Ore ake teina oitoi, meidim olairukoni le Yesu Kristo atobiko te nkishui nasipa tenemenya endaa enkiyang'et. Ore anaa enanya olmurrani nkirri, neok kule pee etum osesen lenye engolon, neijia sii etiu to lairukoni, eishiaakino nanya, neok te nkiyang'et pee etum engolon nalotiedukuya tiatua Olaitoriani. Ketii nkoitoi are sidain nikindim ataasie ena: pee kidaa to Rorei Le Nkai o pee king'ar endaa o Laitoriani tenebo ilkulikai airukok tiatua eseremare. Ore taata, kimaki tenebo naipirta embae edukuya. Kaji inko iyie te nisuma arashu tinining Irorei Le Nkai ootii atua *Bibilia Sinyati*, nimbung' te sipata nadede? Eishiaakino nikimbirribir ena bae tenebo.

**Enkiteng'enare:**

Etii inkoitoy kumok naainosieki Ororei le Nkai:

Ening'oto, Enkisumata, Enkineng'oto, Enkiteng'ena, Enjurroto, Enkibung'ata, Enkibirribirrata, Enkomono, Easata, Eng'arata tenebo Elimunoto.

Ore ena kisuma naa keipirta inkoitoy are enkinosata Ororei le Nkai: ening'oto o Rorei le Nkai o enkisumata o Rorei le Nkai. Naa ena enkoitoy sidai te yiook te nikinterunyie. Ore enedukuya naa aiking'as airo enkipirta e ning'oto pee kintoki aaimaki penyoy enkipirta e nkisumata.

**Ening'oto o Rorei le Nkai****Isuma kulo Sirat:**

Ndung'eta e Rashe 4:1, Luka 11:28, 2 Timoteo 3:16

Iroma 10:17, Yohana 10:27

ENKIKILIKUANATA EDUKUYA NAIMAKINI TENEBO *(ore enkiimakinoto e kuna kikilikuanat pokira are naa pee eito dorropi. Inchoo iltung'anak aare aashu ob eishoru ewalata dorrop):*

Amaa, keidimayu pee inya ilomon nemeatae oltung'ani likigira ainining?

ENKIKILIKUANATA EARE NAIMAKINI TENEBO:

Kentoki torrono teniminining'u ina kata kigira olikae tung'ani ojo ainosie ilomon?

**Elimunoto o Laiteng'enani te nkibalakinoto:**

Naa neijia taa etiu keishiakino tenikinining lelo shoreta lang te rishata nikigria aanya ilomon. Neaku keyieu Olaitoriani nikinining ninye pee eaku ekiindim ainsa ilomon supati oipirta Yesu tenebo o ninye. Ore tiatua lelo Sirat likiisuma naa aikidol tipat sapuk oleng te yiook tenikining Ororei le Nkai. Amu ore pee mikining Irorei le Nkai, naa meidimayu katukul pee kiyiolou

Enkai te nguton. Kake ore ake pee kinining Ororei le Nkai te pooki rishata, naa kesipa oleng inchere neaku aikiindim aashom dukuya tiatua Olaitoriani.

**Isuma kulo Sirat:**

Enkigilata oo Nkitanapat 31:9-13

**Enkatini:**

Ore enedukuya naa kelimu olaiteng'enani too rorei lenyenak enkatini e Yosia eing'orua Embuku oo Nkitanapat:

Ore te rishata apa narikito Israeli ilaiguanak o larikok apa lemenyor Olaitoriani, ore iltung'anak nerikino Ororei le Nkai. Tenkaraki nemegira ainining anaake Ororei le Nkai nerikino ninche olning'o le Nkai ninche nerikino sii inkitanapat e Nkai. Negolong'aki sii ilkigerot tiatua embuku Enkigiliata oo Nkitanapat likisuma tenakata. Neaku eitu katukul eitoki aayiolou Enkai. Kake ore Olaiguan'ani Yosia naa kenyorr ninye Enkai nenyok katukul ajo ashuku eseremare eina Ai nabo. Neaku ore ina kata egirae aigil aitobir ina aji e seremare, ore ilaisiayiak netum Embuku oo Nkitanapat e Nkai. Ore pee ening Yosia olkulikae tung'anak irorei tiatua ina buku, neingasie. Amu etorikinote apa ninche Ororei le Nkai tenkaraki neitu ae kata eigil aaning too larin oata esiana.

Ore enkae neimaki olaiteng'enani enkatini kiti naaipirta orkuak loo Lmaasai: ore apa terishat naado, eton eitu ening Ilmaasai Ilomon Supati le Yesu, naa keyiolo apa inkuti naipirta Olaitobirunoni-Enkai. Naa keomon Enkai nedamu sii enkarna "Enkai." Kake ore too kulie katitin naatulusoitie, ore ilookakui o nookakui nepal eitu eitoki aaimaki inkaatini naaipirta Enkai. Ore etulusoitie ilarin kumok, etorikinishote tukul inkaatini. Neaku eitu eitoki iltung'anak ayiolou Enkai te nguton. Amu imeekure eyiolo Enkai katukul, neiteru aagelaki ate inkoitoy naasuj maate alang enasuj inkoitoy e Nkai. Ore tenkaraki natorikinishe

inkaadini naaipirta Enkai, nelau enkoitai natumie shoruetisho nasipa o Nkai.

Kake ore taata neibelekenyaki Ororei le Nkai te nkutuk oo Lmaasai peyie eaku eking nena kaatinin naaipirta Enkai nikintoki aayiolou Enkai aaigil. Emikitiu ake anaa iloo menye Yosia leitu eya ninche eirishata aainining Ororei le Nkai ore teina nerikino ninche! Ematonyok katukul aainining Ororei le Nkai te pooki rishata.

### **Elimunoto o Laiteng'enani te nkibalakinoto:**

Neaku imikindim aatoning Ororei le Nkai tiatua Bibilia meteleku teneisum likae tung'ani. Neaku emaimaki sii iyie enkipirta

#### Enkisumata o Rorei le Nkai

Ore too Lomon Supati le Yesu neikilikuanu Yesu katitin napishana inchere eimaki too Sirat Sinyat, "Keitu isumama ... ?" Nenyorraa Yesu inchere tenaa aikisum, naa keaku eikisum Bibilia.

*Inaayiolou olaiteng'enani: Misum kulo kereren terishat enkiteng'ena. Kake teneyieu likae tung'ani neyiolou teneing'orunyie kulo kereren, ore oongan le kulo kereren netumi tiatua embuku e Matayo – 12:3, 12:5; 19:4; 22:31. Na ore aare le kulo kulikae kereren netumi tiatua embuku Marko – 12:10 o 12:26. Ore kulikae netumi tiatua Luka 6:3.*

### **Isuma kulo Sirat:**

Nehemia 8:1-8

### **ENKIKILIKUANATA EUNI NAIMAKINI TENEBO:**

Kainyoo pee eeta tipat pee eisuma Esra aibalakinyie lelo Sirat iltung'anak pooki? Kainyoo pee eeta tipat te neisum Esra aibalie aitobiraki?

**Isuma ele Sirata:**

1 Timoteo 4:13

**ENKIKILIKUANATA EONG'UAN NAIMAKINI TENEBO:**

Kainyoo pee etejo olkipaaret Paulo ore enkisumata oo Sirat tedukuya iltung'anak to ltoilo sapuk naa keata tipat?

**Isuma ele Sirata:**

Embolunoto 1:3

**Elimunoto o Laiteng'enani te nkibalakinoto:**

Nejo inji aikimayiana tenaa eikisum isirat naa aikimayiana erishata pooki nikinining Ororei le Nkai. Naa aikiyiolo aajo mpaka nikipik Ororei le Nkai atua ate aashu atua iltuaja lang tenaa aaikiyieu nikpuo dukuya tiatua Olaitoriani. Neaku ore paa iyiolo aisuma, tusuja enkitanyaanyukoto e Esra isuma Ororei le Nkai pooki olong. Naa ore paa eton eitu iyiolo aisuma, ininining'o lelo rorei lo lkipaaret tiatua Embolunoto 1:3 ninyok ainining Ororei le Nkai te pooki rishata.

Ore te nkiterunoto nelo Enkai tiatua olchampa aashu enkurma e Eden neirorie iltung'anak eing'ura too purai loo nkomomi anaa enairorie oltung'ani olchore lenye. "Neirorie Olaitoriani Musa" oloiboni le Nkai "eing'ura too nkomomi anaa oltung'ani te neirorie olchore lenye," kake eturiaita lelo tung'ana epuonu aanyiku enetii Enkai neyieu oltung'ani oaku olaitutumoni.

*Inaayiolou olaiteng'enani: Misum kulo  
kererin te rishata enkiteng'ena. Kake  
teneyieu likae tung'ani eneing'orunyie kulo  
kererin, ing'urai Enaidurra 20:18-19, 33:11;  
Enkigilata oo Nkitanapat 5:23-27.*

Neaku, ore te Yesu Kristo, neton ake kirorie Enkai king'ura too nkomomi. Naa neijia etiu enkerai nanyorri eirorie papaai lenye onyor. Ore pee kining aashu kisum Isirat tiatua Bibilia, aikituu



anaa enkerai naing'or enkomom e papaai lenye ainining aitobiraki irorei le papaai lenye.

**Enchakenisho:**

SHAKENISHO E SIRIT E KRISTO NATII PUSANKI TE TRANS-MARA-SIRIA

Etareto iyiook Enkai apa pee atum ena kitii ng'eno. Aatareto nanu openy amu anoto enkiti mbuku (neji "diary" te kingeresa) nautu enkisumata e bibilia aiteru enkiterunoto olari ometabaki enkiting'oto. Amu keeta imatuan nisum tekila enkolong ebaiki tembuku Enkiterunoto - ometabaiki embuku Embolunoto tenkiting'oto olari. Ore pee isuj aisum neaku isuma "Bibilia pooki" to lari obo ake. Etareto kanisa e Pusanki oleng anaa pee kinteru aisum amu aikining Irorei kumok o nkisumaritin kumok naapashipasha nikiyiou imbaa kumok te guton. Onkaatini sidain naatareto iyiook. Naisho Enkai enashe amu empiris enye naidimie iyiook hoo negol oleng apa te nanu. Atoduaa etareto ilpayiani, intomonok tenebo sii ilbarnot o kanisa nalulung'a.

~ nanu Jonathan ole Narasha

**Inkoitoi Naasishoreki:**

Ore pee etumo kanisa aaserem te nkolong e jumapili aa taa enkolong enaapishana ewiki, aashu te kulie olong'i te wiki, neishiakino neatae oltung'ani oisum aibalie to ltoilo onyaanyukie ololtung'ani ogira alilioo neisum ina rubata e lulung'ata pookin e Bibilia. Entobira enkipang'ata sidai nining'unyenyene Bibilia pooki. Ebaiki taa neya ena olari obo aashu ilarin imiet, kake ore entoki e tipat naa ninye naisul kening ilairukok pooki Ororei le Nkai tiatua Bibilia. Nebaiki nisujusuju enkitanyaanyukoto e Pusanki.

Ore tenaa ketii oltung'ani obo to Imarei lino oyiolo aisuma, naa erishata sidai anaake ina pee eisum aibalie to ltoilo erubata e Bibilia peyie einining olmarei pooki.

Ore tenaa ketii oltung'ani obo te nkang inyi oyiolo aisuma, enoto erishata sidai tiatua ilmareita linyi te nkolong nabo te wiki neisum aibalie to ltoilo Ororei le Nkai tiatau Bibilia peyie aa ore pooki ng'ae tiatua ina ang inyi netum erishata nainining'ie Ororei le Nkai tiatua Bibilia.

Ore ake enkata ninoto erishata pee inining oltung'ani ogira aiteng'enisho enkiteng'ena nagol aashu elikioroto oo Sirat – enkiteng'ena naa kebolu katukul ematua nalulung'a e Bibilia – shomo inining'o!

Naa tenaa iyiole aisuma, intobira enduaata pee itum aisum Bibilia anaake – ore enasuja ina nindim aisuma embuku e Bibilia pooki naa ore enabayie nisum Bibilia pooki. Intobira enkipankata e nkisumata e Bibilia ino, ningerr aiteng'el nena pooki nindipa aisuma.

### **Osirata OIshiakino Nidamu:**

Iroma 10:17

### **Irorei oo Bayie:**

Ore ti America, etii osinkolio laa kenyor oleng inkere e Sunday Sukul aatarany ojo, "Isuma Bibilia ino niomon anaake, naa ibulu, ibulu, ibulu!" Emaitisipa katukul inchere ekinining aashu kisum Bibilia anaake peyie kibulu katukul tiatua enkirukoto ang nikipuo dukuya aabulu tiatua Olaitoriani.

Ore tiatua Yeremia 35:13, neikilikuan Olaitoriani iltung'anak loo Israeli enkilikuanata naa kekilikuan sii iyiook taata: "Aiming'amumu intae enkiteng'enare nimining'ining'i Irorei laainei?" Ematawal taa te sipata: "Ee, ekinining!"

**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua korrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua korrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Kaji pasa aiko tenebo ilkulikae arikok le kanisa pee kintagol ilkulikae tung'anak tiatua kanisa pee einining aashu eisum Bibilia te lulung'ata?

**Emparan:**

Ore olaiteng'enani tenebo ilkulikae arikok nepuo dukuya aikilikuanu inkikiliuanat naijo nena apa ewiki natulosoyie, eiteng'ena eneba eyiolounoto natayioloitoo ina shula Bibilia.

**Kulie Naaimakini:**

Ore pee elo olpayian ang'or entarakuwet, ebaiki neasishore enkawuo o mbaa arashu orreshet arashu orinka. Naa nena masaa o larrabal naaret olang'oroni metaara entarakuwet. Neaku kegelu ilo payian ajo kaa aret eya te rishata naje nabo anaa enalo eng'orore. Nebaiki naa ore likae tung'ani neyiolo aashu arriyia te nkawuo o mbaa, nebaiki naa ore likae naa arriyia te nang'aroto orinka. Neaku kegelu enaret nabo anaa enarayie arriyia. Ore oloyieu neibung aashu arresh intarakuweti nepik orreshet te ntim. Ore likae payian nemegira duoo ninye arretena pee elo eng'orore naa orinka duo ake eibung'ita kake ore pee einepu olturrur aashu eluata oo ntarakuweti nemut nabo ajo atem aar nabo. Mme tipat ajo kaa aret etegelu oltunga'ni aasishore. Ore ene tipat naa enareta entarakuwet pee etum inkera enyenak endaa. Keret ina aret oltung'ani metaara entarakuwet, amu kegelu katukul tenijo aibung ake duo too nkaik, kake keidim ategelu enaret nabo anaa enatonyorrayie.

Naa kesipa neijia etiu enkisumata e Bibilia. Ore pee kimbung enkipirta nikisumie Bibilia nalulung'a, mme toki ajo kaa kipankata kitusuja paa kidupore ina duaata. Ore naa toki naa pee kidupore ina duaata. Hoo naa keret iyiook enkipankata pee

kidupo aashu kitum dupoto. Amu tenimikisuj enkipankata te nkisumata e Bibilia, naa ore oshi kisum kulie matuan kake mme erishata mikisum kulie rubat. Amu ore enkipankata naa keret iyiook matayiolo enikindipa aaisuma neret iyiook matayiolo eneton kiyieu nikisum. Neaku, ekipik atua kulie kipankat naa keidim oltung'ani aashu olmarei aashu kanisa aataasishore pee eret ninche metaa keidim aisuma Bibilia nalulung'a. Eatae inkipankat kumok naidimi aataasishore, kake inkuti ake kipankat kitipika. Ore olaiteng'enani neitagol aashu eitukuj pooki tung'ani aashu olmarei aashu kanisa neitu ae kata eisum Bibilia pooki te lulungata pee egelu enkipankata aashu enduaata naisumie Bibilia te lulung'ata. Kake aisidai niyata enkipankata nabo ekuna, kake aisidai oleng teneetae enkipankata.

**Naaigeri:**

Enkiteng'ena e Miet – Enkinosata Ororei le Nkai:  
Enkibung'ata Bibilia Aitobiraki Eimu Eretoto  
Enkiyang'et Sinyati

Iutarot naaidim Olaiteng'enani atoponai te nkiteng'ena e miet:

***Enkipirta e Nkiteng'ena:***

1. Ore te nikiting'oto ena kiteng'ena, naa keyiolou ilooiteng'eni inchere ore ening'oto o enkisumata Ororei le Nkai naa ninye enchorro naata enkong'u e ng'eno.
2. Ore te nikiting'oto ena kiteng'ena, naa keyiolo ilooiteng'eni inchere Enkiyang'et e Nkai Sinyati naidim aishoo ninche eyiolounoto o Rorei le Nkai.
3. Ore te nikiting'oto ena kiteng'ena, neyiolou ilooiteng'eni inchere ore enkirukoto o enkanyit nepuonu tedukuya enkibung'ata.

***Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:***

Isaya 11:1-9

Luka 5:16

Yohana 14:15-27, 15:26-27, 16:7-15

1 Ilkorintio 2:6-16

***Enkitayunoto e kewan o Laiteng'enani:***

Ore tiatua Isaya ematua 11, neibonu Isaya elotunoto edukuya e Yesu nejo "Naa ketonie Enkiyang'et o Laitoriani shumata ninye – Enkiyang'et e ng'eno o enkarriyiano, Enkiyang'et e utaroto o enkidimata, Enkiyang'et e ng'eno o euriata o Laitoriani – ore enchipai enye naa euriata o Laitoriani." Neitoki aponaa ejo, "Nemedung ninye enkiguana too naadol nkonyek enyena, aashu edung too naaning too nkiyiaa

enyena; kake too sipat ninye eiganare laisnak, neikok ninye te mborron lelo oobor ootii enkop; naa kear ninye enkop te ng'udi e nkutuk enye, near ilo arruoni metua te nkiyang'et e nkutuk enye. Esipata ninye naaku enkimeita e mpolos enye, naa ina kisiligata naisiligayu ninye naaku enkeene narreten ninye." Ore ina kata eloito Yesu tena kop, ore inkiasin enyena neitodolu te mpukuoto enye enatiu enaibon naibonuo Isaya. Neitu eiganare Yesu anaa ilkulikae tung'ana tena naatoning'o aashu te nena naatoduaa, kake ore enataasa eing'ura iltauja loo ltung'anak neishoru olgur too laing'okok kumok nedung'oki enkiguana ilkumok laa ninche apa edamuni aajo aisul naa aisupati. Ore Yesu makewan neitodolu enatiu esupatisho o enkisiligayunoto nasipa enye tedukuya Olaitoriani, ataa ometabaiki keeya enye to salaba.

Ore eton eitu eye Yesu, neirorie Yesu ilooiteng'eni lenyenak. Nejoki ninche ore te rishata nemelakua naa kelo aing'uaa ninche. Kake kelo airriwaki ninche tenetii Papa olaretoni ilasujak lenyenak – Enkiyang'et e Sipata. Nejoki ninche, tenebo iyiook, "Te naanyor oltung'ani nanu, neanyit ororei lai, naa kenyorru Papa ninye, naa aikipuonu enetii ninye nikimany te nebo o ninye. Ore olemaanyor nanu, nemeibung irorei laainei." Ekinyor Enkai? ore enikinko pee kiyiolou aajo aikinyor Enkai, naa pee king'uraa inkiasin ang. Ekiyanyit ninye? Kebaa enkanyit nikiyanyit ninye? Ekiyanyit ninye te nkiputakinote aashu enkiti aashu enkini? Naa ina enyorrata nikinyorr ninye. Kake ore enyorrata, enyorrata nasipa, naa kebore. Naa aikiyieu nikinyorru Enkai te nkiputakinoto nikintoomon ninye te nkiputakinoto pee emany atua iyiook. Keishiakino nikingor aadol tenaa aikiata empukunoto e Kristo o Enkiyang'et e Kristo, laa imeing'uanare aashu eishakenu te nena naatoduaa ote nena naa to ning'o,

*kake laa keiguanare aashu eishakenu te risioroto e Papa lenye. Neaku keishiakino niking'or aadol tenaa aikintodolu enatiu esupatisho o enkisiligayunoto nasipa nikiyanyit Olaitoriani kigira adumu isalabani nikisuj Yesu.*

*Nejo Paulo mikiro "too rorei oolimu eng'eno e tungan'i kake too rorei ootutaka iyiook Enkiyang'et Sinyati, eimaki aibalie enkorrok Enkiyang'et." Nejo sii ajo "nejurr ninye oltung'ani le Nkiyang'et pooki toki, hoo nemeetae olojurr ninye, amu 'Ai ng'ae doi, otayiolu indamunot o Laitoriani metaa keutaa ninye?" Kake kiata endamunoto e Kristo." Ekiata endamunot o Enkiyang'et e Kristo? Kebaa enkirukoto o enkanyit nikiyanyit nena kiteng'emat e Nkai? Amaa, oshi kinguanare ilkulikae ekinguanare oshi te Nkiyang'et aashu eitenena ake naadol inkonyek ang o nena naaning inkiyiaa ang? Amaa, tenikinteng'en ilkulikae meitayu ematua e tomon aitenkaraki naa aikiyieuaki netum dupoto o mayianat e Nkai? Aashu aitenkaraki nimikiata enkirukoto niking'uar ina matua e tomon tenkaraki e dupoto ang maate? Amaa, teneas ilkulikae ing'ok, aikinguanare to rrekie le Nkai? Amaa, tenikias ing'ok, aikincho ilkulikae metarerioi iyiook nerik iyiook arriny siadi te mborron enkanyit? Amaa, tenikilikioo aashu tenikinteng'enisho, aikinteng'enisho inaaing'uaa eng'eno e tung'ani, arashu ekiomon Enkai pee eiro tiatua iyook eimu Enkiyang'et enye, tenkaraki kiyiolo aajo ore too nkorroki ang maate nimikiindim toki kake ore tiatua Yesu Kristo naa aikiindimu pooki toki?*

*Emanoto endamunoto o Enkiyang'et e Kristo! Emayanyita Enkai te lulung'ata kinguanare nikinchakenu tiatua Enkiyang'et e Nkai, kake mme te ng'eno ang e tung'anisho.*

**Enkomono:**



*Papa Enkai, te mborron kiing'or Kristo nikintoki aing'or inkorroki ang maate. Ore oshi, kelo nikinguanare anaa enikidol too nkonyet ang anaa enikining too nkiyiaa ang. Mikindolu esupatisho o enkisiligayunoto te pooki bae nikias. Mikias, ore sii iltung'anak tiatua inkanisani ang nemees. ore tiatua irishat kumok neing'or iyiook lelo leitu eiruk nedol ing'ok ang tenebo empiani nedol sii eng'eno ang nemedol katukul Enkiyang'et ino nemedol eng'eno ino, neaku ore teina neaku meyieue lyie. Ore too rishat kumok tiatua Bibilia, nisiligishore pee ibuku Enkiyang'et ino. Tubukoki Enkiyang'et ino shumata nanu nibukoki sii kanisa ino, pee eaku ore enkop pooki netum enyikakinoto ino.*

**Naaigeri:**

**Elimunoto:**

Neiteru olaiteng'enani alimu ena kisma eiteru ebaiki keraisho enye eimu enkatini. Neaku kelimu enkatini naipirta erishata apa nataasa entoki e modai amu eitu eyiolou ajo kemoda. Neaku kelimu enkipirta e nkiteng'ena aashu enkatini eing'uaa ilpayiani

lenye laa ninche ootareto ninye meiteng'enayu eng'eno tena pukunoto.

Kulie pukunoto o nkitadiat netii sii ninche inkaatini:

1. Ore enkerai kiti neing'asia te ntim openy tenebo enkguran oloo kakuyiaa lenye naitureisho eng'ues tiatua entim.
2. Negolong'u enkerai kiti agolong'aki intoiwuo enyenak tenebo enkatini onoo kokoo enye naipirta orpidilai o elashei.

**Elimunoto o Laiteng'enani te nkibalakinoto:**

Ore pee eiteru intoiwuo ang tenebo onaaiu intoiwuo ang aitung'en tedukuya inkaatini naaipirta eng'eno, nemegira aitung'en iyiook tenkaraki nikindipa aanoto eng'eno. Keiteng'en iyiook kuna atinin tenkaraki naa aikiiyieu nikitum eng'eno.

ENKIKILIKUANATA EDUKUYA NAIMAKINI TENEBO: Kaji ekio enkerai tenetum eng'eno?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Elimunoto o Laiteng'enani te nkibalakinoto:**

Ore te kulie rishat nemeyieu iltung'ana neisum aashu neining Irerei le Nkai tenkaraki kejo megira aibung. Kake mikiinos Orerei le Nkai tenkaraki nikindipa aanoto enkiputakinoto e ng'eno o enkibung'ata. Neaku ekiisum aashu kinining Orerei le Nkai pee kinteng'ena eng'eno tenebo enkibung'ata. ore iloiteng'eni te kulie rishat neelanu too nkatinin naaiteng'ena Yesu ninche. kake eton ake einining nena atinin ore adake neikilikuan Yesu enkipirta enye. Ore tiatau 2 Petero 3:16, nejo Olkipaaret Petero ajo etii kulie pala naatisira Olkipaaret Paulo natii kulie baa naagol eyiolounot.

**Isuma kulo Sirat:**

Iasat 8:26-39

**Elimunoto o Laiteng'enani te nkibalakinoto:**

Ore pee einepu Filip olapa sunash oltung'ani kitok le Etiopia eisumita irorei lo Loiboni le Nkai Isaya, neikilikuan tenaa keibung'ita nena naagira aisum. Newaliki osunash, "Kaji aiko meteleku ake tenatum oltung'ani laautaa?" Ore pee kisum irorei tiatua Ilkigerot, naa neijia sii etiu te yiook. Ekiisum irore nikinining inkaatini, kake anaa ilkipaareta le Yesu oilo sunash le Etiopia, nikijo, "Kaji aiko tenaibung ena meteleku ake tenatum oltung'ani laaitalalaiki?"

ENKIKILIKUANATA EARE NAIMAKINI TENEBO: Amaa, teneyieu enkerai neiteng'ena eng'eno nagut, aiteng'ae einining?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Elimunoto o Laiteng'enani te nkibalakinoto:**

Ore pee eyieu inkera neiteng'ena eng'eno, nemepuo enetii kulie kera aing'oru eng'eno. Kepuo enetii lelo kituaak. Netoni te mbata oo nkejek e lelo kituaak ainining inkaatini enye. Neining inkaatini kumok neining pooki atini katitin kumok. Naa ore ake pee meibung, neikilikuanu inkikilikuanat. Maakutiti, neiteru aibung enkipirta oo nkaatini netum eng'eno. Ore ake pee kiyieu nikinteng'ena eng'eno naing'uaa Enkai nikipuo enetii Enkia nikitoni too nkejek e Nkai nikinining Irorei lenyena oing'uaa Isirat. Naa ore tenikiata enkikilikuanata naipirta embae naje neitu kiibung, nikipuo enetii Enkai te nkomono nikiomon ninye meishoo iyiook eng'eno eina bae. Aing'ae olkitok alang Enkai aashu aing'ae naa ng'en alang Enkai? Ore te Yakobo 1:5 nejo, "Naa tenetii oliny otong'orikia eng'eno, inchoo ninye metoomonu te Nkai naisho iltung'ana pooki te leng'on metii enkisikong'akinoto naa keishori sii ninye."

**Isuma kulo Sirat:**

1 Ilkorintio 2:6-16

**Enkatini:**

Neaku kelimu olaiteng'enani enkatini naipirta enapukoki aashu enaasa apa te netanya eiruk enkatini naa keret ninye meiteng'enayu eng'eno. Te nkitanyaanyukoto, tenaa ketejo inchere meiruk enkguran oloo nkakuyiaa lenye enkukuu tiatua entim te nkaraki natoning'o egira aliki kakuyiaa lenye likae tung'ani ina nataasa ninye. Aashu ebaiki nejo eitu eiruk enkatini oloo kuyiaa lenye naipirta orpidilai o elashei te nkaraki ore orpidilai o elashe nemeiro, neaku kaji eiko ina kokoo olpidilai tenemayian ninye? Neaku, kebaiki neany eyanyit eng'eno naing'uaa enkatini neibaiki neing'asia tiatua entim neimin nanya olowuaru ninye. Aashu ebaiki neany eiteng'ena enkanyit orkuak sidai nelotu aaku oltung'ani le makewan loo yieunot enyenak ake nebulu to rkuak le nyorrata e kewan o erupata e kewan.

**Elimunoto o Laiteng'enani te nkibalakinoto:**

Neaku ore hoo nimikidamu oshiake, kiyiolo pooki inchere enkirukoto nang'asunye neitoki eyiolounoto. Ore inkera ang naa keisilig iyiook, neaku keiruk inkaatini ang eton eitu etum eyiolounoto. Anaa enagira aabulu netum sii enkarriyiano sapuk, ore pokira are enkirukoto o enkibung'ata nebulu tenebo ore sii teina oitoi eng'asunye enkanyit nesuju enkibung'ata. Ore pee kijoki nena kera ang enaikash te neyanyitu iyiook ata teina rishata nemeyeu neyanyitu iyiook, neaku meidim naa aanoto eyiolounoto enatiu entoki naji keikash ometaba anaa neyanyit neiteng'ena eng'ida e nkanyit. Kitoduaa pooki te yiook iltung'anak ootanyaita eiruk orkuak sidai meret ninche neaku nemitiki ina etum orkuak sidai. Neaku ninche ilamerak aashu ilapurrok neaku sii ilemaate tiatua elatia natii.

**Enkiguran:**

Ore tena kiguran, netoni iltung'anak aare tedukuya enchula to lorika. Ore oltung'ani liokuni nejing'u. Neitoomon iladuo aare ilo omoni neiteru enkirorokino. Neitoomon ninche ninye metotona to lorika. Ore olomoni neany, nejo meiruk ajo keidimu ninye ilo orika. Nejo ebaiki nebatata neitame ilo orika ninye nedol enkurruna. Nejoki ilchoreta matuutaki ninye ejo kuna tokitin anaa: "Ninye sii iyiook kigira aatonie, neitu sii ae kata kibatata" naa "olorika sii doi ele ogol oleng. Ingu'ra inkeek sidain o nkejek o lchuma?" Kake eton ake etanya eton ilo omoni. Ejo intokitin najjo kuna: "mairuk ajo ipikitata enkiroishi aatonie ilo orika" naa "ebaiki naa igrara ake aing'adede too nkejek inyilepunyie ate" naa "nebaiki naa meibooyo intae, kake imeitodolu ina ajo kaaidim aibung'a nanu" naa "mayiolo enaiko peyie eaku na kaabung nanu. Ore inkejek eilo shuma netii imurt o lorika netii inkeek empolos nemetoni inkejek, kake te nkijape ake." Nenyorra ade neton olomoni, kake eitu eton katukul aitobiraki. Neitu eibung olorika inkejek enyenak ake egira aasishore meibooi enkiroishi enye. Neaku kedolita pooki tung'ani inchere megira aton aitobiraki."

**Elimunoto o Laiteng'enani te nkibalakinoto:**

Tenikiany kiruk arashu kiany kining'u eng'eno naishooki iyiook, nimikitung naa tukul eng'eno tiatua ate. Metaa meata inchere tenikirruk tukul nikining'u pee kitum aanoto eyiolounoto eng'eno nikitang'amaitie: mikindim aibung'ie induaat ang o eng'eno ng'ejuk. Neijia sii etiu too Lkigerot. Eishiaakino katukul nikiruk nikianyit sii ata mening'unoyu. Neaku nikitum ening'unoto. Ore tiatua Ilhebrania ematua 11 nebore inkaatini arashu inkitanyaanyukot oo ltung'ana oiruko neanyit Olaitoriani. Anaata etobiko Abraham te nkop enye tenaa keitu eiruk neyanyit enkipototo e Nkai pee eing'uaa enkop. Etegelua Abraham enkirukoto neyanyit Enkai neaku etamayianaki ninye te nkerai natoiwuaki te nking'asia e nkidimata e Nkai, kake ina ishoi enye

naayetuo aadol enkitabaroto oo nkisiligat, mme ninye makewan. Ore sii te Musa eitu eidimu aton tiabori omom olaiguanani Farao le Misri, kake neyanyit enkipototo e Nkai pee erik inkera o Losho le Israel aitayu tiatua sinkaisho te nkop e Misri. Etegelua Musa pee eisilisi olaiguanani le Misri tenebo lelo kulikae tung'ana le Israel, neaku etoduaa inenking'asia e ngolon egira Enkai aitajeu olosho le Israel, kake ore sii ninye makewan neitu edol enkitabaroto e nkisiligata.

Ore anaa enatiu kulo tung'ana le nkirukoto, keyieunoyu nikimbelekenyakino Enkai te nkirukoto nabore te nkanyit, nikinturra pooki toki naitung'uaa iyiook enkirukoto oo nkanyit e Nkai. Tenikisum tiatua Bibilia entoki nimikining'u nikidol aajo eitu kinyorraa, neishiakino nikijoki Papa lang oti shumata, "Airuko, ore eneton eitu airuk, taretoki!" **Taiyolo olaiteng'eni: ing'uro Marko 9:24** Ore tiatua Enkigilata oo Nkitanapat 30, nejoki Musa iltung'ana pee eninyokino Enkai neyanyit ninye too ltauja lenye pooki ote nkishui enye. Neitoki Musa ajoki, "Nemurat Olaitoriani Enkai ino oltau lino o ltau le ishoi ino, pee etum atonyorra Olaitoirani Enkai ino e nkishui ino pooki; pee itum atopuaa" (olkerere 6). Ore sii too lkererin 19 o 20, nejo "Kaipotu nanu keper o enkop nikinchenoki intae ena olong, inchere airragie nanu tedukuya intae puaan o keeya, emayianata o ldekete, ore naa tegelu puaan, pee itum iyie o eishoi ino atobikoi, ninyorru Olaitoriani Enkai ino, nining oltoilo lenye, nimbung'are ninye. Amu Olaitoriani enkishui ino."<sup>1</sup>

### **Osirata Olshiakino Nidamu:**

Olkerempe le Nkai 119:34

---

<sup>1</sup> Ore ena kibekekenyata naa Bibilia e nkutuk oo Lmaasai eing'uaa anaa enatisaraki te nkutuk oo Lhebrania.

**Inkoitoi Naasishoreki:**

Ore pooki rishata eton eitu kisum arashu kinining Bibilia, keishiakino nikiomon ninkilikuan Enkiyang'et Sinyati metareto iyiook manoto eyiolounoto te niki sumita arashu kinining'ito Oorei.

Tenelo nikisum arashu nikining entoki naa kegol eyiolounoto, negol kinyorraa, tenkaraki nepaashan o eng'eno oo lookakui aashu eng'eno o nena kop, neishiaa nikiomon, "Airuko, ore eneton eitu airuk, taretoki!" Neaku keishiaa nikiata enkirukoto te Nkai nikianyit.

**Irorei oo Bayie:**

Nejo Ile Efeso 1:16-17, "eitu apal ... nadamu intae te nkomono ai, pee eisho intae Enkai o Laitoriani lang Yesu Kristo, iloo Papa le nkitoo Enkiyang'et nagut e ng'eno o ene mbolokinoto, pee iyiololo ninye."

Metaa siake ekinamariyie pooki tenebo Enkai, nikimbung'are enkirukoto aakuraki, o enkanyit, neijio ene Musa o Abraham naa metumurata siake Enkai isuaaten oo ltauja lang.

**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Kagirroo kulie wueji e Bibilia eitu aitengenisho tenkaraki nemaning'u ninche? Kairuko nanu nayanyit ninche naomon Enkiyang'et e Nkai maishoo eyolounoto?

Kakua kirrishat e Bibilia naagol oleng enyorrarroto? Kakua kirrishat naagilunore oleng eng'eno o lkerreti lang. Tayiolo: kuna baa oshi nayiounoyu oleng nikomonoki tiatua inchularitin ang.



**Emparan:**

Ore te mparan ena wiki ore olaiteng'enani tenebo ilkulikae aisiayiak tiatua kanisa neikilikuan ilkulikae airukok tiatua kanisa inchere kakua kirrishat tiatua Bibilia naa ninche naagol oleng enyorrantoto pee eyanyit tenebo eyiolounoto. Neikilikuan sii inchere kainyoo naisho metaa kegol oleng eiruk, neyanyit, nening'u. Ore ilo otaparanishie neiteru ang'arie enkipirta entoki tiatua Bibilia naa kegol apa oleng te ninye o enaikununo Enkiyang'et, tiatua enkirukoto o enkanyit, naa ina Kiyang'et natorikoyie ninye menoto enkibung'ata.

**Kulie Naaimakini:**

Kitolikioki oshi ae kata enkatini naipirta olalikioroni te nkop oolashumpa mme apa ninye olairritani ti ae anisa nabo ake. Kake ore teina neparan inkansani kumok ang'arie Ororei le Nkai neitagol ninche. Ore te nkolong nabo enkiyeng'iyeng'ata, neparan kanisa nabo apa naitoomonoki pee elo alikioo. Ore egira aomon te nkaraki ina nalo alikioo, nerikori ninye metolikioi ilomon otolikioyie Yesu to Idoinyo (Matayo imatuan 5, 6, o 7). Etushuma apa ninye too larin kumok ilo rorei. Neaku eitu eitoki alo aisuma kake etolikioyie ake duoo anaa apa Yesu etii enkop. Ore pee eidip atolikioi, ore obo loo payiani le kanisa neilepie enkaina enye, nejo, "Enkiteng'ena sidai oleng. Elikioroto nagol. Maidim atejo nanu kanyorraa pooki toki, kake ile nking'asia naa sidain nena kiteng'ena."

Aitiakua rishat oshi tiatua inkiteng'emat e Bibilia kinyaanyukie ele tung'ani! Naa aikijo inji aisidain inkiteng'emat, kake nikijo mikiindim atejo kitonyorratie pooki toki. Tenkaraki eitu kiimbung pooki teina kinteng'ena, neaku eitu sii kinyorraa pooki. Neaku mikiiruk nimikiyanyit sii pooki. Kake ore ake pee kitum entoki nimikining'u tiatua Bibilia. Neishiakino katukul nikiliki Enkai inchere eitu kitum ening'unoto, kake meeta inchere pee minyorra te nkirukoto ang o enkanyit ang. Amu tiatua enkirukoto ake ote nkanyit kincho Enkiyang'et e Nkai metijing'a

atua iltuaja lang, naa eimu sii Enkiyang'et e Nkai ake kitum  
eyiolounoto o enkibung'ata.

**Naaigeri:**

Enkiteng'ena e Ile - Enkinosata Ororei le Nkai:  
Enkibirribirrata: Eyioulounoto Ororei le  
Nkai te retoto e Nkiyang'et Sinyati

Iutarot naaidim Olaiteng'enani atoponai te nkiteng'ena e ile:

***Enkipirta e Nkiteng'ena:***

1. Ore te nikiting'oto ena kiteng'ena, naa keyiolou ilooiteng'eni inchere ore enkibirribirrata o Rorei le Nkai netiu anaa enkiyang'et ina nikiok pee kinchu, neaku keyieunoyu nikimbirribir pee kitum enkishui ore teina neaku e kimbirribir pooki rishata, ata ometabaiki ina kata kiasisho.
2. Ore te nikiting'oto ena kiteng'ena, naa keyiolou ilooiteng'eni inchere ore enkibirribirrata o Rorei le Nkai naa enkinining'oto o enkiroroto ino tenebo Nkai.
3. Ore te nikiting'oto ena kiteng'ena, naa keyiolou ilooiteng'eni inchere ore enkibirribirrata oo nkitengenat naagol naa keitashyie enkirukoto enye o enkanyit.

***Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:***

Enkiterunoto 1:1-31, 2:1-3

Enkigilata oo Nkitanapat 32:1-47

Yohana 1:32-34; Luka 5:16

***Enkitayunoto e kewan o Laiteng'enani:***

*"Ore apa te nkiterunoto, neitaa Enkai keper o enkop. Ore apa enkop nemeeta shoto, nemetii toki naa enaimin natii oriong o enguton, ore Enkiyang'et e Nkai nelo tioriong inkariak." Kitoduaa pookin enkoitoi emotonyi ore enedukuya neitobir enkaji oolmosor lenyena te wueji nemetii batisho neiteru apik obo neitoki olikae o*

meiputa enkaji enye oo ntaritik. Naa ore pee eiput ina motonyit ilmosor enkaji enye. Netonie ina motonyi lelo mosor lenyena airowuajie nerrip sii katukul ometaba anaa neini ina naata enkishui tiatua lelo mosor. Neliki iyiook Bibilia inchere nelo Enkiyang'et e Nkai tioriong inkariak. Neitaa Enkai ewang'an o loing'ang'e o nkaitubulu o pooki kop. Neitaa Enkai imotonyi o sinkir o mpukunot pookin oo ng'uesi. Neitobiru Enkai oltung'ani te nkitanyaanyukoto enye makewan. Ore pee eidip Enkai aitobira pooki toki nedol ajo aisida oleng. Neyeng'iyang'a Enkai.

“Amu ore erubata o Laitoriani naa iltung'ana lenyena, Yakobo ninye erubata enye najung. Enoto apa ninye to lpurkel ti ong'ata te nkop natoyio; neman ninye, neing'or ninye, negolie ninye anaa enerok e nkong'u enye. Anaa olkurragos oitobir enkaji enye, negolie nkera enyena, nelak inaipuko enyena aibung ninche, too naipuko enyena. Olaitoriani apa otorikoyie ninye openy, nemeetae apa ae ai omoni tenebo ninye.” Ore pee eidipayu enkitobirunoto, neas iltung'ana eng'oki nebatata aing'uaa Olaitoriani. Kake etegelua Olaitoriani Yakobo, olayioni lo layioni li Abraham, pee eaku menye loo loshon laa ninche oaku iltung'anak gelunot le Nkai. Neaku eitoipo Enkai olosho loo Israel te nkoitoi naitoipie emotonyi ilmosor lenyena. Kake etanyaita iltung'ana loo Israeli Olaitoriani. Meidim atanya olmosori eton tiabori ng'otonye ina kata egira ng'otunye aitoip, ejo ore enkolong o enkijape naa keirowuajie ninye. Neaku mejoki sii ninye olasurai metotonie te shumata ninye. Amu meata olasurai enkirowuaj naidim aishoo lelo mosor, kake kenya ake lelo mosor, megolie ninche. Kake “nepolosaki Israel iloiriruani.” “Neitoki ninye aing'uaa Enkai naa ninye

naitobirua ninye.” Negilunore Musa Israel ejoki,  
“nerikino intae ina Ai natoiuo intae.”

“Neishakenoki Yohana ejo, ‘Atoduaa Enkiyang’et edou anaa enturkulu eing’uaa shumata netonie shumata ninye’.” Etadou Enkiyang’et Sinyati shumata neitoip te shumata ninye, naa neijia sii etiu pee eitoip Enkiyang’et shumata inkariak te Nkiterunoto 1. Metiu anaa Israel, eitu eing’uaa Yesu Enkai. Ore pee erik Enkiyang’et e Nkai Yesu to lpurkel meshomo aitupukoo kewan neomon sii, netumore shetani ninye netem ninye pee eing’uaa Yesu Enkai netem sii tenaa keomon aashu eserem Yesu oloirriua. Kake keata ninye Yesu Ororei le Nkai te nguton tiatua oltau lenye. Eiputa atua ninye Ororei le Nkai, naa Ororei le Nkai ninye. Eitu epong’ori te ilo Rorei. Etonona ninye tenebo Enkai. Nejo Luka nchere ore oshi, “kekepari ake nelo ong’ata, aomon Enkai openy.” Nenyorraa Yesu Enkiyang’et e Nkai metotona tenebo ninye neitubulu ninye. Ore sii etii Gatsemane, etanyamala ninye oleng, netii ake ninye tenebo Enkai. Eitu eing’uaa ninye Enkai.

Ore pee kimbirribir Ororei le Nkai, nikituu anaa lelo mosor ootonie emotonyi. Neaku ekincho nikinyorraa Ororei le Nkai o Enkiyang’et e Nkai metotona te shumata iyiook neyau iyiook atua enkishui. Ore anaa enadanyuni emotonyi etiu anaa ng’otunye, ore teina etoiwuo Enkai empukunoto enye tiatua iyiook. Ore tiatua Isaya 58:2, nejo Enkai e Israeli, “Ore eyia, kaaing’oru ninche anaake, neng’ida ninche te neyiolou nkoitoo aainei, eji netiu anaa olosho oas isupati, leitu epuo aaing’uaa nkiguanat e Nkai enye; kaaikilikuan ninche nkiguanat naasipa, neng’ida ninche etaaniki Enkai.” Kake ore to lkereri 3, nejoki Enkai ninche, “ning’oru iyie murruna ino makewan.” Nelo Yesu dukuya aing’oru Enkai pooki

rishata nejoki ninye Enkai, “kake nchoo metotiwuo anaa eniyieiu iyie.” Ore tenkaraki eshomo Israeli pooki rishata dukuya aaing’uaa Enkai, ore empukunoto Enkai neitu eini tiatua ninche. Kake nejo Yesu tenkaraki kewan enye, “ore pooki laatoduaa nanu netoduaa sii Papa.” Amaa, ekira akua Israel aashu Yesu? Ore pee kinyorraa Enkiyang’et e Nkai metonona tiatua iyiook neiput iyiook aigany Ororei le Nkai, naa kedol Olaitoriani ajo aisidai oleng.

**Enkomono:**

Enkai Papa, ejo Bibilia inchere etadoikio Enkiyang’et Sinyati shumata Yesu neton tiatua ninye. Ore te kulie rishat netiu Esirit ino anaa Israel nikishomo aapaashare iyie. Aikiyieiu iyie katukul Olaitoriani. Aikiyieiu Enkiyang’et ino Sinyati. Intoipo iyiook. Tareto iyiook pee mikipuo aing’uaa iyie. Te nkarna Yesu, esai.

**Naaigeri:**

**Elimunoto:**

Eetae inkituaak uni naashomo tenebo aasotu ilkeek. Ore inkituaak are te nena negira aanya ilomon tenebo easisho tiatua entim. Kake ore enkitok euni nemegira ninye airo. Neasisho maakutiti ore te kulie rishat neitashe oleng. Naa ore ake pee ejo

inkulie pokira are matetem airorie, neaku keya neitashe neaku melo. Neiteru ayang oleng te nguton. Newal ina naikilikuanaki te siokinoto. Ore pee eidip atawala neitoki aipangipang oleng neitoki taa aiteru alo. Ore inaduo kulie pokira are neing'asia nedol anaa kentoki omoni te ninche. Kake eshomo ake dukuya aajing atua entim.

Ore pee ejing atua ina tim neiteru adungu ilkeek too lpangai lenye. Ore ina duo kulie kituaak are neyiolou inchere imegira enkae kitok aasisho anaa oshiake. Amu anaata enyaaka ayang oleng te nguton nelu dukuya adungu ilkeek. Neitoki taa aitirring'a penyo eitu eyang. Neitu katukul eipangipang ina kata egira aasisho. Amu anaata etangasa apal penyo ina siaai naasita teneyieu nengas ayang.

Ore kulie kituaak are nedol ajo ore ena bae neme enoshiake. Neiteru nena kituaak aingasia pee ejoki ina kitok kainyoo pee etapala eitu eitoki aas pooki toki duoo naasita te neaku keyieu ina kitok neuro ashu eyang. Ore pee ejoki nena kituaak ina kitok nejija. Nepal ina kitok eitu eitoki adungu ilkeek. Neyang oleng. Newaliki ninche te siokinoto, nejoki ninche, "Imaidim ataasa intokitin are nabo kata."

Neitoki ayang oleng neiteru aasisho akiti nemeng'amaa taani. Ore nena kulie kituaak are neing'ode oleng eing'asiate te rishata naado penyo neshukokino enaduo siaai naasita, kegira eipangipang neinosaa ilomon.

**Elimunoto o Laiteng'enani te nkibalakinoto:**

Kesipa aikiyang oshi anaake. Kiiyang kigira aasisho. Nikiyang kinosita endaa. Nikiyang sii kigira airura. Neaku imikiindim aatapal ina nikiasita ayang meteleku ake tenaa aikikuetita oleng oleng. Aikiro sii tiatua irishat kumok. Aikiro kiasita esiai nikiro sii kinosita endaa. Netii kulikae tung'ana laa keiro ninche aanya

ilomon eirura. Aikiindim sii aa taa aikiro kigira aas esiai. Naa ore enkibirribirrata naa kenyaanyukie katukul. Meishiakino nikipal isiaitin nikiasita aangas aabirribirr. Aikimbirribir pooki kata.

Ore pee epuonu ilchoreta lang aomon iyiook inkishu aashu enkiteng, naa aikinining enajoki iyiook. Nikiwaliki ninye te ndung'et e rashe najo, "Olaiguanani olchoni." Neshuku ilchoreta enashe neshuko aapuo ang. Kake mikijoki ninye, "Tobiko taata te nkang ai pee eaku ekigira ake aigil aikilikuan ena duo toki niyieu. Amu keaku kaidim ina kata aibirribirra ina bae nikitoomono. Amu ore pee indip atushukoyu ashomo ang nemaitoki adamu ena duo toki niyieu." Kake pee kinining ninye aaitobiraki enagira ajoki iyiook eton etii enkang ang. Neaku ore pee eidip ashomo, nikiimaki nikidamu tenebo ilmareita lang.

Naa kenyaanyuk ina o enkibirribirrata oo Lkigerot. Meyieunoyu nikisum erubata e Bibilia pooki kata kake pee kimbirribir ninye. Keyieunoyu nikiisum erubata te nguton. Paa ore kiasita isiaaitin ang, nikidamu. Nikiimaki tenebo ilmareita lang o tenebo ilchoreta. Nikiomonoki sii tenebo Enkai. Naa ina enkibirribirrata.

Aikiyiolo pooki aajo tenikiata ake enkiyang'et kiindim ayang'a. Ore pee eyieu Ilmaasai near enkine metua, naa kear aagorr eiken enkutuk onkumeishin pee meitoki enkine ayang. Amu ore pee eaku imetum enkine enkiyang'et naa keye. Ore oshiake naa ekiok nikiyang'u enkiyang'et too seseni lang. Naa aikiok sii enkiyang'et aashu enkijape sidai tiatua iseneni lang nikintoki ayang'u enkiyang'et aashu enkijape naa imeekure aa sidai katukul. Amu tenikimbung aibok enkiyang'et nabo e nena tiatua iyiook. Naa kelelek oleng pee kinterr nikiye Amu ore erropili o esidano eina kijape aashu ina kiyang'et nemebikoo oleng aasidai. Neaku naa pee kiyang'u boo ina kiyang'et musana nikisugaa atua ate enkijape aashu enkiyang'et sidai nesila.



Ore pee eked enkiteng namuoi oldoinyo, naa keiteru katukul aipang'ipang. Ore te siokinoto neaku imegol. Naa kelelek oleng eye ata duoo ninye tenaa ae biyoto, naa keked oldoinyo meeta ae nyamali. Ore teina, ore ake pee kitem aajo mayang'a te siokinoto nikilepori. Naa aikishalu ometabaiki ninye easata oo siaaitin kutiti neidim ayau emporeet matuata. Neaku keishiakino katukul nikiyang'u te lulung'ata te nguton pee kiindim aisugai katukul te nguton ina kiyang'et sidai atua ate.

Amu ore pee kimbirribir naa aikisugaa atua te nguton enkijape sidai nesila naa ninye Ororei le Nkai. Nikiyang'u boo aitupuku katukul entorroni ang o ina nyuaata ang kintashe tiatua enkomono. Ore enkibirribirrata naa enkiroroto ang tenebo Enkai naa te ninye eirorie iyiook Enkai nikinining ninye te nguton katukul. Nikirorie Enkai te nguton neinining sii ninye Enkai iyiook te nguton. Aikiyang nikisugaa, nikiyang'u nikisugaa, nikiyang'u nikisugaa. Aikinining nikiro, nikining nikiro, nikining nikiro.

#### **Isuma kuna Sirat:**

Olkerempe le Nkai 1 tenebo Olkerempe le Nkai 19

#### **Elimunoto o Laiteng'enani te nkibalakinoto:**

Ore kuna matuan are oo Lkerempe le Nkai nerany inaaipirta imayianat e nkibirribirrata o Rorei le Nkai. Nejo embuku Olkerempe le Nkai ematua edukuya nejo inji ore oltung'ani laa inkitanapat e Nkai eibirribir ninye kewarie o dama eikununo ninye anaa olchani otuunoki te mbata enkare e nchoro. Emayiani ninye te ngolon o too lganayio. Neibalunye Olkerempe le Nkai 19 inchere ore inkitanapat o Laitoriani neitopiu oltau, neiteng'en olmodai, neiting'id oltau, nepik inkonyek ewang'an, neikokieki isinkan le Nkai. Kemelok Ororei le Nkai alang enaisho oo lotorrok. Keibirribir Olaranyani Ororei le Nkai, neikilikuan ninye Enkai naitisinyaki too nkitarruorot naaisudoro tenebo ing'ok naasi aotiki.

ENKIKILIKUANATA EDUKUYA NAIMAKINI TENEBO: Kaa eas  
olpayian loo Lmaasai te nelotu olchore lenye le dede airorie te  
mbae naje nagol arashu autaa ninye?

*[Neitagol aashu eitukuj olaiteng'enani arashu olalikioroni ilkuti  
tung'ana metawala.]*

**Elimunoto o Laiteng'enani te nkibalakinoto:**

Inaayiolou o laiteng'enani: Ore te kuna limunot, neishiaakino  
neasishore olaiteng'enani inkitanyaanyukot naayawu  
ening'unoto nagut too looiteng'enu lenyena eiteng'en nena  
naalelek enkirribirat neiteng'en nena naagol enkirribirata.  
Kata sii kulie duaat, kake olaiteng'enani oyiolo ina shula enye  
oyieunot eina shula.

Ore pee kimbirribir, naa ore kulikae rorei tiatua Bibilia netiu  
anaa kelelek. Eisiligie Enkai iltung'ana lenyena pee erik ninche  
enkop naruko inaishi o kule. Neitoti Yesu iltung'ana inkalifuni  
imiet too mbelat imiet e mukate o isinkir aare. Neishiunyie Yesu  
ilmodook o lmainan o ltauoyie. Kake ore te kulie rishat naa  
ore intokitin naajo Olaitoriani naa ketiu anaa kegoli.

- \* Kaji kinko te nikintayu ematua e tomon kira aisinak?
- \* Kaji kinko tenikipaliki iltung'ana alang eniking'oro  
teneinyial iyiook?
- \* Kaji kinko tenikiaku sinyat tenejoki iyiook lelo pooki  
llikiboitare inchere ore inkoitoi Enkai naa emodai?
- \* Kaji aiko tenaidim atusuja Olaitoriani katukul te lulung'ata  
te naaraki olpayian lai matijing'a imbaa orkuak loo  
ntaleng'o?

Ketii kulie baa kumok naa kegol atua Bibilia. Keishiakino  
nikingarie Olaitoriani nena baa naatii atua iltauja lang.  
Keyieunoyu nikiliki Olaitoriani inchere ore kuna tokitin naa

kegol nikinkilikuan Olaitoriani meiteng'ena iyiook neas kuna tokitin tiatua iyiook.

**Enchakenisho:**

SHAKENISHO E KIRAMETISHO, EMUSHENI E C.M.F.

Ore apa egira olpayian lai o nanu aarretena pee kipuonu ena kop e Kenya, negirae apa aisiligu pee kipuonu olari o olpisiai eton eitu kingututunye. Ore agira aomonoki elotunoto ang, kake naajoki ninye Enkai, "Taanyu." Kake atalaikine apa ating'iria te nkaraki kagira apa adamu ajo kaidim ataasaki Enkai esiaai sapuk tenalotu asieku. Kake atayiolou inchere keiteng'en iyiook Bibilia inchere pee kingiri too nkatitin pookin, kake atoduaa apa ajo kegol oleng te nanu te najo ang'iri. Naibalie te dukuya Enkai ina nyuaata ai pee aidim ating'iria naomon Enkai maiteng'ena pee eaku kaidim ataanyu te ngiriata.

Nategelua aibirribir kulo rorei "aanyu" o "taanyu" tiatua Ilkigerot. Naing'oru tiatua Bibilia ai irubat neasishore irerei "aanyu" arashu "taanyu," naisum taa ninche te nguton oleng, neaku naisum erubata tadekenya neaku ninye adamu aasiata esiaai ai. Naa kelo te kulie rishat naisum enoshiake rubata tiatua inkolong'i uni aashu inkolong'i ong'uan. Naitoki taa atem aisum naibirribir erubata ng'ejuk. Ore agira aibirribir kuna rubat, neitadol Enkai nanu kulie baa aainei entorroni o nena sii nyuaat aainei. Naomon Olaitoriani naibalie te dukuya ninye aomon ninye pee atum enkibelekenyata. Ore sii neitodol Enkai nanu enkisiligata enye te naanyu te nkisumata e kuna rubat naaisho Olaitoriani engolon o enkirukoto naanyunyie ninye. Neibelekeny Olaitoriani empukunoto ai metaa keeta nyaanyukie Enkai. Ore te nkibirribirrata e kuna kiteng'emat tiatua nena nagira nanu aimaa netiu anaa enjing'ata olookeri le Nkai ometaba anaa nagolu katukul neaku kaidim atushukoyu ashomo elototo naado enkirrita adaari.

~ nanu, Kirametisho (Ruth enole Barron)

**Elimunoto o Laiteng'enani te nkibalakinoto: (alimu enkguran)**

Ore ena kiguran naa enkipirta oltung'ani lemeyiolo enaiko teneibirribir irorei tiatua Isirat. Keidim aisuma irorei ake, kake eitu ae kata edamu ninche te nguton aashu eirorie Enkai te nguton te nkaraki lelo Sirat. Kake eiteng'ena ninye Olaitoriani enaiko teneibirribir Ororei le Nkai.

**Enkguran:**

(Ore enkguran e nkiteng'ena eile naa keigurani tene. Naa ore irorei lena kiguran netii enkiting'oto ena kiteng'ena.)

**Elimunoto o Laiteng'enani te nkibalakinoto:**

Ore te ilo tung'ani tiatua ena kiguran, neishiakino nikinteng'ena katukul enikinko tenikimribir Ororei le Nkai. Ore tiatua 1 Samuel, neipot Olaitoriani Samuel enkarna enye eirura. Ore ake pee eyiolou Samuel ajo Olaitoriani ogira airorie ninye, nejoki Samuel, "Iroro, amu ening'ito osinka lino." Naa ena enkoitoi nanare nikimribiriele lelo Kigerot. Aajoki Olaitoriani, "Iroro, Olaitoriani, amu ening'ito osinka lino." Nikitum taa aisuma erubata nikimribir ninye. Naa ore ake pee kias ena, naa kesipa katukul neirorie iyiook Enkai.

**Osirata Olshiakino Nidamu:**

Olkerempe le Nkai 19:14

**Inkoitoi Naasishoreki:**

Ore pooki tung'ani neishiakino neisum ashu enining irorei tiatua Olkerempe le Nkai ematua 1, ematua 19, tenebo ematua 119. Ore kulo Kerempen pokira okuni naa isinkolioitin oipirta enkibrribrata Ororei le Nkai.

Ore pee kisum arashu kinining ematua oo Sirat, neishiakino nikituu anaa Samuel, nikijo, "Iroro, Olaitoriani, amu ening'ito

osinka lino.” Neaku ekiomon Olaitoriani meirorie iyiook too Kigerot neitodol iyiook enikinko tenikibulu nikimbelekenya.

Ore te lelo oonyokita tiatua inkiteng’emat o Laitoriani tiatua Ororei le Nkai neishiakino neirorie Olaitoriani te nkaraki ina nyuaata enye neingoru lelo Sirat too rubat laa keisho ninche engolon e nkidimata nayanyitie, nena rubat o Ororei le Nkai aa taa ninche ilookeri.

**Irorei oo Bayie:**

inaaing’uaa Olkerempe le Nkai 119:169-176,

Nchoo enkishirata ang elotu dukuya iyie, Olaitoriani;  
nchoo iyiook ening’unoto te risioroto o rorei lino.  
Nchoo enkomono ang elotu dukuya iyie;  
tokordu iyiook te risioroto o rorei lino.  
Meitadoo inkutukie ang enkisisa ino,  
amu kiteng’em iyiook nkiteng’emat inono.  
Erany ilng’ejepa lang ororei lino,  
amu ore inkitanapat inono pooki nesipa.  
Metataana enkaina ino pee eretu iyiook,  
amu kitegelutua iyiook nkiguanat inono.  
Kianyita iyiook oleng enjeunoto ino, Olaitoriani,  
naa nkitanapat inono naaitiship.  
Nchoo iyiook kibik kinchu, pee kesis iyie,  
naa nchoo nkiguanat inono metaretu iyiook.  
Kishomo iyiook aapong’ori anaa inkerra naaimina.  
Ing’oru isinkan linono,  
amu eitu kirikino inkitanapat inono.

**Naaigeri:**

---

**Enkiguran:** (Ing'uru *Matayo* 6:9-13)

**Enkiguran e “Nkomono o Laitoriani”**

Eatae iltung'ana aare tena kiguran.

Olaiguranani le dukuya: oloomon

Olaiguran iare: oltoilo le Nkai (nemedoli kake ening'i ake)

*TAIYOLO: Ore pooki matua olkererin oo Sirat tena kiguran naa enikiuataa ake te wueji neing'uaa lelo Sirat kake imme pee iisum Bibibila terishata enkiguran.*

*Ore oloiteru naa oloomon ajo “enkomono o Laitoriani”*

**Oloomon** “Papa lang . . . ”

**Enkai** Ooo?

*Negira oloomon, elioo ajo etanyamala, neiteru aigil ajo enkomono o Laitoriani.*

**Oloomon** “Papa lang otii shumata, . . . ”

**Enkai** Ee? Kimpoto.

**Oloomon** Tigirayu! Kagira ajo enkomono ai.

*[negirai penyoy]*

**Oloomon** Kaji naaji atabaikia? ... “Papa lang, otii . . . ”

**Enkai** Kaaning'ito.

**Oloomon** Mikintoki aitanyamal nanu. Amu anyokita aomon.

**Enkai** Atejo naa kagira ainining.

**Oloomon** Mayieue nayiolou tenaa ekigira ainining. Tigirayu ake iyie.

*Neilepunye oltau ilo ogira aomon, neitoki ajo arashu aomon.*

**Oloomon** “Papa lang . . . ”

- Enkai** Ee, kinyaaka taa aipot . . .
- Oloomon** Eitu nanu aipot. kagira airorie Enkai. Aira doi ninye ng'ae, amu edung ilomon ilkulikae?
- Enkai** **KARA** Papa linyi otii shumata.
- Oloomon** Oi! Aitarruoyie. ... Kake ore eyia inining'oki naa.
- Enkai** Ayia, shomo dukuya.
- Oloomon** *"Papa lang, otii shumata, meitisinyi enkarna ino."*
- Enkai** Kainyoo doi elimu ina nijoito?
- Oloomon** Mayiolo. Kagira alimu inchere erubata ena omono ake ina, emesipa? Amu ing'as ajo *"Papa lang otii shumata"* nintoki ajo taa *"meitisinyi enkarna ino."*
- Neitoki taa Enkai aikilikuanishore oloomon aigiligil*
- Enkai** Kake kainyioo doi igira ajo arashu alimu?
- Oloomon** Mayiolo. . . . Kainyioo agira ajo arashu alimu??
- Enkai** Kelimu sinyatisho. Kelimu tipat naata. Kelimu inchere ekiyanyit nikintaa oloata tipat oleng. Kelimu inchere iyiolo ilo lara te iyie anaa Papa lino otii shumata.
- Oloomon** Oi, ayia. . . . kalo dukuya, *"meeu enkitoria ino, metaasi eniyieu te nkop anaa enatiu te shumata."*
- Enkai** Kesipa ina nitejo te iyie?
- Oloomon** Ee pae.
- Enkai** Paa kainyioo naa pee mias ina?
- Oloomon** Aas aa?

- Enkai** Eyieunoto ai.
- Oloomon** Kainyioo doi igira ajo?
- Enkai** Amaa, iyieu doi eyieunoto ai neasi te nkop? Iyieu iyie neas iltung'ana ina nayieu nanu neas?
- Oloomon** Kesipa . . . Kajo naaji nanu peyie epal iltung'ana eokoto enaisho nepal elototo o loibonok.
- Enkai** Enkiterunoto ake ina. Oo iyie?
- Oloomon** Kainyioo igira ajo?
- Enkai** Ore ake peyie iyieu "neitisinyi" enkarna ai neasi sii eyieunoto ai tiatua enkishui ino, neaku meeta nchere peyie menyaanyukie orkuak lino olalai osinya naa asipani sii. Amaa sa tening'orr ilkulikae te nguton orkuak lino kepuonu sa enatii?
- Oloomon** Neaku keishiakino naaku sinyati anaa enira sii iyie sinyati.

*(Ilawi 11:44-45, 19:2)*

- Enkai** Kesipa, maa mindim ataa sinyati meteleku ake tenias nena naitiship nanu. Neaku amaa tesipata iyieu eyieunoto ai neasiayu te nkishui ino? Ekindim aishoo maitoria?
- Oloomon** Aisidai, ee.
- Enkai** Kake oo enkitanapata ai "Tonyorra olelatia ino"?  
*(Ilroma 13:8-10; Ilawi 19:18; Matayo 22:39; Marko 12:3; Luka 10:27-37; Ilgalatia 5:14; Yacobo 2:8)*

*Neshirraki aany*

- Oloomon** Ninye natiu aja?
- Enkai** "Tonyorra ole latia ino" naa keipirta pee inyorru enkitok ino anaa eninyorr kewan. Keitodolu pee iyanyitu enkitok ino niret sii. Keipirtapee inyorru



inkera inono, nirerioo te nyorrata alang tenintame ake ninche arashu indong tenkaraki eng'oro. Keipirta sii pee enyorru enkitok inkainito enyena, nenyorr olpayian oata nkituak kumok ninche pooki nemeeta enkirotet nemeata entinki. "Tonyorra ole latia ino" naa pee iramat Olkokoyoi, Osamburri, Olturkanai o Somaliai te nkoitai naaji niramatie Olmaasani. Keipirta sii pee iramat inkera o elelero o nkituaak anaa enaikunita tenaaramat nanu iyie ara Enkai.

*Neng'as Oloomon aitirring'a eitu eitoki alo dukuya*

**Oloomon** Na Ai?

**Enkai** Ayia?

**Oloomon** Kake ore irishat natareto enkitok ai aorr emuatata oo ntare eidipa atasha arashu tenaret aoku enkare najoki ilkulikae lewa peyie apal.

**Enkai** Ekijoki aa Ororei lai – ilkigerot tenebo Enkerai ai Inoti Yesu Kristo? Aikijoki ninche inchere ore oloyieu neaku kitok inchoo ninye eaku oloti te pooki naa ore sii oloyieu neaku olarikoni inchoo eaku ninye olaisiayiani, ata ometabaiki tiatua ilmareita linyi. Keitu doi eton ninye Yesu tiatua intae anaa olaisiayiani?

*(Luka 22.26-27)*

**Oloomon** Kake amaa kenare tenaitagorr ilchoreta laainei?

**Enkai** Ore osalaba naa enkitagoroto. Ata olchore lai apa likinyikakino oleng Petero naisikong'a peyie ajoki inchere kaye tenkaraki iyie.

*(1 Ilkorintia 1:18-23; Mattehwa 16:21-22;*

*Marko 8:31-32*

**Oloomon** Ainyiala. ... eitu ninye naaji adamu ina. Ketii mbaa kumok autua ena omono.

~ 100 ~

*Neitoki Oloomon aitorring'a te nkiti rishat eton eitu eitoki Olaitoriani aitagol Oloomon meshomo dukuya.*

**Enkai** Aisidai, shomo dukuya.

**Oloomon** Ayia. ... *"Inchoo iyiook ena olong endaa ang e anaake."*

**Enkai** Ntasho sii iyie penyo. Kaata imbaa are tene. Amaa, kesipa iata osiligi te nanu inchere kaisho entoki niyieu? Amaa osiligi lino kaatua inkishu arashu enchan etii arashu atua nanu? Amu ore te sokoni naa inyok oshi amirr inkishu inono too ropiyiani sidain, ninyiang'u endaa too ropiyiani kuti. Kake, "ore imotonyi o loing'ang'e meunisho neimeikesisho" nemepuo enkirritare "kake kaitoti ninche." Aimiata intae tipat aalang niche? Iata osiligi inchere ore oshi anaake naa kaaitoti? Amaa Ekisilig oleng anaa enkindim arashu indim naaji aishoo ematua e tomon?

*(Matayo 6:19-24)*

**Oloomon** Enkiteng'ena nagol ena. Amaa keitu kimayian too masaa peyie aidim aitotio olmarei lai? Naa ore amu ore intokitin pooki natii enkop naa nkuninono, kainyioo pee iyieu ematua e tomon te nanu? Naa amaa ilaisinak, Aime ilaisinak ake amu kegolong'u te iyie? Kainyioo doi ematua e tomon?

**Enkai** Ore too laisnak Neme iyie ogel tenaa aisupati arashu mme supati. Tegela tenaa ira iyie supat enkorrok ino. Amu miaku aekata supat meteleku tenipik osiligi lino atua nanu. Ntoduaki osiligi liata te nanu, naa kaaboloki ilusien e shumata.

*(Matayo 7:1-5; Luka 6:37-42; Malaki 3:8-10)*

**Oloomon** Kadol ajo kaas arashu kanyok oshi te ngolon makewan aas intokitin. "Airuko, ore eneton eitu airuk taretokoki!"

(Marko 9:23-24)

**Enkai** Ore pee kiomon nanu te nkirukoto, ore te nkaraki ina naisho "metii enkisikong'akinoto."

Kake amaa, ishupa ake iyie teneaku itum ina nimputie enkoshoke ino ake arashu ina Osesen ake? Iya oshi erishata anya Ororei lai? Inining oshi ninye irorei otii atua Bibilia tiatua oltau lino? Amaa, ingaring'ara oshi ninye osesen arashu endaa olaitoriani nikiserem sii to sesen lai, te sirit, te ina oitoi oshi niokie shaai tenebo ilo le latia ino? Amaa inya oshi ororei lai tenebo ilchoreta linono, o olmarei lino teina oitoi oshi ninyayie inkiri tenebo o ninche?

Idamu sii esumash ninoto arashu nitum teipa, tenilo shoo enkolong pooki airritisho naa enkikompe e shaai nabo ake itooko? Naa amaa, iyiolou doi ninye enkolong nishomo eitu inya arashu iok ororei lai? Ore enkiyang'et ino neyieu eimisie, arashu eishu olameyu, enaa eyieu ibaiki keeya! Kake amaa koree esumash ino te nanu?

(Yakobo 1:5; Matayo 5:6; Psalm 42:1-2)

**Oloomon** Oi, kadol taa ninye inchere matum eng'olon nalotie tenalototo meteleku ake te nanya endaa osesen o endaa enkiyang'et.

(1 Ilaiguanak 19:7)

Intasho sii iyie . . . *"Inchoo iyiook ena olong endaa ang e anaake. Nipalaki iyiook isilen ang, anaa ti nikipalaki iyiook ilooata isilen ang."*

**Enkai** Intasho sii penyo. Kesipa iyieu napaliki te nkoitoo oshi nipalikinyie ilkulikae? Anaa ijo itanya oshi

ipaliki iyie Menye Sompeta ometaba ning'as anaa aarare ninye? Iyieu nang'as nanu aarare iyie, eton eitu apaliki nanu iyie? Aashu idamu enyamali ino tenebo Menye Sereti? Eitu intayu osotua tenebo ninye ometaba anaa nikipuonu ilpayiani kituak aaraki ninye nikitropa aisho inkishu tomon.

**Oloomon** Kake kainyiala ninye nanu! Kaji aiko tenapaliki nanu ninye mme katalaaka toki?

**Enkai** Ata ninye naaji tenikincho iyie inkishu inono pooki, meidip ake nena pee itum enkordunoto te nanu. Keya enkishui ino. Ina doi iyieu? Ore empalikinoto naa keipirta inchere, neatai ae sile nilak. Keipirta inchere etalaa Yesu isilen pooki tialo iyie.

**Oloomon** Neaku keishiakino tenapaliki pooki ng'ae teina oitoi, niyieu nikipalikinnye sii iyie nanu?

*(Ile Efeso 4:32; Ilkolosae 3:13)*

**Enkai** Kesipa. Kaata imbaa are nayieu naimaki tenebo o yie ti alo ena bae. Amaa, idamu enkitanyaanyukoto nainosua Yesu naipirta osinka apa lemeyieu napaliki olikai? Ore pee mipaliki ilkulikae nemaapaliki sii nanu iyie.

*(Matayo 6:14-15; Marko 11:25-26; Matayo 18:21-31)*

Amaa, iataa esipata inchere iyieu nikipalikini? Ore kulie rishat naa ishupa oleng teniton ake ira olaing'okoni.

**Oloomon** Kake mara olaing'okoni! Eitu aekata enya inkishu arashu intare aainei olokeri lelikae tung'ani, naa kaata sii oshi enkanyit too lpayiani kituak, neitu sii aarr inkanyiti. Tootiki inkilikuanishore Olmaasani ake litum naa ekiliki olkuaak lai ajo esidai. Kake ore etii ina, meekure alo oloiboni, naa tenamuratisho

arashu anya intaleng'o naa soda ainyang'u, mamuk inaishi.

## **Enkai**

Kake mme kaipoto pee iaku ake oltung'ani lo rkuak sidai, kake pee iaku oltung'ani oing'oru oltau lai. Kaipotito pee iaku sinyati anaa enara nanu sinyati, niaku bayaroti anaa enara sii nanu bayaroti.

*(Matayo 5:48; Ilawi 19:2; Enkigilata oo Nkitanapat 18:3; 1 Petero 1:15; 1 Samuel 13:14; Iasat 13:22)*

Amaa inining oshi ororei lai teneisumai Bibilia te rishata eseremare te kanisa? Amaa igira aiteng'ena olkuaak lai arashu enaikunono pee itiu anaa nanu? Amaa idamu arashu imbirribirr oshi ororei lai itii shoo arashu iokito shaai tenebo olmarei lino arashu ilchoreta linono? Ore ake pee iyieu nilo dukuya Olaitoriani, neaku mira ake olairukoni, kake iyaku oloiteng'eni otubulua. Amu ore oloiteng'eni otubulua netiu anaa oloiteng'ena lenye. Itotiwuo anaa nanu taata?

*(Luka 6:40)*

Idamu apa ira enkiti ayioni? Iyieu apa nitu anaa Papai lino. Ing'ura apa pooki naas ninye, pee itumoki aitamaaya ninye niaku taa ina kata olee loo Lmaasai. Amaa iruk ajo kara Papai lino otii keper? Neaku toinyuaa ilepunyie enkipirta ino. Ing'uraki nanu, taasa nena naasita, pee itumoki ataa oltung'ani le Nkai.

Idamu pee aibalakinyie Musa enkarna ai? Toning'o, "Olaitoriani, Olaitoriani, Enkai o lng'ur o empiris nemesioki agoro, nebore enyorrata nauno enkisiligata neibung enyorrata nauno too ltung'ana iip tomon, epalaki entorrone, o enkitarruoroto o eng'oki." Kake meitodolu ina inchere kapal pooki otonyorrarayie ing'ok enyena eitu etum enkitamioto

amu kara naa doi asipani. Kake to lng'ur le nyorrata aishorua Enkerai ai Inoti meisilisili te nkaraki ing'ok oo ltung'ana pooki.

**Oloomon** Kesipa kepi ororei lino alang olalem opi inchot pokira are: etaremo oltau lai oleng too mbaa inono nirem enkoshoke ai teremet.

*(Ilhebrania 4:12-13)*

Igira abol inkonyek aainei taata. Atadamua inchere keidip ake teniaku oltung'ani supat, najoito oshi inchere ilairritak ake, olpayiani le kanisa eishiaakino neaku sinyat anaa iyie. Kake atoduaa taata inchere keishiakino naaku likae too olkuaak. Ore inkoitoi oshi naasishore, inkiasin aainei, ore ndamunot, nemeitoriori tedukuya iyie. Kayieu taa ninye empalikinoto.

Kaibalie inchere kayieu naibeleyen enkishui ai o nkiasin aainei. Atoduaa ina taat. Ainosunye teina pi. Taretuoki naa maibeleyenayau, Papa Enkai, ekiretu?

**Enkai** Kesipa, kaaretu. Ore kitii tenebo naa aikindim aibeleyenya enkishui ino. Neaku kitoning'okinote taa ena. Oo naaji enkae toki nikimpoto? Indim iyie atapaliki ilkulikae?

**Oloomon** Kaibalie inchere kayieu empalikinoto too mbaa kumok nataasa. Neaku kanyok taata apaliki ilkulikae tung'ana pee kitumoki sii iyie atapaliki, nanu.

Kapaliki ninye likae otupurroyie enkiteng ai det arashu olapa otulusoyie.

**Enkai** Igira taa tenakata aning'u ororei lai!!! Shomo dukuya te nkomono ino.

**Oloomon** *"Nimirik iyiook atua intemat, kake intajeu iyiook tiatua ilo torrano."*

**Enkai** Intasho penyo. Kainyoo ijoito “Nimirik iyiook atua intemat”? Kayieu naarik aitalam intemat, kake miyieu nikisuju.

Iyiolo ajo etii, ilewa oopuo inkang’itie olkulikae teneyiolou ake aajo metii ilopeny inkang’itie. Kake ore anaa niaku olkristiano, nitapala iyie nena. Kake eton ake ilo ainining inkirorot e lelo tung’ana lemaanyorr nanu ata tenaa ketii kanisa. Ninining lelo likijoki iyama inkituaak kumok, o lelo likijoki miret enkitok ino oleng alang tenikinining Nanu o Rorei lai.

Mme ina ake, kake item oshi arashu iyaki ilkulikae intemat! Item inkera inono mikiteleja amu miata empalikinoto te ninche. Intame oshi ninche te ngoro alang tenirere anaa entoiwuoi naanyorr ninche.

Ore nena baa nemeitisiny Enkarna lai.

*Neitoki Enkai abukoki olkilikuai metadoi alo atua oltau pee eitoki alo dukuya.*

Maatem ae kata iyie, Enkerai ai, kake kitanya iyie kining nanu. Kake kesesh ore pee inyamalu nikikuetiki nanu aing’oru eretoto. Aime sidai naaji tening’asu te nkilanyata oo ntemat pee itum ayeu enatii?

**Oloomon** Atoning’o enitejo. Atoduaa eneikununo intemat maate. Neaku kayeu nagelu ajo kalo pul laanyorr.

**Enkai** Kesipa. keyieu sii niya erishata aboitare enkitok ino, amu keret intae pokira are elanya intemat. Elanya intemat, naa kamitu intae te ilo torrano oyau intemat.

*(1 Ilkorintio 10:13)*

**Oloomon** Kesipa ina? Enking'asia! ... Papa lang otii shumata?

**Enkai** Ee pae?

**Oloomon** Eitu aekata ayiolou inchere inji etiu enkomono – inchere aanya ilomon o iyie. *“Metaa enino enkitoo, o engolon o enkitoria, intarasi. ESAI.”*

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?



Ore pee aibirribir lelo Kigerot, kagira ainining pee aning enaiko Olaitoriani te naairorie nanu? Kaji eiko Enkai teneyieu nabulu nanu naibeleyenya? Kaibirribira kulo Sirat tena nkipirta?

Ore anaa kanisa, emaa ekinchoo Enkai meimulumula iyiook, pee eiteng'en iyiook neibeleyeniyiook? Kaji eiko Enkai pee eipot Esirit e Kristo metubulu te nkanyit ote ngolon?

### **Emparan:**

Ore te mparan tena wiki, ore olaiteng'enani tenebo olkulikae aisiaayiak le Sirit naa pee eret ilkulikae tung'anak tiatua Esirit meing'oru Ilkigerot too matuan laa keidim aataret neitagol ninche tenen wuejitin neeshalie. Neme nena matuan ake oo nkitanapat, kake nena matuan sii ninche naaipirta shakenisho o Laitoriani oe nkisiligayunoto e Nkai o mayiaanat e nkanyit tenen wuejitin neeshiakino. Ore te utaroto e Bibilia o eyiolounoto nagut naipirta Bibilia na keret katukul olaiteng'enani tenebo ilkulikae aisiyaak te kuna.

### **Mbaa Naaponaro Naaimakini:**

Olkerempe le Nkai 119 naa osinkolio oipirta enkibirribirrata oo nkitanapat o Laitoriani, naa ore tiatua ninye naa aikiteng'ena enikino tenikimbirribir.

1. Ore pee kimbirribir, naa enking'oru pee kiyiolou Enkai aitobiraki.

Nejo olkereri le 57 ometabaiki 58, "Olaitoriani ninye erubata ai; atonyorrayie nanu inchere kaibung nkitanapat inono. Ore to ltau lai pooki atonyuaa nanu aing'oru omom ino; ng'urrieki nanu te risioroto e nkisiligata ino."

2. Ore pee kimbirribir, naa eking'oru pee kiyioluo inkisiligat e Nkai te yiook.

Nejo olkereri le 162 tenebo o le 165, "Ashipakino nanu ororei lino, anaa oltung'ani otum imasaa kumok."

“Eeta eseriani kitok lelo oonyor enkitanapata ino; meetae entoki narror ninye.”

3. Ore pee kimbirribir, naa eking’oru pee kiyiolou nkinapat e Nkai te yiook.  
Nejo olkereri le 24 tenebo o le 68, “Enchakenisho ino naaitiship nanu, ninche naaiguan nanu aautaa.” “Ira iyie supat nias isupati, nteng’enaki nanu nkoitoi inono.”
4. Ore pee kimbirribir, naa keaku ekigira aajurr ate, aineneng, nikinkilikuan sii ninye Enkai pee ejurr iyiook aineneng.  
Nejo olkereri le 59 tenebo o le 133, “Te nadamu nanu inkoitoi inono, naibelekeny iroruat aainei aipirie enchakenisho ino.” “Ntiring’ie iroruat aainei te risioroto e nkisiligata ino, nimincho entorroni maatoria nanu.”
5. Ore pee kimbirribir, neaku aikishiapakino te nkisikong’at o Laitoriani.  
Nejo olkereri le 67 tenebo o le 75, “Ore apa eton eitu aaitamei natapong’ori nanu; kake aibung’a taata ororei lino.” “Ayiolo nanu, Olaitoriani, inchere inkitanapat inono naasipa, nayiolo inchere te sipata iyie kintamio nanu.”
6. Ore pee kimbirribir, naa aikinkilikuan Enkai metareto iyiook maibelekenyata aing’uaa ing’ok.  
Nejo olkereri le 29 tenebo o le 36, “Ntalamaki nanu nkoitoi e lejare; ore te mpiris ino nteng’enaki nanu nkitanapat inono!” “Ntonyorra oltau lai enchakenisho ino, nimintonyor dupoto enkurruna.”
7. Ore pee kimbirribir, naa aiking’oru eutaroto e Nkai tiatua iltuaja lang.

Nejo olkereri le 105 tenebo o le 128, “Ore ororei lino naa oltaa loo nkejek aainei naa ewang’an te nkoitai ai.”  
“Ore enkaraki ina aiturubare nanu iroruat aainei nkiguanat inono pooki; aiba nanu pooki oitai torrono.”

8. Ore pee kimbirribir, aikingor’u pee kinyikinyiku Enkai.  
Nejo olkereri le 151 tenebo o le 176, “Kake itaana iyie, Olaitoriani, nesipa nkitanapat inono pooki.” “Ashomo nanu apong’ori anaa enker naimina; ing’oru osinka lino, amu maarikino nanu inkitanapat inono.”
9. Ore pee kimbirribir, naa aikiilany aing’uaa lelo oo ngolong’aki e Nkai, nikiaku ilchoreta o lelo oirukurukore Enkai.  
Nejo olkereri le 63 tenebo o le 115, “Ara nanu ole ncholuek e lelo likiure iyie, ole lelo ooibung nkitanapat inono.” “Entalamaki nanu intae ilarruok, pee atum aibung’a nkitanapat e Nkai ai.”
10. Ore pee kimbirribir, naa ekintayu ate nkayit nikintamoo sii te nkanyit.  
Nejo olkereri le 44 tenebo o le 56, “Kaibung nanu nkitanapat inono anaake, ntarasi o ntarasi.” “Aatadoikio nanu ena mayianata, inchere aibung’a nanu nkitanapat inono.”
11. Ore pee kimbirribir, naa aikiimpot Enkai meeu aret iyiook too ngolikinot.  
Nejo olkereri le 81 tenebo o le 94, “Etalepori oltau lai eyieu enjeunoto ino; ororei lino nanu aisiligita.” “Ara nanu olino, ntajeuoki; amu aing’orua nanu nkiteng’emat inono.”
12. Ore pee kimbirribir, naa aikincho Enkai enkisisa.  
Nejo olkereri le 108 tenebo o le 164, “Tang’amu nkishoorot aainei e nkisisa, Olaitoriani, nikinteng’en nanu inkitanapat inono.” “Katitin naapishana nanu

aasis iyie te nkolong te nkaraki inkitanapat inono  
naasipa.”

**Naaigeri:**

Enkiteng'ena e Naapishana – Enkinosata Ororei Le Nkai: Enkibung'ata Ororei le Nkai tiatua indamunot inonok

(Nipik Irorei le Nkai atua oltau lino inchere adamu lelo Rorei pooki rishata.)

Iutarot naaidim Olaiteng'enani atoponai te nkiteng'ena e naapishana:

***Enkipirta e Nkiteng'ena:***

1. *Ore te niking'oto ena kiteng'ena, neyiolou ilooiteng'eni aashu edamu aajo keishiakino nepik Ororei le Nkai te nguton atua iltauja lenye.*
2. *Ore te niking'oto ena kiteng'ena, neaku keidim ilooiteng'eni aatolimu eretoto natareto Ororei le Nkai ometaa keidim aanoto egelunoto e pooki bae tenepik Ororei le Nkai atua iltauja lenye.*
3. *Ore te niking'oto ena kiteng'ena, neaku keitayu ate ilooiteng'eni aibung nedamu Ororei le Nkai tiatua iltauja lenye.*

***Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:***

Olkerempe le Nkai 119:9-16

Ilhebrania 4:12; Ile Efeso 6:17; Matayo 4:1-11

Ilkolosai 4:6

***Enkitayunoto e kewan o Laiteng'enani:***

*Ore ina kata ake pee eidipi aibatisa Yesu, neilepie ninye Enkiyang'et meshomo ong'ata. Neomon ninye neitupukoo kewan tiatua inkolong'i artam kewarie o dama. Eitayio ninye kewan katukul pee edol enayieu*

Enkai. Ore pee elusoo ina rishata, neiteru ninye esumash. Amaa, kebaa erishata nitobiko iyie eitu inya endaa? Amaa pee ipukoo iyie itoomonuo iyie endaa? Naa neijia etiu sii ninye Yesu. Eidimua apa esumash ninye ometashala. Naa teina shalan apa naata eyewuoo Shetani arasaki ninye. Nejoki "imbelekenya kulo soito metaa imukateni. Amu, emiata esumash? Naa aiyata sii enkidimata nias pooki toki anaa eniyieu, imiata?" Neijia taa etiu intemat. Ketii oshiake kulikae to loishi laa aikining eiro nejo matelej iyiook pee kijo ime eng'oki, ebaiki ninye neme entoki torrongo. Kake keyieu nikidamu aajo ore elejare naa entemata. Naa ore enkoittoi ake nikimirie elejare e Shetani naa esipata. Naa ore Irorei le Nkai naa irorei le sipata. Neaku newaliki Yesu ajoki Shetani, itejo, "Kaata esumash? Etisipa ina. Kake kesipa sii inchere eitu eitobiru Enkai iltung'ani pee eaku keishu ake te ndaa osesen ake. Ore endaa e nkiyang'et tiatua iltuaja lang naa ninye nasipa, amu ore inkiyang'eta ang naa Enkai eing'uaa. Neaku eata endaa e nkiyang'et tipat alang endaa o sesen. Ore iseseni lang neitobiruaki te nterit. Neaku aikinchu sii tenkaraki pooki Rorei eimu e nkutuk Enkai." Naa lelo Sirat apa egira Yesu aasishore ina kata etemita ninye Shetani. Neasishore Yesu Ilkigerot naatawalikitia enkilikuanata naikilikuana entemata.

Ore kulie temat are nesuju enyaanyukie ena. Ore Yesu naa Enkerai Inoti Nabo e Nkai, naa keyieunoyu te yiook iltung'anak pee kiyiolou ena niking'oru enjeunoto tiatua Yesu. Neaku nejoki Shetani ninye, "Kainyoo pee minteru erishata ino enkisiyaiare anyorraa pooki tung'ani, aiteru te nkiterunoto, aitodolu inchere ira Enkerai Inoto Nabo e Nkai nintodolu inenking'asia e ngolon? Naa aikinyorra iyie pooki tung'ani nikiruk aiteru te nkiterunoto, ore esiaai ino neleleku." Kake enkoittoi e Nkai naa keitoriori naa ronkai, imme lala

nemelelek. Neaku keeta apa Yesu ewalata naing'uaa atua Bibilia inchere: "Mikitem ae kata iyiook Olaitoriani Enkai ang." Enaikash pee kianyu Olaitoriani nikisiai ninye pee eesa eyieunoto enye tiatua iltauja lang. Ore te ntemata euni, neikilikuan Shetani Yesu, "Ing'ura, iyieu pooki ng'ae neshukokino Enkai, nemesipa? Ore enakop pooki netii tiabori enkitoria ai. Neaku kaisho iyie enkoitoi nalelek pee itum pooki toki niyieu. Naa pee kigilaki kung aserem, enkata nabo ake, pee aisho iyie pooki tung'ana oyeiu." Kake eitu eimutie Yesu kake ore nabo kata naasishore Olalem le Nkiyang'et, nejo "Shomo Shetani amu, etisiraki aajo, 'Teserema Olaitoriani Enkai ino naa ninye ake openy isiaai'."

Neaku ore anaa enatiu te Yesu, naa neijia etiu te yiook. Ore Ororei le Nkai naa keata engolon naitajeunye iyiook tiatua intemat pooki. Kake keishiakino nikiyioou Ororei le Nkai te nkitoriokinoto aitobiraki.

**Enkomono:**

Papa Olaitoriani lai, taretuoki pee aidim aisudo i Ororei lino tiatua oltua lai pee maas ake eitorroni tialo iyie. Intamooki nanu pee ayiolou Ororei lino oleng oleng anaake peyie aidim atasishore Ororei lino te nkitoriokinoto peyie aidim aitishipa iyie. Neaku ore inkirorot aainei tiatua irishat pooki netiu anaa "natipikaki emunyan." Ore ilotot aainei neaku enkiteng'ena e ngolon naa kaidim aiteng'enishore. Naa tiatua enkarna Yesu Kristo, atoomono. Esai.

**Naaigeri:**

**Elimunoto – Enkatini:**

Ore etii ilpayiani okuni loo Lmaasai. Neeta pooki ilalema. Neaku ore olpayian ledukuya naa oltung'ani ogol neitu apa ninye eureyu ae toki. Tenkaraki kegol oleng nepi, nepal enapata olalem lenye. Neisudoo te wueji sidai, aisudoo tiatua enkaji enye. Ore tenkolong nabo nelu ilo payian entim aing'oru enkiteng naimina. Neitu eya olalem lenye. Kake ore eton eitu etum enaduo kiteng, neinepu olowuaru keru ninye. Hoo negol neata ilpirankashi, ore tenkaraki immeata apa olalem neidimu ninye olowuaru nyena.

Ore olikae payian liare naa aing'en alang oladuo payian oinosa olowuaru keru. Hoo duo negol oleng nepi sii ninye, naa keen oshiake olalem lenye anaake. Hoo neitu easishore anaa enayieunoyu. Neitu ae kata eel. Ore pee eshalu enchashurr enye, neitu elo metoyio. Ore te nkolong nabo, neimin enkerr enye nabo kirotet nanyorr oleng tiatua entim. Ore eton eitu elo aing'oru ina kerr, neingor nenyorra inchere ketii olalem lenye atua enchashur tenebo enkeene enye olalem. Ore nabo kata netum enkerr enye nereuu ina kata ake meeyeu enkang enye. Kake ore eton eitu eitupuku tiatua entim, neinepu eng'antuny lipong nayieu apa nyena ina kerr enye. Ore tenkaraki naata olalem lenye, neaku eitu ekuretu ilo payian. Kake ore pee ejo atem ashutu olalem te nchashurr enye, nelaikino amu kerrish! Mme sidai enchashurr ore olalem neinosa endoron aashu kutu. Nebung katukul enchashurr olalem te ngolon. Ore egira anyok ajo ashutu enaret enye, nebau elipong eng'atuny near pokira metuata enkerr tenebo olpayian.

Ore olpayian liokuni naa aing'en alang pooki. Ore anaake neii inkiiyiot olalem lenye anaake neel sii eton eitu epik atua enchashurr. Neaku ore anaake tedekanya neitisip inchere kelolong olalem tiatua enchashurr pee eaku keshutunoyu te siokinoto enkata nabo anaa enayieu. Neitu ae kata eing'uaa enkaji enye merripo neata ake olalem te nkeene enye makewan. Ore te rishata nabo to lameyu, egira aing'oru enkiteng naimina.



Neterretene apa ninye te pooki nyamali naba anaa enatum ninye. Netum enyamali! Ore pee eidip anoto ina kiteng enye naimina, neibung ninye olnɡ'atuny sapuk oleng laa eitu ae kata edoli! Ore tenkaraki ina goro natang'ore ninye, neshutu nabo kata olalem lenye neibung ilo ng'atuny. Hoo duoo nemenapita apa elongo enye aashu eremet enye, kake etaasishore olalem lenye amitu kewan tenkaraki naitamoo kewan anaake netum enkariyiano sapuk. Ore ina kata egira aarare olnɡ'atuny, ore ilchoreta lenyanak duo aare oboitare te ntim nening enkurbal olarrabal neketu eeta iremeta enye aaretu ninye. Ore pee etumo tenebo near olowuaru metua.

ENKIKILIKUANATA EDUKUYA NAIMAKINI TENEBO: Kainyoo peyie eeta tipat tenikigolie ilalema lang?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Isuma kulo Kigerot:**

Ilhebrania 4:12

Ile Efeso 6:17

**Elimunoto o Laiteng'enani te nkibalakinoto:**

Ore Ororei le Nkai netiu anaa olalem laa ninye orrip iyiook. Kake ore tenimikiyiolo enikinko tenikiasishore aashu tenikinap ninye tiatua iltuaja lang nemeret iyiook katukul.

ENKIKILIKUANATA EARE NAIMAKINI TENEBO: Kaji kinko pee kinap Ororei le Nkai tiatua irishat? Kaji kinko pee kimbung ele "Lalem le Nkiyang'et" tenikintipij nikiyel nikirreten aarreten pee kiasishore?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Elimunoto o Laiteng'enani te nkibalakinoto:**

Keidimayu inchere enkiindim aibung'a Ororei le Nkai tiatua ilukuny ang napik lelo Rorei ootii atua Bibilia atua iltauja lang peyie eaku ekidamu ninche anaake. Kejo taa ena atiu anaa kegol tedukuya, kake ore ake paa ore Irorei le Nkai naa atua embuku ake etii netiu anaa ilo alam leilo payian oisuduro tiatua enkaji nanya ilo tung'ani olowuaru keru aashu ilo alem otalaikine ilo payian atushutu tiatua enchashurr nanya sii ninye ilo payian ina lipong olng'atuny.

**Isuma kulo Ilkigerot:**

Olkerempe le Nkai 119:11-16

**Elimunoto o Laiteng'enani te nkibalakinoto:**

Neaku idol ajo ore Ororei le Nkai naa keret iyiook katukul! Neaku emainining'o nikimbung ilo Rorei le Nkai laa ninye loo Sirat Sinyat laa ketareto ate Yesu makewan.

**Isuma ele Sirata:**

Luka 4:1-13

ENKIKILIKUANATA EUNI NAIMAKINI TENEBO: Kaji ekunaka Yesu pee easishore Irorei tiatua Bibilia netum emirishoi namirie intemat?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Enkiteng'enare:**

Ore ina kata pee etem Shetani Yesu ti ong'ata, neidima katukul airisha pooki temata eimu endamunoto e Yesu eimu Isirat tiatua Bibilia. Naa entoki nanyaanyukie naa neijia etiu te yiook kesipa. Ore Ororei le Nkai netiu anaa inareta te yiook aashu imasaa o larrabal, etiu anaa olalem, eremet, enkawuo o mbaa, enangarato orinka, o encharkaka tenebo eng'udi. Nikiasishore pooki aaret te

nkipirta enye makewan. Naa neijia etiu kishiakino nikinap iruburubat kumok e Bibilia tiatua iltuaja lang. Amu ore Isirat opaashipaasha naa keret iyiook tiatua iwuejitin nepaashipaasha. Entadamu inchere ore pee erish Yesu Shetani easishore Irorei le Nkai, neipirri ailany ninye. Kake keliki iyiook Luka tiatua olkereri le tomon o olkuni inchere aing'uaa Shetani ake mpaka "eanyu ae rishata enye." Naa keitodolu ina inchere kegira apa aanyu ae rishata pee eshukunye ae toki aigil atem ninye. Neaku keyiunoyu nikintisip inchere kiterretenata to Lalem le Nkiyang'et te pooki rishat.

Neiteng'en yiook Petero nejo, "Enterretenata anaake pee iwalikiki oltung'ani pooki oikilikuan intae olbae to siligi otii atua intae" (1 Petero 3:15). Naa neijia etiu te yiook, naa keishiakino sii ninche iyiook nikirretena pee kilimu inaaishiakino nikigelu pee kias nena naayieu Yesu nikias alang enikias ing'ok. Naa ena etaasa Yesu makewan. Neliki iyiook Bibilia inchere "Erisha oloirirua, naa keipirri ninye ailany intae" (Yakobo 4:7). Pooki ake kiindim airisha oloirirua tenikitiu anaa oladuo payian liokuni oibung'a aitobiraki neasishore olalem lenye. Ore eyiolounoto Ororei le Nkai netiu anaa teniata olalem opi niyiolo sii ataasishore.

Ore Olalem le Nkiyang'et Sinyati naa keret iyiook mairisha nena temat. Naa keret sii iyiook matang'ar lelo Omon Supati oopirta Yesu tenebo olelo leitu eiruk. Keidimie sii iyiook pee kincho enkikoo e Nkai lelo kulikae airukok. Te Ilkososai 4:6, nejo "Enchoo kirorot inyi inkatitin pooki eaku ine mborron naata emunyan pee itumutumu aatayiolo enijojo teniwalikiki pooki ng'ae." Ore ake pee kipik Ororei le Nkai atua iltuaja lang, neaku ekiindim ayanyita ena kitanapata. Na ore Olalem le Nkiyang'et keibalie ing'ok tiatua oltau. Ore enaisul te pooki, keisho iyiook enkirukoto nikinyikakinyie enetii Enkai. Kake imeret iyiook meteleku ake tenikiyiolo Irorei le Nkai tiauta iltuaja lang. Ebaiki

nidamu ajo imindim aibung'a Irorei le Bibilia? Ayia, inining'o kuna shakenisho are.

**Inchakeni are:**

**e dukuya:** Ore apa oleng eatae olpayian oji Didumas naa modooni naa olairukoni ogol tiatua Olaitoriani. Ore tenkaraki aimodooni ninye, eitu ae kata eiteng'ena enaiko teneisuma. Kake keyiolo oleng ainining'o. Neisulaki ina kata egira likae tung'ani aisum Ororei le Nkai tiatua Bibilia. Ore enaolu ina, neaku keibung pooki rubata o Rorei le Nkai tiatua Bibilia, aiteru te Nkiterunoto ometabaiki Embolunoto! Neyiolo Bibilia aitobiraki alang likae tung'ani pooki tiatua kanisa otiatua ina murua te lungata. Ore teina neitaa ninye olaiteng'enani le tipat neitaae olautaroni loo lairukok o tenebo o wuejitin neeiteng'enishorei tena kop.

~ nanu, Lemayian Joshua ole Barron, naisho ena shakenisho

**iare:** Anaa oltung'ani loo Lmaasai oji Emanuel ole Moronko otii kanisa e Kawai aimodooni pii kake eibung'a Irorei Le Nkai te lukunya neaku keret oshi kanisa tenkaraki etoning'uo Irorei le Nkai te rishata naado neibung alang oltung'ani oisume anaa olodol aisuma Bibilia. Ketum oshi erishata sidai naretie iltung'ana le kanisa otoontumoritin netareto ilkulikae metayiolo ajo sidai tinibung Ororei le Nkai te lukunya ino.

~ nanu, Jonathan ole Narasha, naisho ena shakenisho

**Elimunoto o Laiteng'enani te nkibalakinoto:**

Amaa tenaa ore kulo payiani aare naa keidim aibung'a lelo Sirat Sinyat le Nkai, o naa iyiook!

## **Enkiguran:**

**Tolimu ena kiguran te kulo rorei:**

Nejo inji Olkipaaret Petero, “emanimanaa olmang’atinta linyi, shetani, anaa olng’atuny, oikirrukurur eing’oru olonya. Erisha ninye te nkirukoto nauno” (1 Petero 5:8-9).

Ilaigurak 1, 2, 3 & 4: iltung’anak oong’uan. Keidimayu ilpayiani arashu inkituaak arashu ilbarnot arashu imbarnot, pokira ong’uan.

Ore tena kiguran neyieunoyu iltung’anak oong’uan. Ore obo lenye neyieunoyu neaku olng’atuny. Nerinakini orkarasha aita enkisiau aashu indim ake atoliki iloitenteng’eni eton eitu eiteru enkiguran inchere “olng’atuny ele.” Netem olng’atuny lelo tung’anak pokira okuni. Ore iltung’anak aare ledukuya newaliki olng’atuny easishore Isirat tiatua Bibilia. Ore tenkaraki ena, nekuet olng’atuny aig’uaa te nkuretisho. Neitoki enetii olikae tung’ani liare. Ore ilo tung’ani laa ninye obayie neitu eidim atawaliki olng’atuny tiatua Irorei le Bibilia. Nanya ilo ng’atuny ilo tung’ani.

Etii ene kulie kitanyaanyukot oo nkikilikuanat tenebo ewalata naa indim ataasishore. Ore kulie shularitin naa paashipaasha naagira onyok tiatua imbaa naapaashipaasha neaku taasishore enkitanyaanyukoto naa ninye naisul eret kanisa ino. Aisidai sii teniasishore enkitanyaanyukoto ino makewan aashu ebaiki nimiyieu niasishore ena katukul! Iata elakunoto pee iyasishore embata e kuna kitaanyaayukot ang tenebo o kulie niata, sii iyie. Tonyuaa toduaa ajo igira asishore inkikilikuanat tenebo ilkererin tiatua Bibilia laa keimaki ina bae natii atua ina shula ino. Ore lelo Rorei le Bibilia neata ewalata naishiakino ina kikilikuanata. Naa teniasishore inkitanyaanyukot inonok, tadamu inchere ore pee eidip ainsa oltung’ani obayie, nelimu olng’atuny ewalata elelo Sirat laa ninche duo omitu ilo tung’ani pee menya olng’atuny!

Ore lelo oing'urana neishiakino netum enkitamooto ena kiguran eton eitu eitodolu.

EETAI ENKITANYAANYUKOTO NABO ENA KIGURAN:

**Olng'atuny:** "Anaata ilo nibaiki ina kitok naji Naserian te nkang enye ... amu kelakua olupayan lenye te nkop nalakua."

**Oltung'ani 1:**

"Kake ejo Olaitoriani, 'Miloloito,' naa ore enkipirta eina naa pee miboitare ake likae tung'ani leme ilo likiyama. Naa ina naa enkitanapata e tipat oleng, amu Enkai etejo tiatua Enaidurra 20:14 neitoki aigil tiatua Enkigilata oo Nkitanapat 5:18."

*Neilany olng'atuny aing'uaa ele airukoni ledukuya neing'oru olikae tung'ani.*

**Olng'atuny:** "Aidipa atayiolo inchere inoto enkitok nikinyorr tiatua oltau lenye pooki nikitoikio ninye ilayiok aare tenebo intoyie are. Kake amaa, itoduaa ajo kebaa intare o nkishu o nkineji niata tenakata? Naa ore tele ari seur olotu olo Enkai ashaiki enkop, ore ina kata iluat inono eramatare nepiru pooki. Niaku orkarsis. Nimijo iyie intoki ayam ae kitok pee eyiolou pooki ng'ae inchere ira iyie karsis?"

**Oltung'ani 2:** "Emiyiolo enkatini orkasis omoda? Tiatua Luka 12:15-21 naa inji ejo: 'Neitoki ajoki Yesu ninche, "Entodol ake ate, entodol ate to lng'uarra; amu ore enkishui neme nkumoi oo masaa naata." Neitoki aliki enkitanyaanyukoto, nejoki, "Eetae apa olkarsis neisho enkurma enye oleng, nejoki kewan enye, 'Kaa taa aas, amu maata enapik endaa ai?' Nejo, 'Inji aiko, kaar impenchen aainei nashetu naalala nalang kuna; pee ashumie endaa ai o masaa aainei. Naa kajoki oltau lai, "lo tau! iata masaa kumok nikitushumakaki too larin kumok; isikarrayu taadayu niokisho nishipa". Kake nejoki Enkai, 'Lo modai! Ena kewarie kiyieki oltau lino; paa omanaa nena tokitin ninteng'ela keaku

pasa nkuneng'ae ninche?' Neijia etiu oloshumaki kewan imassa neme karsis tialo Enkai".' Naa ena etejo Yesu tiatua Matayo 6:21, "Amu ore enetii masaa inono kiroteti, naa ine eyooki atii oltau lino'."

**Olng'atuny:** Neaku mintoki ayau ae kitok tenkaraki iaku karsis. Kake amaa, itayiolo Nashipai teina ang nikitashare? Naa aisidai ninye oleng. Iyama ninye tenkaraki naa aisidai ninye oleng naa keidim katukul pee kincho ninye tishipakinoyu osesen lenye.

**Oltung'ani 2:** "Kake ejo Bibilia too Le Efeso 5:25, 'Lo payiani, entonyor inkituaak inyi, anaa enatonyorra Kristo Esirit neishooyo kewan te nkaraki ninye,' neibalie katukul aitodolu ina to lkereri 33: 'nchoo ake pooki ng'ae linyi enyorru enkitok enye anaa kewan.' Neaku imayieu enkitok ai neitoki ayam likae payian liare, neaku tenaa naa kanyor ninye te dede, naa kaas enajo Bibilia tiatua Enkiterunoto 2:24, Matayo 19:5; Marko 10:7-8, tenebo sii Ile Efeso 5:31. 'Ore enkaraki ena eing'uaa olee menye o ng'otungye neibung'are enkitok enye, neaku ninche pokira are osesen obo.' Maijoito keaku uni nabo aashu eaku ong'uan nabo aashu imiet aashu ile aaku nabo. Inji ejo aare ooku nabo: anaa olupayan obo ake o enkitok nabo ake naa aisidai. Amaa, kalo dukuya alimu enajo tiatua Ndung'eta e Rashe tenebo Malaki?"

*Nekuet olng'atuny oleng aing'uaa ilo airukoni! Neitoki, nelo netum olikae.*

**Olng'atuny:** "Kayiolo ishupa tenebo enkitok ino. Iyiolo ajo kejo Bibilia inchere 'Miloloito.' Iyiolo sii ajo ore tiatua Malaki 2:14-15 inchere ejo Enkai keiba oleng tenegil oltung'ani olning'o le nkiyama aaku ole meisiligayu te nkitok enye edukuya. Kake iyiolo sii inchere keatai Narreshisho, nemaya ninye enda ang, naa aisidai ninye oleng. Ekisipa idim nilo doi niparan ina ang alo ake duo aok shaai ning'asiakino ninye?"

**Oltung'ani 3:** “Kesipa. Ore ake nanu metaa imaboitare ninye te mboita, neaku inchere kaing'or ake ninye too nkonyek aainei, nemeetae naa enyamali teina!”

*Neipidoki olng'atuny ilo tung'ani liokuni ninya ninye. (Nena ng'ari olkarasha duoo aata ilo tung'ani oinosaki.) Neing'or olng'atuny pooki tung'ani duo ogira aing'or ina kiguran.*

**Olng'atuny:** “Kaa daa sidai. Ha, ha, ha! Ekashipa oleng amu eitu eyiolo elde airukoni inchere ara tiatua Matayo 5:28 nejo Yesu, ‘Kake ajoki nanu intae, ore oloing'or eng'oruoi neng'uar eidipa atololoito to ltau lenye.’ Amu tenaa ketadamua ina, anaata etaasa anaa enetaasa ilo tung'ani supat oji Yoab. Ore tiatua Yoab 31:1 nejo inji, “Aitobirua olning'o too nkonyek aainei pee maitoki ang'uarr eselenkei.” Kake eton ake aata esumash. Aing'ae aitoki anya?”

NOONA KULIE DUAAT NAAIDIMAYU NEASA TENA KIGURAN:

**iare (2): Intemat oo masaa nikiata:**

***aing'uaa kanisa teniaku karsis.***

*Isirat Oogeluno:* Matayo 6:19-21, Luka 12:15-21,  
Yakobo 1:9-11

***aaibung nena masaa ang maate alang enikitayu  
ematua e tomon.***

*Isirat Oogeluno:* Malaki 3:10, Enkigilata oo Nkitanapat 26:12,  
Yakobo 2:14-17



**e uni (3): Intemat naaipirta engoro:**

*Isirat oogeluno tenkaraki pooki entemata naipirta engoro:  
Ile Efeso 4:32, Ilkolosai 3:12-13, Enaidurra 34:6*

***aatakinore oltung'ani likinyala iyie.***

*Isirat Oogeluno: Matayo 5:22, Ndung'eta e Rashe 17:9, 10:12,  
Ile Efeso 4:31-32, 1 Petero 4:8, Matayo 18:21-35*

***airo irorei le ngoro irorie olpayiani lino.***

*Isirat Oogeluno: Ndung'eta e Rashe 15:1, Yakobo 1:19-20,  
1 Timoteo 5:1-2*

***aar inkerana inonok alang eninteng'en ninche  
te nkitamooto e nyorrata.***

*Isirat Oogeluno: Ile Efeso 6:4, Ilkolosai 3:21*

*(eidimayu neasishore olng'atuny ele sirata aibeleyen:  
Ndung'eta e Rashe 13:24)*

*endung'et e rashe to rkuak loo Lmaasai:  
anaa enetejo Ilmaasai, "mikiar eitu kirorie"*

**Elimunoto o Laiteng'enani te nkibalakinoto:**

Ore anaa eninkiasishore imasaa ang olarrabal naa paashipaasha tiatua inkoitoi naapaashipaasha, neaku ore sii ninche ilkererin kumok paashipaasha lo Rorei le Nkai tiatua Bibilia naa keret iyiook tiatua inkoitoi kumok naa paashipaasha. Aikiyiolo ajo kelotu Enkiyang'et Sinyati aaku Olaretoni lang, neaku ore pee kiyau dukuya Ororei le Nkai naa keret iyiook tenena natii atua iltuaja lang aisudori. Kake amaa tenaa ore lelo Sirat likiyiolo naa kulo ake "Ore apa te nkiterunoto, neitaa Enkai keper o enkop" (Enkiterunoto 1:1) aashu ebaiki naa kulo "Amu etonyorra Enkai enkop aiko inji omeishoru enkerai enye nabo paa ore pooki ng'ae oiruk nemeimin kake netum enkishui nemeish (Yohana 3:16), meeta Enkiyang'et Sinyati imasaa kumok olarrabal naisho iyiook! Kesipa ore lelo Sirat indung'ot pokira naa kesipa neretisho naa

sidain, kake mme Isirat oidim aataret obo loo laduo tung'anak tena duo kiguran ina kata pee elotu oln'atuny atem ninche.

**Osirata Oishiakino Nidamu:**

Olkerempe le Nkai 119:11

**Inkoitoi Naasishoreki:**

Imbung'a lelo Rorei le Nkai! Tipika ninche atua oltau lino peyie eaku indim atadamu ninche inkatitin pooki. Ore pee eas ena, naa keaku idamu aitamok kewan telimunoto. Amu teninteng'ena ninche te nkolong nabo, kake eitu intamok kewan ailimunye to ltoilo, naa ketiu ninche anaa olalem oinosa endoron aashu kutu laa ore pee ishitu tiatua enchashurr nemepuku – neaku eji eton ake eata lelo Sirat tipat, kake kegol oleng pee indim ataasishore!

Neaku interu te nkisiligata imbung'a "Isirat Oishiakino Nidamu" tiatua kuna kisumaritin.

Ing'oru ilkererin la aikiret iyie ang'arie ilkulikae eimu enkirukoto ino nimbung ninche.

Naa ore pee ining Isirat laa kitareto iyie inkiteng'emat enyena, imbung'a ninche.

Ore tena ketii intemat oshi nigira aarare aimaa, ing'oru Isirat laa aikiret iyie pee itum emirishoi, nimbung lelo Sirat.

Inaayiolo olaiteng'enan: Ore te nkiting'oto ena buku oo nkiteng'emat, ketii iutunot oo Sirat naipankaki anaa te risioto e nkisuma. Ore anaa ena, keret iltung'anak ooyieu neiteru esiaai e nkisosata Oorei le Nkai tialo enkibung'ata oo lkererin linterunye.

**Irorei oo Bayie:**

Emaisisa pooki Enkai tenkaraki esupatisho o esidano eilo Rorei lenye!

*Ebaa enyorrata nanyor nanu nkitanapat inono!*

*Ninye nanu aibirribir endama pooki.*

*Enkiteng'enata ino naaiteng'en nanu matalang'a ilmang'ati laainei,*

*amu etii te nebo nanu nkatitin pooki.*

*Aata nanu eyiolounoto alang ilaiteng'enak lainei pooki,*

*amu enchaenisho ino ninye nanu aibirribir.*

*Ayiolo nanu mbaa oleng alang oltung'ani moruo,*

*amu aibung'ita nanu nkitanapat inono.*

*Narishie nanu nkejek aainei pooki oitooi torrongo,*

*pee itum aibung'a ororei lino.*

*Maibelekenya nanu apaash nkitanapat inono,*

*amu kinteng'ena iyie nanu.*

*Kemelok oleng irorei linono te nainyorrinyor,*

*kemelok aalang enaisho o lootorrok te nkutuk ai!*

*Ore too nkitanapat inono natum nanu eyiolounoto;*

*ore enkaraki ina kaiba nanu pooki oitooi torrongo.*

*(Olkerempe le Nkai 119:97-104)*

**Naaigeri:**

---

**Enjurroto:**

**Inkilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Kaidim pasa makewan aibung'a Isirat? Kaata pasa shakenisho naidim aang'arie ilkulikae enatiu ena kitamooto teretoto naatareto metaa kaidim ashomo dukuya tiatua Olaitoriani?

**Emparan:**

Inkilikuana iltung'ana te naa keibunga Isirit tiatua ena kiteng'ena. Neaku etii enkiteng'enaritin naapishana tene. Keibung'a lelo Sirat oopishana? Ore iyie olaiteng'enani naa pee imbung lelo

Sirat pooki makewan arashu tenkorrok ino. Neaku, teneitu eiteng'ena ninche, tareto ninche meibung'a aashu aapik atua ilukuny lelo Sirat. Tadamu inchere ore ilairukok kumok nemeidim aaisumaki ate Bibilia. Neaku tareto ninche oleng nintagol ninche pee eidim aatipik Irorei le Nkai atua iltuaja lenye.

**Mbaa Naaponaro Naaimakini:**

Tiatua Enkigilata oo Nkitanapat 6:6-9 nejo, "Ore kulo rorei laaitanap nanu iyie ena olong nchoo ejing oltau lino; nilo iyie aunoki aiteng'en nkera inono, nimaki kulo omon teniton tiatua enkaji ino, o tenilo te nkoitoi, o tenirrag, o tenidumunye. Niyeniki ninche enkaina ino metaa olmonekie, netiu ninche anaa nkishiliaa te rishata oo nkonyek inyi. Nisir ninche too mbokishi e kutukaji e nkaji ino o too ntaloishin e kishomi." Naa ore enkoitoi naisul te niyantitie kuna kitanapat o Laitoriani naa tenimbung ake Ororie le Nkai tiatua Bibilia Sinyati. Itipika Irorei le Nkai atua oltau lino? Amaa, igira aibirribir ilo Rorei limbunga too wuejitin pooki naaba anaa enilo, ometabaiki itii atua emutukaa, ometabaiki itii shoo airrita inkishu inonok?

Ore tiatua Matayo 13:52, neiteng'en iyiook Yesu, ejo, "Enkaraki ina, ore pooki aiteng'enani loo nkitanapat ng'en te nkitoria e shumata, netiu anaa oltung'ani openy enkaji oitayu te nkaji enye nashumishoreki olchumati lenye, ing'ejuko o musan." Neaku enyor nemeyiolo oltung'ani aisuma aashu aigerisho. Ekiindim pooki aigero Ororei le Nkai tiatua iltauja lang, amu ore enkipirta eilo Rorei nenyanyuk te yiook pooki. Nikintoki aigil aashukokino aaisum ina naigero. Neaku teina enkinapita ina Buku o Rorei le Nkai tiatua iltauja lang too rishat pooki. Naa tenikias ena, neaku keleleku "kinteng'en inkera ang aaitobiraki" anaake. Naa keaku orkuak likimoku kirorie pooki ng'ae too Rorei le Nkai. Naa aikiyiolo aajo ore Ororei le Nkai naa keeta engolon. Amaa, iyie neaku iata engolon tiatua oltau lino naa keaku ekiret iyie anaa enigira anyok asuj orrekie le Nkai? Imbung'a naa Irorei le Nkai nipik ninche atua oltau lino!

**Naaigeri:**

Enkiteng'ena e Isiet – Enkinosata Ororei le Nkai:  
Enjurroto Ororei le Nkai

Iutarot naaidim Olaiteng'enani atoponai te nkiteng'ena isiet:

***Enkipirta e Nkiteng'ena:***

1. Ore te niking'oto ena kiteng'ena, neyiolou ilooiteng'eni tipat e njurroto Ororei le Nkai.
2. Ore te niking'oto ena kiteng'ena, neyiolou ilooiteng'eni inchere kinkikilikuan “kejo aa” naa “kainyoo enkipirta” eton eitu kinteng'ena “naa kaa aas.”

***Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:***

Esra 7:10

***Enkitayunoto e kewan o Laiteng'enani:***

Ore apa Esra naa obo lolapolosak le Nkai. Olaiteng'enani sii apa ninye loo nkitanapat e Nkai. Eisiaisho apa te nkitoria olaiguanani le Parsia, kake eishoo olaiguanani metushukoyu enkop olomenye. Ore ninye tenebo kulikae arikok lejuo Nehemia, neiteng'en iltung'ana le Israel metushukokinoto enkoitoi e Nkai anaa enajo olning'o sinyati.

Matujurr ele kereri te nguton pee kitum atayiolo enkitanyaanyukoto e Esra nikisuj iyiook maate. Eitu apa egelu Esra pee eiteng'enisho te nkolong nabo. Kake kejo aa? “Amu etipika Esra oltua lenye pee eiteng'enuo.” Kijo eitayio Esra kewan te lulung'ata neitamok sii kewan. Neitu eeku enepesho enyuaata enye. Kake etipika ninye oltau lenye “pee eiteng'enuo.” Naa kainyoo eiteng'ene ninye?

Eiteng'ene ninye Ororei le Nkai, inkitanapat o Laitoriani.

Kainyoo pee “etipika Esra oltau lenye pee eiteng'enuo enkitanapata o Laitoriani”? Eiteng'enuo Esra Ororei le Nkai nejurr pee eyiolou ataasa. Ena nayieunoyu te yiook pooki inchere enjurroto Ororei le Nkai pee kindim aataas. Eisikong'a iyiook Yesu, ejoki “Ainyoo pee kijojo, ‘Olaitoriani, Olaitoriani,’ nimiaasiasa enajoki intae?” (Luka 6:46). Etayiolo apa Esra inchere tenikiaas Ororei le Nkai naa ina kata ake eidim Ororei le Nkai atareto iyiook. Etayiolo sii apa Esra inchere keishiakino pee eyiolou enkipirta eilo Rorei eton eitu eyiolou enaas te nkanyit eilo Rorei. Neaku ore enedukuya eiteng'ene, neitoki aas anaake Ororei le Nkai ilo laa ninye eiteng'ene. Neaku teina kata taa eidima ninye aiteng'ena ilkulikae Orei le Nkai. Matushukokinoto aajurr. Ore enedukuya eitayio Esra kewan tukul neitamok sii kewan pee eiteng'enuo. Ore eniare, etujurro ninye Ororei le Nkai. Ore eneuni, etaasa anaake anaa enajo Ororei le Nkai; etaasa enatejo Enkai to Rorei lenye. Teina kata taa, eidipa ataasa kuna pokira uni, eidima ninye aiteng'ena ilkulikae.

**Enkomono:**

*Papa Enkai, taretuoki nanu matusuja enkitanyaanyuko e Esra. Teretuoki nanu pee aidim aitayu kewan atujurro Ororei lino naas anaa enajo Ororei lino. “Ntayloroki nanu nkoitoi inono, Olaitoriani; nteng'enaki nanu inkoitoi inono. Torikoki nanu ti atua esipata ino, nikinteng'en nanu, amu ira iyie Enkai e njeunoto ai; amu iyie nanu aanyita endama pooki.” (Olkerempe le Nkai 25:4-5).*

**Naaigeri:**





### **Elimunoto – Enkiguran:**

(Ore lelo oiguran neasishore irorei lenye.)

Olaiguran 1: Oipayian loo Lmaasai oterretene pee eiteru enkikarrata enkang ng’ejuk

Ilkulikae aiguranak: ilchoreta arashu ilelatia (aa taa ilpayiani arashu inkituaak) naikilikuanishore ele payian.

*Neitamanyu oipayian loo Lmaasai enkang teine netonyorrayie, nejo inkirorot anaa kuna “ore orripie lai ene ejing ... ore enkaji enkitok ai naa idie aapik ... naa ine ejing olale loo ilkuoo ... ore olale loo lasho naa kapik idie ...”. Kake ore anaa enikining’u eloito enkiguran dukuya, etegelua ninye ewueji torrongo naisheitie enkang ng’ejuk.*

*Ore ilkulikae aiguranak neitodolu enaishiakino, kake ore elde payian neitayu inkitolonyat. ore tenejokini keya enkaji enkare tenesha, newal ejo, ina kata metoki enkitok enye alo aoku enkare tenelakua. Tenejokini sii inchere ore tenetoyu enkop naa ore enchorro enkare nataana naa inkilomitani tikitam, newal ajo ina kata imeya enkaji enye enkare tenelo nenang’unye. Etiakaki sii aitorrok inkujit, eine naa kelakua ilkeek, naa neijia etiu sii nkeek*

*naasheitie enkaji. Kake ore te pooki rishata, nerriny olpayian ewalata, neany elo ajurr ewueji neishiakino naa sidai tenepik enkang.*

**Elimunoto o Laiteng'enani te nkibalakinoto:**

Te neaku eterretene olee ejo pee eshet enkang ng'ejuk, ore enedukuya eishiaakino nejurr enkop pee eing'or oleng ajo etadua ewueji sidai. Etii inkikilikuanat nawal oltung'ani teneyieu ewuiji sidai. Ketii nkujit? Kebaa elakuani enkare? Keya enkare ewuiji tenelo nesha? Amaa, tenetoyu enkop ketoyu enchorro enkare nataana? Ketaaniki ewueji nkeek? Ketaana entim naikarrishoreki arashu nashetishoreki? O kulie kikilikuanat naanyaanyukie kuna. Keishiaa neleen oltung'ani aasipu oleng te pooki shoto pee ejurr enkop tenaa sidai arashu torrongo. Anaa enajo Olmaasani te ndung'et e rashe, "mamoda amu mamany meleeno."

Neijia taa ake etiu sii te yiook, tenikinteng'enuo pee kiyiolou irorei loo Lkigerot nikias, naa keyieunoyu nikisum te nguton Bibilia, nikinkilikuanu inkikilikuanat sidain, pee kitum aataas te nkitorriokinoto, "aasishore te nkitoriokinoto ilo Rorei Osipa" (2 Timoteo 2:15). Tadamu inchere keidimayu pee iasishore irorei loo Lkigerot kake imme te nkitoriokinoto. Etaasishore sii ninye oloirririu ilkigerot etemita Yesu. Eesishore oshiake sii ninche iltung'ana ilkigerot pee eitabarie mbaa enye maate nemeitiship Enkai, mbaa torrok neijio enkironya, ilarrabali, neituny esipata oo laisnak. Meishiakinoto aikata nikiaas mbaa neijio nena.

Ena tipat sii te nikedamu inchere ore te kulie katitin neidimi aisudo enkipirta o lkigeroto. Ng'ura indung'eta e rashe te nkitanyaanyukoto. Ejo Olmaasani, "enkoshoke naata osotua." Keeta ena dung'et inkipirtat kumok alang enkipirta nabo amu ore "osotua" naa kegiroo nabo enkipirta enye. Ore enkipirta

edukuya, kiindim atejo tiae alo ore enkoshoke naa ewueji neibung'are enkerai ng'otonye. Ore enkae kipirta naa inchere ore enkerai o ng'otonye eibung shoruetisho te nguton oleng neutu ena osotua anaa enatiu ilo sesen obo oitutummo ninche tenebo. Ore enkae kipirta ena dung'et tenikiol naa eutu sii osotua lo ltung'ana otoni adaa te nchula nabo. Ore teina oitoi, kedimu neiteng'ena iyiook ena dung'et naipirta empukunoto Endaa o Laitoriani, amu ore teniking'are emukate Osesen le Yesu o enaok Osarge le Kristo tenebo ilkulikae airukok, nikitum osotua ogut oleng tenebo Olaitoriani lang Yesu Kristo.

Ore te kulie katitin eibala enkipirta olkigeroto nening'unoyu te leleki, kake ore te kulie katitin nelo negutu. Etejo sii ninye Olkipaaret Petero inchere "etii kulie baa" too mpala Olkipaaret Paulo "naagol eyiolounoto" (2 Petero 3:15-16).

Ore eton eitu king'or enikinko tenikijurr ilkigerot, matang'as aaning'u ilkigerot ooitodol iyiook tipat tenikijurr Ororei le Nkai.

**Isuma kulo Sirat:**

Esra 7:10, Iasat 17:11

2 Timoteo 2:15

Ilfilipi 4:7-8, Iroma 12:2

**Enkiteng'enare:**

Etipika Esra oltau lenye pee eiteng'enuo peyie eaku keyiolo Ororei le Nkai neas ninye. Ore Ilyahudi oiruko te nkop e Berea nejurr ilkigerot anaake pee edol enkiteng'ena e Paulo tialo Yesu tenaa kesipa. Etayiolo sii apa Paulo inchere mme entoki nalelek enjurroto olkigerot kake esiaai, neaku eitukuja ninye Timoteo ejoki peiyie enyok pee etum ataa olaisiayiani lemeeta enaitukurru. Ore too Ilfilipi 4:7-8, o too Iroma 12:2, nikidol inchere keishiakino neitang'ejuki indamunot ang neiputi imbaa naaret. Meetae ae oitoi sidai naasieki ena meteleku te njurrunoto Ororei le Nkai.

ENKIKILIKUANATA EDUKUYA NAIMAKINI TENEBO: Kainyoo enkiteng'ena? Kainyoo enjurrunoto? Idamu iyie ajo kaa oitoi kinteng'ena Bibilia?

*[Neitagol aashu eitukuj olaiteng'enani arashu olalikioroni ilkuti tung'anak metawala.]*

**Enkiteng'enare:**

Ore pee kiteng'ena, neetae inkoitai ong'uan naaishiakino nikisuj, neetae sii inkikilikuanat nara uni e tipat naaishiakino nikikilikuan ate.

Kuna naa nena oitai ong'uan:

1. **Tejo nabo:** Isuma arashu inining Ororei le Nkai nijing atua enkomono.
2. **Tejo are:** Tabolo oltau lino teina kata isujita aashu ining'ito Ororei le Nkai. Milo ake anya ororei le Nkai iyieu nitem arashu iyieu nintadedeyie eyieunoto ino makewan kake tang'uarra pee kirere.
3. **Tejo uni:** Aisidai oleng tenisum aashu teninining telulung'ata Bibilia. Inosa ematua nabo arashu enkite matua te nkata nabo.
4. **Tejo ong'uan:** Tenimigira alo aisum aashu aininining eimu embuku e Bibilia pooki, naa sidai naa tenintadedeyie te kulie matuan ina niyeu ninteng'ena.

Etii sii kulie kikilikuanat uni naata tipat naishiakino nikinkilikuan ate.

1. **Tejo nabo:** Amaa, kejo aa?
2. **Tejo are:** Amaa, kainyoo enkipirta?
3. **Tejo uni:** Amaa, kaa nanu aas?

Kintoki ake aimaki ena kikilikuanata e uni te nkae kisuma najo inchere aas Ororei le Nkai.

Ore pee kinkilikuanu enkikilikuanata edukuya naa keya erishata kigira aing'or ajurr too rubat pooki. Keishiakino nikinining nikisum sii ematua katitin kumok. Kaa pukunoto enkigeroto ena? Kendung'et e rashe aashu kesinkolio? Keilomon aashu kenkatini aashu kentepen? Kenkiguran aashu kekitanyaanyukoto? Ke mpalai aashu kenkiteng'ena? Ee keidimayu pee eaku alang nabo e kuna ake.

Ore taa pee eidipayu kuna nikinkilikuanu kulie neijio Aing'ae? Kalo? Kakua? Kanu?:

Kaing'ae oirorita arashu kaing'ae olasirani?

Kaing'ae etiakaki kuna arashu etisirakaki?

Kainyoo naloito dukuya? Aitiaji etaasate?

Kanu etisiraki arashu kanu etaasate nena baa?

Kainyoo elimunoto tialuo ena kisuma? Kainyoo eitodolu ena matua? Kainyoo pee etisiraki?

Kakua inkitanapat? Kakua inkisiligat?

Ainyoo naitaa arashu nayau shoruetisho?

Kakua rorei arashu induaat eigilaki aitalal?

Ore pee kinkilikuanu enkikilikuanata eare, naa aikigira aibeleyen. Aikigira aing'oru enkipirta. Kuna Inkikilikuanat nikinkilikuanu:

Ainyoo enkitodolunoto naisul arashu enkipirta?

Amaa, lelo kulikae kererin arashu nena kulie bukui kenyal enkipirta?

Ketii toki to rkuak arashu too nkaatini nainyal enkipirta?

Ore tenelo ninteng'enuo Osotua Ng'ejuk, intadedeyie nimbung Osotua Musana.

Ore teninteng'enuo Osotua Ng'ejuk, intutumo induat o nkiteng'emat te kulie kiteng'emat o Sotua Ng'ejuk.

Naa teninteng'enuo Osotua Musana, keata enkitalalunoto e Yesu?

Ore teninteng'enuo Osotua Musana, intutumo induaat o nkiteng'emat te kulie kiteng'emat Osotua Musana paa

intoki aitutumoki Sotua Ng'ejuk. Tujurro tenaa ketii arashu metii eneitarieki to Sotua Ng'ejuk.

Ebaiki nigira aikilikuanu, "Amaa, kainyoo pee eishiaakino kuna kikilikuanat pooki? Kainyoo pee meishiaakino inchere naisum ake arashu nainining ake irorei le Bibilia?" Neaku inchoo maishoo enkitanyaanyukoto. Tiatua embuku e Yoab, nepuonu ilchoreta lenyena aarum ninye. Ore lelo shoreta eing'eni oleng te ng'eno e tung'ani naa etotiuo inaatejo anaa esipata. Kake ore te nkiting'oto e nkatini e Yoab, neisikong Enkai lelo shoreta okuni neliki olchore oji Elifas, "Eyupuyupieki engoro ai te nkaraki iyie tenebo lelo shoreta linono pokira aare; amu eitu iroro intae tialo nanu imbaa naasipa anaa enairoro osinka lai Yoab" (Yoab 42:7). Ore ena eitadol iyiook inchere meshiakino pee kinining irorei lelelo shoreta okuni te nkoitoy nanyaanyukie enikinining irorei le Yoab. Etejo ninche kulie baa naasipa, kake etejo sii kulie baa nemesipa. Neaku keishiaakino oleng nikilikilianu kuna kikilikuanat tenaa ekiyieu nikitum enkibung'ata nasipa o Rorei le Nkai.

Ore enkiteng'ena keyieu enyuaata. Tenira oltung'ani oshal anaa oladuoo payian likitonging'utuo te nkiguran, naa mikipuo naa aashet enkishui ang aitobiraki to Rorei le Nkai.

**Isuma kulo kererin:**

Ile Efeso 2:19-22, 1 Ilkorintio 3:11-16

**Elimunoto o Laiteng'enani te nkibalakinoto:**

Aikiteshetuaki te shumata olkitamanyunoto loo lkipaareta oloibonok le Nkai? Aa inchere inchoo Enkai meteshata enkishui ino te shumata Ororei le Nkai otii atua Osotua Ng'ejuk o Osotua Musana? Keishiaakino nikishet emanyisho e Nkai tiatua Enkiyang'et Sinyati. Kalo sheitei kishetita? Aikigira asipu aing'or oleng pee esheti iyiook te shumata olkitamanyunoto osipa laa ninye Yesu Kristo? Kaji eikununo enkanang nishetita? Amaa

kebikoo? Anaa keuroo enchan arashu euroo osiwuo? Aikiyieu nikishet ate to lcheitei sidai? Neaku, matujurr anaa mataleen oleng Bibilia.

**Osirata Oishiakino Nidamu:**

Iroma 12:2

**Inkoitoi Naasishoreki:**

Interua taa aisuma arashu ninining' ilkegerot. Tenakata shomo taa te nguton oleng tujurro. Milo ake duo aing'or arashu ainining te leleki kake tonyua oleng imbung'are enkipirta.

Tegelu embuku te Bibilia. Nilimu te nkata neme nabo. Tadamu isuma niomon aashu inining niomon. Ore tenisuma arashu ninining, ingero (te mpalai arashu te lukunya ino) enkikilikuanata arashu ewalata nitadamua. Ing'oru enkipirta naitululung ematua pooki neme too rorei ake.

Ing'oru oloti turrur loo loiteng'ena Bibilia pooki wiki aashu ata anaake.

**Irorei oo Bayie:**

Kiyiolo inchere "Ore ilkigerot pooki naa Enkai naiyang'ua, neeta dupoto te nkiteng'enare, o too nkisikong'at o ereroto, o te nkitubulunoto ti atua esupatisho" (2 Timoteo 3:16). Neaku keishiaakino nikisum nikiyiolou Bibilia pooki; mme nkutiti wuejitin ake. Tenidol enkop natogirro intare oleng meitoki aatii inkujit kake keaku enterit nainyiototo. Kaji etiu intare teneibookini ine netaa enterit? Kemenayu nesasu oleng. O naa sii nkishu teneiritieki ine? Meitoki aa taa kule. Kiyiolo pooki inchere aisidai tenedaare inkishu arashu intare iwuejitin neleng neepaasha. Neijia taa eikununo o te yiook ilairukok. Tenikipuo ake aimaa inkutiti iwuejitin te Bibilia naa aikishalu. Kake tenikipuo aimaa iwuejitin kumok nepaasha tiatua Bible nikituu anaa intare naairritae too wuejitin neepaasha. Tenikidaare

ewueji nebo, ore kulie wuijiti nebulu neleng'u oleng, neaku ekiata anaake imbolokinot ng'ejuko nikitum. Neaku taa matujurr ine nikidaare aa ninye Ororei le Nkai, peyie kitum nkujit naanyori nikitum ewueji tiatua iyiook neshetieki enkaji e Nkai.

**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?



Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Kaiteng'ene Ororei le Nkai najurr, arashu kaisum anaa kaimayie ake?

**Emparan:**

Ekiiyolo aing'urra ilopir nikidol tenaa ketumi enchan anaa aimetumi. Ekiiyolo sii aingurra enkop sidai te manyisho. Kake ore enjurroto o Lkigerot neidim sii ataa esiaai ng'ejuk too lairukok kumok. Intagolo ninche arashu aitukuj ninche ning'arrie ninche enikununo enyuaata ino makewan. Tang'arrie sii ninche imbolokinot nikinchooki iyie te nkiteng'ena.

**Mbaa Naaponaro Naaimakini:**

Etii ematua o Itung'ana oonyor ainosa inkaitubulu. Ore eton eitu inya inkaitubulu, meeta inchere meng'asi ake aitubulu too lchamba arashu te nkurma. Neaku ore enedukuya, eng'as ake oltung'ani ajurr enkurma pee edol tenaa aisidai nepikayu enkare. Neitoki taa aitukut entim o soito sapukin; neturr. Teniyieu nitum inkaitubulu sidain neishiaakino niturr enkop aitugut, nintobirr niun taa inkaitubulu. Ore iyiook looiruko, neing'orita iyiook Yesu pee kiiun ilng'anayio. Kake amaa kaji eikununo ilng'anayio? Kake amaa kaji eikununo ilng'anayio likiiun amu keaku ketiu tenisioroto anaa enashomo intona ang te nguton abori atua

enkulukuoni. Ore tenegol enkurma, nemepuo intona abori oleng. Kake teneaku etuturoki aitugut, netum taa intona aashom te nguton atua enkop aing'orru enkare nitum taa tenkiting'oto endaa sapuk. Naa neijia ake etiu te yiook, keishiaakino nikipik te nguton intona ang atua Ororei le Nkai, aaturr oleng te nguton, pee kitum aaturru embolokinoto e Bibilia.

**Naaigeri:**

Enkiteng'ena e Naaudo – Enkinosata Ororei le Nkai:  
Easata Ororei le Nkai

Iutarot naaidim Olaiteng'enani atotonai te nkiteng'ena 9:

***Enkipirta e Nkiteng'ena:***

1. *Keishiaakino neyiolou iloiteng'eni tipat e asata Ororei le Nkai.*
2. *Keishiaakino neitayu ate oleng iloiteng'eni pee enyok oleng kake imme pee ening ake Ororei le Nkai kake pee eas katukul Ororei le Nkai.*

***Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:***

Yohana 13:17

Matayo 21:28-31 (enkitanyaanyukoto natolimuo Yesu)

Yakobo 1:22-25

Ile Efeso 2:10

Luka 6:46-49

***Enkitayunoto e kewan o Laiteng'enani:***

*Ainyoo empaashata oltung'ani ojo "kairuk nanu Yesu" o ltung'ani laa oloiteng'eni odede, osujita enkoitoi e Yesu? Ore ewalata ena nikitum tiatua Yohana 8:31-32: "Akaae, nejoki Yesu lelo Yahudi ooiruko ninye, 'Tintonini to rorei lai nirara ilooiteng'eni laainei oosipa; naa iyiolouu esipata; nelaku intae esipata'." Kainyoo eutu ele rorei ojo "aatoni" to Rorei le Yesu? Ina taa enkipirta arashu eimaki kuna kiteng'emat pooki. Tinikijing katukul atua Ororei le Nkai, nejing Ororei le Nkai te lulung'ata atua iyiook, kaae neaku kiterretenate pee kitoni tiatua Ororei le Yesu nikitoni sii tiatua Kristo. Kake tinikiyieu te sipata nikitoni tiatua*

*Ororei le Yesu, neishiaakino naa nikias terisorot Ororei le Yesu.*

*Toning'o ena kitanyaanyukoto o laayiok are. Ore olayioni liare newaliki menye ejo, ayia, papaai lai, kaanyit, naas anaa enitejo. Kake eitu enyit. Etiu ina anaa olairukoni ojo "airuko nanu Yesu naatoiwuoki aigil," kake ore ake eyia nemeas Ororei le Papa. Ore olikae ayioni le dukuya neng'as agolong'u, kake ore te siadi neirridu nelo aas. Keibala aitorbiraki inchere alo ayioni otaasa enanyor menye. Ilo oirridua ninye ng'ok enyena nesuj te sipata enkoitoi e Yesu neas Ororei le Yesu.*

*Te nkaraki ena pee etiaka Yesu ilooiteng'eni lenyena inchere, "Ore endaa ai naa te naas eyieunoto e lido laairriwua, naidip esiaai enye" (Yohana 4:34). Ore naa amu ilo Yesu oirriwayie iyiook maape enkop pooki, ore naa endaa ang naa pee kiaas Ororei le Yesu, aas ina naitiship ninye, nikindip ina siaai apa nashomo ninye aiterru. Ina naa pee eiteng'en iyiook olkipaaret Yakobo too wuejiten are napaasha inchere "enkirukoto nemetii nkiasin naa etua." (Yakobo 2:17 and 2:26).*

*Amaa, tenara naaji olaiteng'enani tiatua enchula e nkanisa, kagira nanu aiteng'enisho te nkitanyaanyukoto ai makewan, too kiasin naasita? Katonita nanu tiatua Ororei le Yesu? Naa ina kata ake tenaa kabikito tiatua Ororei le Nkai, aasita enajo Ororei ina kata ake aidim aiteng'ena ilkulikae metobiko tiatua Ororei le Yesu.*

**Enkomono:**

*Enkai Papa lai otii shumata, aashukoki enashe te nkaraki esupatisho ino te nanu o lng'ur too nkatitin pooki. Kaibalakinye nanu nchere atiu ake anaa olkipaaret Paul amu "Kayieue naas isupati kake maas;*

*neaku ntorrok nemayieu ninche aas.” (Iroma 5:15-19)  
Kaomon tapalakaki nikiretu mataasa Ororei lino.  
Imayieu ake nalej kewan ainining ake Ororei lino  
nemaas. Kayiolo inchere maidim aitotio intare inono  
metelexu ake tenang’as aitoki kewan te kinining’oto o  
te asata Ororei. Taretuoki matotiwuo anaa oladuo  
ayioni le dukuya oirriduo neyanyit, neas enanyor  
menye. Taretuoki mataasa eninyor iyie, aa inchere aas  
Ororei lino tiatua enkishui ai, aas Ororei lino too  
ndamunot aainei, o too nkaik aainei o too nkejek o to  
sesen lai pooki. Neaku kaidim nanu aitoduaa ilairukok  
enkitanyaanyukoto. Aomon kuna pooki te nkarna  
Olaitoriani lai Yesu Kristo. Esai.*

**Naaigeri:**

**Elimunoto – Enkatini:**

Neaku kelimu olaiteng’anani enkitanyaanyukoto oo ltung’ana okuni ooshomo enebakishoreki amu kemoiyiaa oleng. Ore oltung’ana le dukuya naa keikirikira, nemenya endaa naa sapuk enkima to sesen. Neing’uraa olobakisho nenyorriki inchere oltikana eeta, neaku neisho ninye ilkeek sidan neliki aibalakinye

ninye enaikunakino. “Tookie kulo enkare katitin uni te nkolong, tadekenya indipa shaai, ote nindip endaa e dama o te nindip endaa e teipa. Tooko kulo keek ntululung’a nkolong’i uni metabanaaaa neishunye pooki. Taasa ena naa ainchu katukul.” Nelak ele tung’ani lelo keek nerrinyoki olaabani enashe. Kake ore pee elo ang, nelo ake apik ilkeek ewueji sidai pee melau ninche. Ore enkaraki eitu eas ina natiakaki, ore eitu epuo nkolong’i kuti neya oltikana ninye.

Ore oltung’ani liare neeta apa sii ninye ina moyian oltikana nelo metabaki. Neishori iutarot naatiu anaa no likae. Nelak sii ninye ilkeek neishooyo enashe nelo ang. Ore te nkolong e dukuya neas aitobiraki anaa enaitanapaki. Ore pee eiteru aning ajo eikasha nepal ilkeek. Kake ore eitu epuo inkolong’i nemuoyu aitoki oleng neya ina moyian ninye.

Ore oltung’ani liokuni neeta apa sii ninye oltikana. Neaku ore amu aing’en apa ninye alang kulo pokira, nening apa ninye enatiakaki neas pooki. Neok ilkeek pooki te nena olong’i uni metabanaaaa neishunye, nesuj inaatiakaki pooki aitobiraki. Ore pee elusoo nena olong’i pokira uni, neishiu ninye oltikana ore taa te nkolong e ong’uan netum engolon katukul.

**Elimunoto o Laiteng’enani te nkibalakinoto:**

Ore kulo tung’ana pokira okuni netolikioki enaishiakino neas. Kake obo ake te ninche otaasa enatiakaki. Ore enkaraki ina, ilo tung’ani obo ake otaasa enatiakaki otarete. Ore sii teina oitoi, keret ake iyiook Ororei le Nkai tenikiaas ninye.

Ore te nkiteng’ena natulusoyie, nikinteng’enate nchere ketii inkikilikuanat uni etipat nikiyieu nikinkilikuan ate tenikiyieu nikijurr Ororei le Nkai pee kiyiolou te nguton oleng. Naa ninche kuna: Kejo aa? Kainyoo enkipirta? Kaa nanu aas? Ore ake teneaku kitawala nkikilikuanat are nang’asunye teina kata taa

eaku kiterretenate pee kinkilikuanu nikiwal enkikilikuanata e uni.

Ore tiatua irishat napaasha, neeta mbaa naashiakino nikias napaashipaasha. Ore sii te pooki kigeroto neeta ake enkisuma napaashaa naiteng'enisho naashiakino nikiaas.

**Enkitanyaanyukoto (o nkisudorot):**

Neaku nelimu olaiteng'enani aimaki nkoittoi naapasha naang'orie Olmaasani ing'uesi naapaashipaasha te ntim. Nelimu ing'uesi uni arashu ong'uan naapaashipaasha, nelimu aibalunye eneiko Olmaasani too lkuak lenye teniar ninche. Ore enkipirta ena kitanyaanyukoto naa pee eretu ilooiteng'eni metoduaa eneikoni teneasishoreki ilkigerot too mpukunot naapasha.

Kulie pukunot e ng'orore naidimi naaji atipik:

1. Olng'atuny te nkaraki nadooki inkishu te nkewarie.
2. Olowuaru kerii laa kedooki sii ninye nkang'itie te nkewarie.
3. Olarro laa kedaari openy netara sii olalashu.
4. Eronko pee eitotiyie ildien lenyena.
5. Entarakuete te nkaraki endaa.
6. Esidai, te nkaraki ilopir losirua.
7. Olcharkuk te nkaraki keyieu nanya nkiri kumok oleng.

**Elimunoto o Laiteng'enani te nkibalakinoto:**

Ore enkipirta eng'orore naa pee ear eng'ues. Kake menyaanyukoro ng'uesi pooki te ntim, neaku kepaasha inkoittoi naing'orieki ninche. Ore te nkishon netii inyamalaritin kumok. Kake ore inyamalaritin pooki neme ewalata nabo eeta. Tenaanyaita enkijape, naidim aishopo olkarasha oirrusha nataaniki enkima. Kake tenairowua, nemayieu olkarasha oirrusha nemanyikaki enkima. Kake ore alang enaas ina nalo ake boo aton tiabori olchani oata oloip. Arashu ebaiki naaaji nainyiala oltung'ani. Tena kitok ninye te nanu, naidim aipotoki

enkitoo arashu obo loo choreta lenyenak odede. Kake tenaa kenkerai ai naaitagoro naa kaidim airorie openy atishirraki narere makewan. Neijia ake sii etiu to Rorei le Nkai. Tenetii embae napaashaa, arashu olkilikuai opaasha, neaku keishiaakino nias embae napaashaa.

Ore naaji te kitanyanyukoto, maing'ura enkolong e Pentekoste. Ore apa iltung'ana ootoning'o olkilikuai lo Rorei le Nkai nerem iltauja, neikilikuan ilkipaareta ena kikilikuanata e uni: "Kaa naa kiaas, ilalashera lang?" Nejoki Petero ninche ewalata, "Erridutu pooki tung'ani, neibatisai pooki te intae te nkarna e Yesu Kristo, pee epalakini intae ing'ok inyi; naa ing'amumu enkishorunoto e Enkiyang'et Sinyati" (Iasat 2:37-38). Ore ina kata ake neiruk nkalifuni uni nenyorraa tukul neas anaa enayieu Enkai te ninche. Ore ti ae olong, netii apa oltung'ani karsis onyor Enkai neibong inkitanapat pooki neiyieu apa ninye nesuj Yesu. Kake eata apa ninye enyamali nabo eishoo enkarsisho enye dukuya neaku meisho ebulu te nchoruetisho nadede tenebo Enkai. Neaku ore apa pee elotu ele tung'ani enetii Yesu neikilikuan ajoki, "Kaji aiko pee ajung enkishui nemeish?" Nejoki Yesu ninye ena nashiakino niaas: "Nabo ake nikitong'orikia; shomo, timira imaasa iniata pooki nincho laisnak ... nikilotu taa asuj" (Marko 10:17-21). Ina ake etoning'o neibelekenya alo aing'uaa Yesu, amu meyieu apa neas ana enatiaka Yesu ninye.

Ore ti ae ake kitanyaanyukoto, maing'ura sii iyie enkiteng'ena e matua e tomon. Ore naaji tenimanya olkerenket nimiata ai kiteng kake iata entoki ning'amu te nkiting'oto o lapa, neaku naa indim aishooi ematu eina ning'amu ashukoki Enkai; kake tenimanya nkang'itie niata inkishu nimiata iropiyiani. niaas ana enaataasa Israeli, aisho Enkai ematua e tomon e pooki naini. Kake ore naaji tenikitamayiana Enkai aisho inkishu o ropiyiani neaku naa indim aisho Enkai e matua e tomon oo nkishu tenebo noo ropiyiani, pee eretu enkanisa meshomo dukuya tukul te Siaai e Nkai tenebo Ororei le Nkai.



**Enkatini:**

Nelimu olaiteng'enani enkatini naipirta enkiteng naibiru. Neaku eitobiruaki entoki ng'ejuk naishu tiatua enkoshoke e nkiteng, kake neye olashe ng'ejuk eton eitu eini.

ENKIKILIKUANATA EDUKUYA NAIMAKINI TENEBO: Kaku rishat etiu ilairukok anaa ina kiteng?

*[Neitagol aashu eitukuj olaiteng'enani arashu olalikioroni ilkuti tung'ana metawala.]*

**Elimunoto o Laiteng'enani te nkibalakinoto:**

Eiteng'ena iyiook Yesu enkitanyaanyukoto e nkurma naa keliki iyiook ena matayiolo enikinko tinikitiu anaa ina kiteng.

**Isuma ele Sirat:**

Luka 8:5-8

**Elimunoto o Laiteng'enani te nkibalakinoto:**

Teniaku eiterunye enkishui e Kristo tiatua oltung'ani, kake neitoki ake aye te nkaraki ore ilo oiruko nemiasita Ororei le Yesu, ore ilo airukoni neitanyaanyukieki ina kiteng naibiru. Enyaanyukie ake sii enajo ele kigeroto eipirta ilanterra eiteng'en iyook nchere ore Ororei le Nkai neyau enkishui, kake teneitu elo dukuya abulu ore te nkiti rishata neye. Naa ore enkoitoi nabo ake naishuyie nebulu sii Ororei le Kristo naa enoshi rishata naas olairukoni Ororei le Nkai.

**Isuma kulo Sirata:**

Yakobo 1:22-25

1 Timoteo 4:17

**Enkiteng'enare:**

Eiteng'ena iyiook Paulo aibalakinye inchere ore Ilkigerot pooki Sinyati naa keeta dupoto te

- 1) inkiteng'enare,
- 2) inkisikong'ata,
- 3) ererioroto,
- 4) inkitubulunoto tiatua esupatisho.

Kake enyaaka aretoo iyiook Yakobo matoning inchere ore ilkigerot neeta dupoto ake neretisho sii tenaa aikias ninche. Ore teilo kigeroto likisuma, nikidol aajo etii inkikilikuanat ong'uan naishiakino nikinkilikuan ate. Ore tenikiwal kuna kikilikuanat te pooki matua arashu te pooki rubata Oreori le Nkai likining, nikitum taa ening'unoto enashiakino nikias.

Ore kuna kikilikuanat naa ninche kuna:

1. Ainyoo aaiteng'enita?
2. Ketii enaasita nemeishiaakino?
3. Kakua reriorot ayieu pee aidim ashomo dukuya tiatua Olaitoriani?
4. Kakua baa naayieunoyu naas anaake pee eaku kaasita Oreori le Nkai?

Etiu anaa inaiteng'ena iyiook olkipaaret Yakobo eimaki ajo, ore tenijo "Airuko Enkai" nemeidip ina. "'Eiruk' sii ninche iloirriruani neikirikira" (Yakobo 2:19). Ore apa terishata naado, olaiteng'enani sinyati le sirit ojo "Marko olopukoo" neitadedeyie ena te kulo rorei: "Ore hoo nesipa eyiolounoto eton eitu euno te ngolon tenemeata isiaitin. Amu euno pooki toki tenepiki enkitamooto."

**Osirata Oishiakino Nidamu:**

Yohana 13:17

**Enkiguran:**

*(Ore lelo oiguranita niasishore irerei lenye)*

Ilaiguranak: olpayian loo Lmaasai e enkayioni enye kiti

Nejoki menye enkayioni metudumu osoit oiroshi oleng nenap aitudung olgilata le nkaji. Neing'nyung enkayioni ejoki menye keiroshi oleng! Nejoki menye nchere kelo aretu kake etawala enkayioni ajo, "A'a. Kaas openy mikiretoki." Neaku nenyok ninye nerrumoo asioki ekiti wueji ake kake meidim aing'atie enkop. Neitok menye aigil ajoki pee edumu aing'atie enkop nenap aitudung olgilata. Neigil enkayioni aing'nyung ejo, "Kake maidimu naa doi." Neitadamu menye ejoki, "Aatiaka duoo atii ene pee aaaretu neaku nkilikuanaki naa karetu." Ore te nkiting'oto neomonu enkayioni metareti, neaku ore ninche tenebo neretokino aanap osoit.

**Elimunoto o Laiteng'enani te nkibalakinoto:**

Amu ore anaa enaijo kegol to ltung'ani pee eibeleyen orkuak apa oata aa enkayioni pee eitoki ashetu likae kuak laa ninye oyieunoyu etaa olpayian, naa kegol sii eibeleyen orkuak laa ninye apa eeta eton eitu eiruk aibung neitamok kewan orkuak laa ninye eyieu olaitoriani nikiata pooki kira ilairukok.

Neaku meyieu iyiook Enkai nikias intokitin naagoli. Inaayiolo: olaiteng'enani: ing'urai Enkigilata oo Nkitanapat 10:12-13, Mika: 6:8, and Olaikooni 12:13. Kake ore ake pee mikincho Olaitoriani meituria katukul atua iltauja lang, neaku ore nena tokitin naalelek te neikilikuan iyiook Enkai pee kias neaku ketiu anna kegoli te yiook. Anaa enaibalunye Daudi tiatua Olkerempe le Nkai 108:12, "ene pesho eretoto e tung'ani !" Kake ina retoto naa ninye eishoo iyiook Enkai naidimie iyiook mataa iloisliligayu anaa enaisiligayu ninye.

Naa ina pee aa keishiakino nikiomon kinkilikuan Papa lang otii shuamta metareto iyiook manoto orkuak oyieu ninye, nicias intokitin naatiaka iyiook pee kias. Neaku imikiindim katukul aataas enayieu Enkai tenikitem aisho mataas te yieunot ang maate. Kake ore te retoto Olaitoriani, naa keidimayu pooki toki!

**Inkoitoi Naasishoreki:**

Ore pooki ng'ae te nchula neishiaakino neomon Enkai pee eitodol ninye enaishiakino neas te risioroto e pooki kilikuai oning tiatua Ororei le Nkai.

Keishiaakino neomon iltung'ana le nchula nabo eomonoki olikae olikae neitagolo sii pee etum aataas Ororei le Nkai.

Kieshiakino pee eibung'akino iltung'ana le Sirit nabo aretokino easata Ororei le Nkai. Eekilikuana olikae olikae: "Aeasitata taata Ororei le Nkai tena pukunoto?"

**Shakenisho:**

SHAKENISHO E LEMAYIAN, OLMUSHENI LE C.M.F.

Anoto apa emayianata te nkaraki naa ore intoiwuo aainei pokira naa ilairukok oo tubulutua aagolu, ata ometabaiki apa ara enkite ayioni. Neaku kenyok ninche oleng anaake pee aiteng'en nanu matusuja orrekie le Nkai. Neitagol iyiook kira inkera maibung'a ilkigerot, kake keiteng'en sii iyiook enikinko te nicias irorei eilo likitipika atua iltauja o lukuny ang. Naa ore ake enkata nayieu ilchoreta lainei naasaki ninche embae naje, naa keeta intoiwuo aainei enkitoria najo pee aikilikuan nabo te ninche aomon erishata eton eitu alo tenebo o ninche. Ore te kulie rishat naa keyieu naas nanu intokitin torrok tenebo ninche, ore te kulie rishat naa keyieu ake naiguran empira tenebo ninche aashu anya endaa tenebo ninche. Naa ore te pooki rishata naikilikuan ninche, naa kaoliki intoiwuo aainei, "Kejo aa Ifilipi 4:8?" Keimaki ilo sirata intokitin naaishiaakino nias? Neaku kejo ilo sirata, "Ore enabayie ilalashera naa inchere, ore pooki naasipa, ore pooki

nayanyitayu, ore pooki naata errepet sidai, te netii orrekie sidai netii orrekie oiririkino enkisisa, kuna entadamu.” Neaku atang’asa aitamok kewan enyuaata te nena tokitin ake naidim atadamu. (Kaibalunyie ajo ore te kulie rishat neton ake aa enyuaata!) Kake ore ake naitoki aitamok kewan pee maitoki aas ae bae nemesipa, pooki nemesipa o pooki nemeyanyitayu o pooki neme sidai o pooki nemeeta errepet sidai o pooki nemetii orrekie sidai. Neton ake agira aitamok kewan kuna baa.

Naa aikiyiolo aajo ore indamunot naa inkitamoot neyau nkiaasin. Tiatua Nduge’eta e Rashe nejo, “Ing’ura oleng tagolie oltau lino, amu ninye epukunye inchorroi e nkishui.” Ore ake paa iyieun nirrip oltau lino. Naa pee intamok kewan erripoto o eramatata oo ndamunot inono, amu ore ele kigeroto loo Ifilipi naa aikiret iyie taasa ina. Tenkaraki aitamok kewan easata ele kigeroto, neaku atorripo nanu katukul Enkai.

~ nanu Lemayian (Joshua ole Barron)

### **Irorei oo Bayie:**

Ore tiatua Yohana 8:31-32, “Nejoki Yesu lelo Yahudi ooiruko ninye, ‘Ti nitonini to rorei lai nirara ilooiteng’eni laainei oosipa; naa iyiolouu esipata; nelaku intae esipata’.” Ore to sirata lang odamuni, nejoki iyiook Yesu, “Ti niyiololo kuna baa, imayianana ti niaasiasa.” Neijia ake sii ejoki iyiook Yesu taata.

Metaa oltaa likipuoyie Ororei le Nkai, neaku sii ewang’an naitore nkoitoi ang!

⋮ Inaayiolou olaiteng’enani: ing’ura Olkerempe le Nkai 119:105 ⋮

**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisma naitobira naasishore?

Amaa, tenaisum Bibilia, arashu tenelo nainining' enkiteng'ena e Bibilia, kajo ake "Aisidai oleng ena kiteng'ena" naitaa parmetii? Arashu kalo anyok oleng pee aas Oreori le Nkai?

**Emparan:**

Ore te rishata e seremare, tenikining Ireori le Nkai tenebo shakenisho tialo nksiligayunoto e Nkai too ltung'ana lenyena, emanita iyiook enkomono o sinkolioitin tialo enkisisa Enkai too ltung'ana lenyena, neleleku kijo "Kairuk Enkai" too nkutukie ang. Kake ore kitii nkang'itie ang, naa kegol kulie rishat tenikintodolu enkirukoto ang too nkiasin. Inkilikuana iltung'ana le nkanisa arashu le Sirit tenaa keasita te risioroto Oreori le Nkai. Kake tenewal "Ee" inkilikuana ninche enaasita. Naa tenewalu inchere "meata enkias tialo ele rorei," nintagol ninche meiteru aas te risioroto Oreori le Nkai teina kata. Inchoo ninche shakenisho anaa eretoto ninoto pee interu iyie aas Oreori le Nkai. Niomon tenebo ninche pee eret ninche Enkai metaasa Oreori le Nkai.

**Mbaa Naaponaro Naaimakini:**

Ore tiatua Luka 6:46, neikilikuan iyiook Yesu nejoki, "Ainyoo pee kijojo, 'Olaitoriani, Olaitoriani,' nimiaasiasa enajoki intae?" Kidol aajo kelelek oleng tenijo "Kara olairukoni" arashu "Aatoiwuoki aaigil" arashu "Kanyor nanu Yesu." Kake tenaa aikinyor iyiook Olaitoriani te sipata nikincho ninye meitoreisho te shumata iyook, neishiaakino naa nikias Oreori lenye tiatua inkiasin ang pook. Tayiolo inchere ore tiatua Luka 6:47-49, neliki iyiook Yesu inchere tenikiyieu nikiata iyiook olkitamanyunoto ogol arashu olkitamanyunoto oono naa keishiaakino NIKINING tenebo NIKIAS ireori lenyena. Kake ore TENIKINING ake Ireori le Bibilia NIMIKIAS, "imikiaas anaa enejo" neaku ore pee epuonu isinaitin nikiurori nabo kata naa ore eurorot ang naa kesapuku oleng.

Ore tiatua Amerika, etii osinkolio orany nkera kutiti oibung'are ena kiteng'ena. Ore errepet e ilo sinkolio nejo, "Neaku tesheta enkishui ino tiatua Olaitoriani Yesu Kristo, Neaku tesheta enkishui ino tiatua Olaitoriani Yesu Kristo, Neaku tesheta enkishui ino tiatua Olaitoriani Yesu Kristo – Tesheta enkishui ino te shumata Endapidapoi!" Ore Yesu Endapidapoi o lkitamanyunoto lang. Neaku mateshet enkishui ang o empukunoto ang te shumata Endapidapoi naa ninye Yesu te EASATA Oroei le Nkai.

**Naaigeri:**



## Enkiteng'ena e Tomon – Ayiolou Ororei le Nkai: Irorei Oobayie

Iutarot naaidim Olaiteng'enani atotonai te nkiteng'ena e Tomon:

### **Enkipirta e Nkiteng'ena:**

1. Ore te nkiteng'oto ena kiteng'ena, neyiolou ilooiteng'eni inchere eitoomono Enkai ninche metookisho te nguton tiatua ororei lenye.
2. Ore te nkiteng'oto ena kiteng'ena, eimu enkomono, netum ilooiteng'eni enkitukuja sapuk pee etum aatokisho tiatua Ororei le Nkai.

### **Isirat ooishiakino neisum Olaiteng'enani egira arretena peyie eidim aiteng'enisho ena Kiteng'enare:**

Ile Efeso 1; Ilfilipi 1:3-11; Ilkolosai 1:3-13

Ile Efeso 6:10-20; Ilfilipi 4:4-7; Ilkolosai 4:2-6

### **Enkitayunoto e kewan o Laiteng'enani:**

Ore te kuna pala uni, etolikio Paulo ilomon supati te nguton ilairukok, esai ninche pee esuj enkiteng'ena o lomon supati, nererioo ninche te nena baa naagira aimaa. Kake ore eton eitu eiteru esiaai enkiteng'ena tenena pala, neng'as aisho Enkai enashe te nkaraki nena sirito o eng'eno naishoo Enkai ninche. Neitoki ang'arie enkomono enye naomonito te nkaraki ninche. Ore too mpala pooki neliki Paulo ilairukok nchere keomonito te nkaraki ninche pee ebulu te ng'eno o te yioulounoto. Ore sii aitoki too mpala pooki; neng'arie ninche ororei le Nkai

Ore too Ile Efeso; nesiraki Paulo nchere; "Ebaiki apa paa aning enkirukoto inyi ti atua Olaitoriani Yesu, o

enyorrata ninyorrinyorro lelo sinyat, eitu apal maishooyo enashe te intae, nadamu intae te nkomono ai." Kidol aajo etoomonoko anaake ilairukok. Eitu duoo ake eomonoki ninye ninche eton eitu esiraki aiteng'en ninche kake etoomonoko ninche enkata pooki nadamu ninche. Etiaka Paulo ilkolosai nchere; "Kebulita lelo Omon Supati aaiu ilng'anayio te nkop pooki; anaa enaikuna ti atua intae ebaiki ina olong apa nining'ining'i empiris e Enkai niyiolouwu te sipata." Neitoki aponaa ajo, "Eitu kigira mikiomonoki intae ebaiki ina olong nikitoning'o pee eiput intae eyiolounoto e yieunoto enye ti atua eng'eno pooki e yiolounoto o ltau." Ore ebaiki enkolong apa natoning'o neyiolou ilkolosai empiris Enkai nepuo dukuya ilomon supati ebul neiu ilng'anayio. Neitu eitashe. Ore sii ebaiki enkolong apa natoning'oyie Paulo ninche eitu epal ninye meomonoki ninche.

Ore too rishat, kiinchir oshi kijo mebulita ilomon supati tiatua esirit arashu tiatua enchula. Ore te kulie katitin nerikino iyiook eitu kimonoki ilairukok. Ekiomon oshi eton eitu kinteng'enisho pee emayian Enkai enkiteng'ena ang pee etumie ilairukok eng'eno, kake amaa aikiomonoki oshi anaake ilkulikae airukok pee etum Enkiyang'et Enkai ataa tenebo o ninche, neiteng'en ninche anaake?

"Entasheikinoto enkomono emingusugus." "Entoomon inkatitin pooki te Nkiyang'et te nkomono pooki e eomonokinoto." Eiteru apa Paulo pooki palai eomonoki isirito; neidip te pooki palai esai isirito pee eomon anaake. Nesai ninche pee eomonoki ilairukok pooki neisulaki enkorok enye makewan. Nesai ninche pee eomonoki ninye pee eidim ainosai olkilikuai te mpijan. Ore tiatua embuku oo lasat o too mpala e Paulo,

*nikiyiolo nchere eshomo ninye dukuya ainosaa olkilikuai te mpijan. Kake etiaka ninye lelo kulikae airukok nchere keyieu ninye enkomono enye pee eidim ataasa ena. Ekijoki iyiook ilkulikae airukok metonyua te nkomono te nkaraki iyiook? Tena keyieu Paulo enkomono oo lkulikae airukok, aikiiyieu sii iyiook enkomono oo lkulikae airukok?*

*Ore te kuna pala pokira uni, nikidol enkomono eilep alo enetii Enkai te rishata olairukok, o too laisiaayiak, o too lubut pooki enkop, o too lomon supati, nikidol enkishui nabore embulunoto esirit o enkibularoto o lomon supata. Ore te nikidol nene wuejitin iyiook, nikidol isirito kumok naa keshali netabatatate. Kidol te nene wuejitin ilkristiano ootashala nerikino esiaai enkomono. Nikintoki ake adol sii isirito natubulutua negoli, naa ore te nene wuejitin ninepu ilkristiano oomon anaake te nkaraki esirit. Ore tena shakenisho naipirta erasaroto enkomono, matoomon anaake te rishata e sirit, o te rishata lelo leitu eiruk nikiliki isirito ang metoomonokinoto anaake maate, metoomonoki iyiook olelo leitu eiruk.*

**Enkomono:**

*Enkai Papa, imputaki iyiook Enkiyang'et ino Sinyati, pee kitum aatomonokinoto anaake olikae olikae, nikiomonoki sii esiaai o lomon supati. Imputaki iyiook eng'eno ino o empijan pee kindim ainosai Ororei. Naa metubula ilomon supati neiu ilng'anayio tiatua iyiook o to nkop pooki.*

**Naaigeri:**

**Elimunoto – Enkatini:**

Nelimu Olaiteng'enani enkatini naipirta inkishu uni. Ore enkiteng edukuya nejo ore amu aatooko apa enkare meekure aitoki aok aikata. Ore too nkuti olong'i nemuoyu neye. Ore enkiteng eare nejo ore amu enkiti are apake aok ara enkashe meitoki aponaa ina ake aok. Eitu eshilaa ninye olashe lenye neitu eshilaa kewan pee eishu. Ore ena kiteng' neaku mme biyoto nemeeta sii kule naanaku olashe arashu nalepu iltung'ana. Ore too nkuti olong'i nemiri arashu neyieng'i aitaa endaa. Ore enkiteng e uni neok oleng enkare. Neok anaa enaidim; neaku ninye biyoto neeta kule kumok, naanaku olashe o naa lepu iltung'ana. Neaku enkiteng nanyorri oleng neeta tipat.

**Elimunoto o Laiteng'enani te Nkibalakinoto:**

Ore kuna kishu pokira uni neiteng'en iyiook imuain uni naapasha o ilkristiano. Ore ene dukuya neiteng'en iyiook ilairukok ookisho to rorei le Nkai, kake ore te nkata naje nemeigil aikata aisuma Biblia arashu eomon arashu elotu enchula. Ejo ninche nchere ore amu ataasa apa nena pooki too nkolong'i naatulusoitie natubulua agolu, nemeekure naa eeta tipat pee eitoki aigil ashukokino aas. Ore eitu epuo nkolongi neye enkirukoto enye nebatata, neiteru alo anaa enajo enkop neme anaa enajo Enkai.

Ore enkiteng eare neiteng'en iyiook enkitanyaanyukoto olairukok laa ate ake eing'or neokisho kake mme oleng to rorei le Nkai. Meng'uarr pee eyiolou Biblia te nguton oleng pee etum aiteng'ena ilkulikae. Neaku mme biyoto oleng. Ore too nkolong'i dorropu neishoori amu meeta dupoto nayau atua olmarei le Nkai.

Ore enkiteng e uni nenyanyukie lelo airukok ookisho anaake too rorei le Nkai. Enguar naleng pee ebulu agolu tiatua enkishui enkirukoto neaku oloidim aiteng'ena ilkulikae. Netum ninye omom te Nkai, neikenaa Enkai ninye anaa olaisiaayiani oisiligayu.

**Isirat Oisumai:**

Isaya 55

**Elimunoto o Laiteng'enani te nkibalakinoto:**

Emataasishore pooki kulo kigerot pee erikoo iyiook matoomon Enkai pee eretu iyiook olkulikae tung'ana pee kisuj ena kiteng'ena.

**Enkomono e Dukuya:**

Eipoto iyiook pooki Enkai ejo, "Wou pooki ng'ae oata enkure, wootu entook nkariak; wou, iyie ilo lemeeta mpisai inyang'u endaa inosa! Wou, inyang'u enaisho o kule, wou, miata ropiyiani nemetii enkinyang'a. Kaainyo pee inchang'itie iropiyiani te ina neme endaa? Kaainyo pee inchang'itie ole kosisiyio te ina nemeraposhisho? Toning'oki nanu nias ina naajoki, pee itum ina daa sidai aisul, nishipakino nena naapir." (Ilkererin 1 and 2)

Matoomon tenebo kiomonoki ate nikiomonokino olikae olikae pee kindim aetu enetii nkariak anaake, nikinining' Enkai, niking'oru ninye anaake.

**Enkomono Iare:**

"Irrugokoki nanu enkiok nilotu enatii; toning;o pee etum oltau lino atopuaa; pee aitobir nanu te nebo iyie osotua loo ntarasi, ilo sotua lai ouno te nkaraki Daudi. Ng'ura, aitaapa nanu ninye shakeni too loreren, pee eaku olarikoni o laitoreisho too loreren." (Ilkererin 3 and 4)

Matoomon tenebo kiomonoki ate o kanisa pee kiaku shakeni too ltung'ana nikiliki ninche olning'o loo ntarasi le Kristo pee etum empuaan.

**Enkomono e Uni:**

"Ng'ura, ipuopuo intae aaipotu lelo oreren limiyiololo intae, ore lelo oreren lemeyiolo intae nekuetiki intae, te nkaraki Olaitoriani

Enkai inyi, o Ilo Osinya le Israel, amu eitaa ninye intae olosho kitok.” (Olkereri 5)

Maatoomon tenebo pee eitaa Enkai kanisa olosho kitok paa ore iloshon nepuonu aakuetiki kanisa te nkaraki Olaitoriani Enkai ang. Matoomonoki iloshon meetu enetii Enkai, kiomonoki Kenya o kulie kuapi.

**Enkomono e Ong’uan:**

“Eng’oru Olaitoriani eton etumoyu, empoto ninye eton etaana; nchoo ilo torrongo epaash nkoitoo enyena torrok, ore ilo lemeas isipat nepal ndamunot enyena; nchoo ninye errinyokino Olaitoriani, pee etum Olaitoriani aing’urrie ninye, nchoo errinyokino Enkai ang, amu kepalaki ninye oleng.” (Ilkererin 6 and 7)

Matoomonoki iyiook lelo lemeyiolo Enkai o lelo oasita ing’ok pee eirridu, neing’oru enkomom Enkai amu kepaliki ninye oleng.

**Enkomono e Miet:**

“Amu ore ndamunot aainei neme ndamunot inyi, ore nkoitoo aainei neme nkoitoo inyi, Olaitoriani ojo. Amu ore anaa enalakuaniki keper enkop, neijia etiu nkoitoo aainei elakuaniki nkuninyi, o ndamunot aainei elakuaniki ndamunot inyi.” (Ilkererin 8 and 9)

Emaishoo iyiook Enkai enkisisa te nkaraki ndamunot enyena nalakuaniki indamunot ang o nkoitoo enyena naalakuaniki inkoitoo ang. Emaatoomon pee eiteng’en iyiook Enkai indamunot enyena o nkoitoo enyena pee kitum aaishoo ninye enkitoo.

**Enkomono e Ile:**

“Amu ore anaa enadou enchan o enkinuku eing’uaa keper, nemerrinyo kake kepuo aaitashal enkop, neitubulu nkaitubulu, neisho ilantera lelo oounisho neisho endaa ilo oinos, neijia sii

etiu ilo rorei lai oimu enkutuk ai; maarrinyokino nanu erok, kake kelo aitabaya inaipirie, nelo aitubul ina toki apa nairriwaka.” (Ilkererin 10-11)

Matoomon paa ore ororei le Nkai nebaya anaa enayieu Enkai nebaya enkipirta enye anaa enairriwua Enkai, pee meshukokino Enkai erok. Matoomon pee eitabaya enkipirta Enkai tiatua nkorroki ang, tiatua ilmarei lang, tiatua kanisa, o tiatua iloshon.

**Enkomono e Naapishana:**

“Amu mpang’ipang’a intae aapuo te ng’ida, nerikori intae te seriani; ore lelo doinyio o ndoinyio naatii dukuya intae, nebuaku aaranyisho, ore lelo keek pooki li ong’ata neosh nkaik. Ore erishata nabulu ilkiku naa iltarakua oobulu, ore erishata nabulu endiati naa olchani onyaanyukie olarrashi ore ena to Laitoriani naa kelo aaku entoki nadamuni, olmonekie loo ntarasi lemeiwuang’ieki ae kata.” (Ilkererin 12-13)

Matoomon Enkai pee ebukoki iyiook eng’ida oe seriani neitabaya sii inkisiligat enyena pooki. Ematishipata nikisis te nkaraki inkisiligat Enkai o mbaa enyena enkingasia. Maishoo Enkai enkitoo!

**Shakenisho:**

**SHAKENISHO O LPAYIAN OOMON TE NGUTON**

Ore apa pee aiteru airuk Olaitoriani teina kop Olepishet. Naa erishata apa nagol oleng te nanu. Tenkaraki neton eitu apa eyiolou olosho ororei le Nkai. Kegol sii apa oleng tenkaraki naa kara apa oltung’ani yioloti oleng too Lmaasai neaku kejo ilkumok kaimina apong’ari. Ore te rishata olari le 1988 nairuk nanu tenebo olmarei lai pooki nikinteru te nebo olmusheni le C.M.F. aatum enchula tiabori olchani. Kake ore ebaiki ina kata nemetii hoo oltung’ani obo tenebo nanu. Ore sii apa nemayiolo aisuma Bibilia katukul. Nemayiolo sii ataranyu isinkolioitin. Neaku ore enaas naa kalotu ake tenebo enkitok ai. Nikiomon tenebo

nikintaiki Enkai shakenisho. Kake nanyamalu oleng amu metii iltung'ana kanisa ore eyia naa kaisiling Olaitoriani katukul. Kake naomon Enkai.

Ntokitin uni naa kuna.

1. Pee eiruk emurua pooki Olepishet.
2. Kagira sii apa aomon pee ebulu kanisa negolu sii.
3. Kagira sii apa aomon pee etumi elelero tiatua kanisa aa taa ilng'anayio sidai tiatua kanisa neaku ore amu imayiolo aisuma nemayiolo ataranyu, kake naomon Enkai pee aaretu te nkidimata enye.

Naa ore ebaiki ene rishat netawala Enkai enkomono ai, amu etaasate pooki bae tenena natoomonuo. Meisisi Olaitoriani.

~ nanu James Olormuyei Ole Kijape

### **Osirata Oishiakino Nidamu:**

Isaya 55:1

### **Inkoitoi Naasishoreki:**

Keishiaakino nepuo dukuya iltung'ana le sirit aomonokino olikae olikae pee etum aatubulu tiatua olaitoriani nepuo dukuya aaok te nguton tiatua Ororei le Nkai.

### **Irorei oo Bayie:**

Embolunoto 22:17 "Ejo enkiyang'et o ina siankiki narikori. "Wou!" Nchoo ilo oning ejo, "Wou!" Nchoo ilo oata enkure, elotu, nchoo ilo oyieu eng'amu enkare e mpuaan metii enkinyiang'a."

Metaa ekipuo pooki te nkirukoto o te nkanyit kiyiolo nchere etoning'o Enkai enkomono ang naa kewal sii te nkiputakinoto. Meiputakini iyiook pooki eng'ida o eseriani Olaitoriani.



**Naaigeri:**

---

**Enjurroto:**

**Inkikilikuanat Naaikilikuan Kewan Olaiteng'enani:**

Kebaa erishata naawa agira arreten ena kiteng'ena?

Kaawa erishata aomonoki kewan naomonoki sii ninche te nchula tenkaraki ena kiteng'ena?

Katerretene sa metaa kaidim aiteng'enisho ena kiteng'ena anaa enaishiakino?

Kaji pasa doi aiko peyie eaku aterretene aitobiraki te nkae kisuma alang ena kisuma?

Kakua kirrishat tena kiteng'ena naaretisho oleng nening'unoyu aitobiraki too looiteng'eni? Kainyoo?

Kakua kirrishat tena kisuma naa penyo ake eretisho naa ninche sii naaitaanisho too looiteng'eni? Kainyoo?

Kainyoo aiteng'ene tena kisuma naa kaaret nanu metaa kaidim aterretena enkiteng'ena sidai naning'unoyu teina rishata nemaata enkisuma naitobira naasishore?

Kaidim nanu o lelo kulikae airukok le nchula awaita erishata aomonokino olikae olikae nikiomonoki sii lelo leme lairukok pee etum ayeetu enetii nkariak neokisho?

Kaji aiko nanu tenebo ilkulikae aisiayiak le nkanisa pee kintagol kanisa metoomonoki olikae olikae pee epuonu lelo leme ilairukok aokisho tiatua Ororei le Nkai?

**Emparan:**

Ore elo olaiteng'enani o lelo kulikae aisiaayiak le sirit abaiki lelo kulikae le nchula enye tena wiki, keishiaakino neitagol ninche tiatua enkirukoto enye, nesipaki ninche nchere etoning'o Enkai enkomono e sirit naa kelo awalu. Keishiaa neitagol ilkulikae airukok meishoo Enkai enkisisa te walata nang'amu ninche nepuo dukuya te nkirukoto o te nkanyit eing'oru Enkai tiatua Ororei lenye; eyiolo ajo keyooki aadol ninye.

**Mbaa Naaponaro Naaimakini:**

Eshomo enkerai enetii ng'otonye aing'oru endaa. Kake ore hoo neeta apa ng'otonye esiaai sapuk, neng'as ake apal nejing aji aisho ninye endaa. Neituku asioki entoki nadaare enkerai nepik endaa. Neitoki aipang'e aisho enkerai te boo, kake metii enkerai ine. Neing'oru ng'otonye ninye nelau. Neishoyo endaa aisho ae kerai neshukokino ninye esiaai enye. Neshukunye ina kata ake enaduo kerai e dukuya eing'uaa eneshomo aiguranie neyieu enaduo daa enye. Newaliki ng'otonye ajoki ore te nkaraki eitu duoo eidim ataanyu meishori endaa, eishoyie duo endaa aisho ae kerai. Neaku keishiaa nelo arreshu meidipa esiaai pee etum ashomo aterretena ae daa.

Ore ina kerai neitu eidim ataanyu endaa naikilikuanua naa kemoda. Nejia sii etiu oltung'ani oomon Enkai nemeisiligu ewalata enye nemeanyu. Ejoki iyiook Biblia pee mikiat oing'ash te nikiomon kake pee kiruk Enkai nchere etoning'o iyiook naa

kewaliki. Kitoomono te nebo te nguton kira kanisa.  
Ematashololoto naa pee kitum atang'amu ewalata Enkai nikincho  
ninye enkitoo.

**Naaigeri:**

# Inkipankat Naapaasha Nisumie Bibilia Nalulung'a

**Enkipankata e dukuya:**

**Nisumie Bibilia nalulung'a tiatua ilararin oong'uan**

**Ore jumapili pooki, isuma anaa enasira tiabori:**

Olari le dukuya

Ewiki Isuma:

- 1 Enkiterunoto 1-2, Olkerempe le Nkai 1, Matayo 1
- 2 Enkiterunoto 3-4, Olkerempe le Nkai 2, Matayo 2
- 3 Enkiterunoto 5-6, Olkerempe le Nkai 3, Matayo 3
- 4 Enkiterunoto 7-8, Olkerempe le Nkai 4, Matayo 4
- 5 Enkiterunoto 9-10, Olkerempe le Nkai 5, Matayo 5-7
- 6 Enkiterunoto 11, Olkerempe le Nkai 6, Matayo 8-9
- 7 Enkiterunoto 12-14, Olkerempe le Nkai 7, Matayo 10-11
- 8 Enkiterunoto 15-17, Olkerempe le Nkai 8, Matayo 12-13
- 9 Enkiterunoto 18-20, Olkerempe le Nkai 9, Matayo 14-15
- 10 Enkiterunoto 21-23, Olkerempe le Nkai 10, Matayo 16-17
- 11 Enkiterunoto 24-25, Olkerempe le Nkai 11, Matayo 18-19
- 12 Enkiterunoto 26-28, Olkerempe le Nkai 12, Matayo 20-21
- 13 Enkiterunoto 29-31, Olkerempe le Nkai 13, Matayo 22-23
- 14 Enkiterunoto 32, Olkerempe le Nkai 14, Matayo 24-25
- 15 Enkiterunoto 33-35, Olkerempe le Nkai 15, Matayo 26-27
- 16 Enkiterunoto 36-38, Olkerempe le Nkai 16, Matayo 28
- 17 Enkiterunoto 39-40, Olkerempe le Nkai 17, Iroma 1
- 18 Enkiterunoto 41-42, Olkerempe le Nkai 18, Iroma 2
- 19 Enkiterunoto 43-45, Olkerempe le Nkai 19, Iroma 3
- 20 Enkiterunoto 46-47, Olkerempe le Nkai 20, Iroma 4
- 21 Enkiterunoto 48-50, Olkerempe le Nkai 21, Iroma 5
- 22 Enaidurra 1-4, Olkerempe le Nkai 22, Iroma 6
- 23 Enaidurra 5-8, Olkerempe le Nkai 23, Iroma 7
- 24 Enaidurra 9-12, Olkerempe le Nkai 24, Iroma 8
- 25 Enaidurra 13-16, Olkerempe le Nkai 25, Iroma 9
- 26 Enaidurra 17-20, Olkerempe le Nkai 26, Iroma 10
- 27 Enaidurra 21-24, Olkerempe le Nkai 27, Iroma 11
- 28 Enaidurra 25-28, Olkerempe le Nkai 28, Iroma 12
- 29 Enaidurra 29-32, Olkerempe le Nkai 29, Iroma 13
- 30 Enaidurra 33-36, Olkerempe le Nkai 30, Iroma 14
- 31 Enaidurra 37-40, Olkerempe le Nkai 31, Iroma 15
- 32 Ilawi 1, Olkerempe le Nkai 32, Iroma 16
- 33 Ilawi 2, Olkerempe le Nkai 33, Marko 1
- 34 Ilawi 3, Olkerempe le Nkai 34, Marko 2

## Olari le dukuya

### Ewiki Isuma:

- 35 Ilawi 4, Olkerempe le Nkai 35, Marko 3
- 36 Ilawi 5, Olkerempe le Nkai 36, Marko 4
- 37 Ilawi 6, Olkerempe le Nkai 37, Marko 5
- 38 Ilawi 7, Olkerempe le Nkai 38, Marko 6
- 39 Ilawi 8, Olkerempe le Nkai 39, Marko 7
- 40 Ilawi 9, Olkerempe le Nkai 40, Marko 8
- 41 Ilawi 10, Olkerempe le Nkai 41, Marko 9
- 42 Ilawi 11, Olkerempe le Nkai 42, Marko 10
- 43 Ilawi 12, Olkerempe le Nkai 43, Marko 11
- 44 Ilawi 13, Olkerempe le Nkai 44, Marko 12
- 45 Ilawi 14, Olkerempe le Nkai 45, Marko 13
- 46 Ilawi 15, Olkerempe le Nkai 46, Marko 14
- 47 Ilawi 16, Olkerempe le Nkai 47, Marko 15
- 48 Ilawi 17, Olkerempe le Nkai 48, Marko 16
- 49 Ilawi 18, Olkerempe le Nkai 49, 1 Ilkorintio 1-2
- 50 Ilawi 19, Olkerempe le Nkai 50, 1 Ilkorintio 3-4
- 51 Ilawi 20, Olkerempe le Nkai 51, 1 Ilkorintio 4-5
- 52 Ilawi 21, Olkerempe le Nkai 52, 1 Ilkorintio 6-7

## Olari liare

### Ewiki Isuma:

- 1 Ilawi 22, Olkerempe le Nkai 53, 1 Ilkorintio 8-9
- 2 Ilawi 23, Olkerempe le Nkai 54, 1 Ilkorintio 11-12
- 3 Ilawi 24, Olkerempe le Nkai 55, 1 Ilkorintio 13
- 4 Ilawi 25, Olkerempe le Nkai 56, 1 Ilkorintio 14
- 5 Ilawi 26, Olkerempe le Nkai 57, 1 Ilkorintio 15
- 6 Ilawi 27, Olkerempe le Nkai 58, 1 Ilkorintio 16
- 7 Enkikena 1-4, Olkerempe le Nkai 59, 2 Ilkorintio 1-2
- 8 Enkikena 5-8, Olkerempe le Nkai 60, 2 Ilkorintio 3-4
- 9 Enkikena 9-12, Olkerempe le Nkai 61, 2 Corinthains 5-6
- 10 Enkikena 13-16, Olkerempe le Nkai 62, 2 Ilkorintio 7
- 11 Enkikena 17-20, Olkerempe le Nkai 63, 2 Ilkorintio 8-9
- 12 Enkikena 21-24, Olkerempe le Nkai 64, 2 Ilkorintio 10-11
- 13 Enkikena 25-28, Olkerempe le Nkai 65, 2 Ilkorintio 12-13
- 14 Enkikena 29-32, Olkerempe le Nkai 66, Luka 1
- 15 Enkikena 33-36, Olkerempe le Nkai 67, Luka 2
- 16 Enkigilata oo Nkitanapat 1-3, Olkerempe le Nkai 68, Luka 3
- 17 Enkigilata oo Nkitanapat 4-6, Olkerempe le Nkai 69, Luka 4
- 18 Enkigilata oo Nkitanapat 7-9, Olkerempe le Nkai 70, Luka 5
- 19 Enkigilata oo Nkitanapat 10-12, Olkerempe le Nkai 71, Luka 6

## Olari liare

### Ewiki Isuma:

- 20 Enkigilata oo Nkitanapat 13-15, Olkerempe le Nkai 72, Luka 7
- 21 Enkigilata oo Nkitanapat 16-19, Olkerempe le Nkai 73, Luka 8
- 22 Enkigilata oo Nkitanapat 20-22, Olkerempe le Nkai 74, Luka 9
- 23 Enkigilata oo Nkitanapat 23-25, Olkerempe le Nkai 75, Luka 10
- 24 Enkigilata oo Nkitanapat 26-28, Olkerempe le Nkai 76, Luka 11
- 25 Enkigilata oo Nkitanapat 29-31, Olkerempe le Nkai 77, Luka 12
- 26 Enkigilata oo Nkitanapat 32-34, Olkerempe le Nkai 78, Luka 13
- 27 Yoshua 1-5, Olkerempe le Nkai 79, Luka 14
- 28 Yoshua 6-10, Olkerempe le Nkai 80, Luka 15
- 29 Yoshua 11-15, Olkerempe le Nkai 81, Luka 16
- 30 Yoshua 16-20, Olkerempe le Nkai 82, Luka 17
- 31 Yoshua 21-24, Olkerempe le Nkai 83, Luka 18
- 32 Ilarishak 1-6, Olkerempe le Nkai 84, Luka 19
- 33 Ilarishak 7-11, Olkerempe le Nkai 85, Luka 20
- 34 Ilarishak 12-16, Olkerempe le Nkai 86, Luka 21
- 35 Ilarishak 17-21, Olkerempe le Nkai 87, Luka 22
- 36 Rusi 1-4, Olkerempe le Nkai 88, Luka 23
- 37 1 Samuel 1-5, Olkerempe le Nkai 89, Luka 24
- 38 1 Samuel 6-10, Olkerempe le Nkai 90, Ilgalatia 1-2
- 39 1 Samuel 11-15, Olkerempe le Nkai 91, Ilgalatia 3-4
- 40 1 Samuel 16-20, Olkerempe le Nkai 92, Ilgalatia 5-6
- 41 1 Samuel 21-25, Olkerempe le Nkai 93, Ile Efeso 1-2
- 42 1 Samuel 26-31, Olkerempe le Nkai 94, Ile Efeso 3-4
- 43 2 Samuel 1-4, Olkerempe le Nkai 95, Ile Efeso 5-6
- 44 2 Samuel 5-9, Olkerempe le Nkai 96, Ilfilipi 1-2
- 45 2 Samuel 10-14, Olkerempe le Nkai 97, Ilfilipi 3-4
- 46 2 Samuel 15-19, Olkerempe le Nkai 98, Ilkolosai 1-2
- 47 2 Samuel 20-24, Olkerempe le Nkai 99, Ilkolosai 3-4
- 48 1 Ilaiguanak 1-4, Olkerempe le Nkai 100, Yohana 1
- 49 1 Ilaiguanak 5-9, Olkerempe le Nkai 101, Yohana 2
- 50 1 Ilaiguanak 10-13, Olkerempe le Nkai 102, Yohana 3
- 51 1 Ilaiguanak 14-18, Olkerempe le Nkai 103, Yohana 4
- 52 1 Ilaiguanak 19-22, Olkerempe le Nkai 104, Yohana 5

## Olari liokuni

### Ewiki Isuma:

- 1 2 Ilaiguanak 1-5, Olkerempe le Nkai 105, Yohana 6
- 2 2 Ilaiguanak 6-10, Olkerempe le Nkai 106, Yohana 7
- 3 2 Ilaiguanak 11-15, Olkerempe le Nkai 107, Yohana 8
- 4 2 Ilaiguanak 16-20, Olkerempe le Nkai 108, Yohana 9

## Olari liokuni

### Ewiki Isuma:

- 5 2 Ilaiguanak 21-25, Olkerempe le Nkai 109, Yohana 10
- 6 1 Intepen 1-4, Olkerempe le Nkai 110, Yohana 11
- 7 1 Intepen 5-9, Olkerempe le Nkai 111, Yohana 12
- 8 1 Intepen 10-14, Olkerempe le Nkai 112, Yohana 13
- 9 1 Intepen 15-19, Olkerempe le Nkai 113, Yohana 14
- 10 1 Intepen 20-24, Olkerempe le Nkai 114, Yohana 15
- 11 1 Intepen 25-29, Olkerempe le Nkai 115, Yohana 16
- 12 2 Intepen 1-5, Olkerempe le Nkai 116, Yohana 17
- 13 2 Intepen 6-10, Olkerempe le Nkai 117, Yohana 18
- 14 2 Intepen 11-15, Olkerempe le Nkai 118, Yohana 19
- 15 2 Intepen 16-20, Olkerempe le Nkai 119:1-8, Yohana 20
- 16 2 Intepen 21-24, Olkerempe le Nkai 119:9-16, Yohana 21
- 17 2 Intepen 25-28, Olkerempe le Nkai 119:17-24, 1 IIsesalonike 1-2
- 18 2 Intepen 29-32, Olkerempe le Nkai 119:25-32, 1 IIsesalonike 3
- 19 2 Intepen 33-36, Olkerempe le Nkai 119:33-40, 1 IIsesalonike 4
- 20 Esra 1-5, Olkerempe le Nkai 119:41-48, 1 IIsesalonike 5
- 21 Esra 6-10, Olkerempe le Nkai 119:49-56, 1 IIsesalonike 6
- 22 Nehemia 1-4, Olkerempe le Nkai 119:57-64, 2 IIsesalonike 1-3
- 23 Nehemia 5-9, Olkerempe le Nkai 119:65-72, 1 Timoteo 1-2
- 24 Nehemia 10-13, Olkerempe le Nkai 119:73-80, 1 Timoteo 3-4
- 25 Esta 1-5, Olkerempe le Nkai 119.81-88, 1 Timoteo 5-6
- 26 Esta 6-10, Olkerempe le Nkai 119:89-96, 2 Timoteo 1-2
- 27 Yoab 1-2, Olkerempe le Nkai 119:97-104, 2 Timoteo 3-4
- 28 Yoab 3-4, Olkerempe le Nkai 119:105-112, Tito 1-3
- 29 Yoab 5-6, Olkerempe le Nkai 119:113-120, Filemon
- 30 Yoab 7-8, Olkerempe le Nkai 119:121-128, Ilhebrania 1
- 31 Yoab 9-10, Olkerempe le Nkai 119:129-136, Ilhebrania 2
- 32 Yoab 11-12, Olkerempe le Nkai 119:137-144, Ilhebrania 3
- 33 Yoab 13-14, Olkerempe le Nkai 119:145-152, Ilhebrania 4
- 34 Yoab 15-16, Olkerempe le Nkai 119:153-160, Ilhebrania 5
- 35 Yoab 17-18, Olkerempe le Nkai 119:161-168; Ilhebrania 6
- 36 Yoab 19-20, Olkerempe le Nkai 119:169-176, Ilhebrania 7
- 37 Yoab 21-22, Olkerempe le Nkai 120, Ilhebrania 8
- 38 Yoab 23-24, Olkerempe le Nkai 121, Ilhebrania 9
- 39 Yoab 25-26, Olkerempe le Nkai 122, Ilhebrania 10
- 40 Yoab 27-28, Olkerempe le Nkai 123, Ilhebrania 11
- 41 Yoab 28-29, Olkerempe le Nkai 124, Ilhebrania 12
- 42 Yoab 30-31, Olkerempe le Nkai 125, Ilhebrania 13
- 43 Yoab 32-33, Olkerempe le Nkai 126, Yakobo 1
- 44 Yoab 34-35 Olkerempe le Nkai 127, Yakobo 2

## Olari liokuni

### Ewiki Isuma:

- 45 Yoab 36-37, Olkerempe le Nkai 128, Yakobo 3
- 46 Yoab 38-39, Olkerempe le Nkai 129, Yakobo 4
- 47 Yoab 40-41, Olkerempe le Nkai 130, Yakobo 5
- 48 Olaikooni 1-2, Olkerempe le Nkai 131, 1 Petero 1
- 49 Olaikooni 3-4, Olkerempe le Nkai 132, 1 Petero 2
- 50 Olaikooni 5-6, Olkerempe le Nkai 133, 1 Petero 3
- 51 Olaikooni 7-8, Olkerempe le Nkai 134, 1 Petero 4
- 52 Olaikooni 9-10, Olkerempe le Nkai 135, 1 Petero 5

## Olari liong'uan

### Ewiki Isuma kuna matuan:

- 1 Olaikooni 11-12, Olkerempe le Nkai 136, 2 Petero 1-3
- 2 Isaya 1-6, Olkerempe le Nkai 137, Iasat 1
- 3 Isaya 7-11, Olkerempe le Nkai 138, Iasat 2
- 4 Isaya 12-17, Olkerempe le Nkai 139, Iasat 3
- 5 Isaya 18-22, Olkerempe le Nkai 140, Iasat 4
- 6 Isaya 23-28, Olkerempe le Nkai 141, Iasat 5
- 7 Isaya 29-33, Olkerempe le Nkai 142, Iasat 6
- 8 Isaya 34-39, Olkerempe le Nkai 143, Iasat 7
- 9 Isaya 40-44, Olkerempe le Nkai 144, Iasat 8
- 10 Isaya 45-50, Olkerempe le Nkai 145, Iasat 9
- 11 Isaya 51-55, Olkerempe le Nkai 146, Iasat 10
- 12 Isaya 56-61, Olkerempe le Nkai 147, Iasat 11
- 13 Isaya 62-66, Olkerempe le Nkai 148, Iasat 12
- 14 Yeremia 1-4, Olkerempe le Nkai 149, Iasat 13
- 15 Yeremia 5-8, Olkerempe le Nkai 150, Iasat 14
- 16 Yeremia 9-12, Osinkolio le Solomon 1-2, Iasat 15
- 17 Yeremia 13-16, Osinkolio le Solomon 3-4, Iasat 16
- 18 Yeremia 17-20, Osinkolio le Solomon 5-6, Iasat 17
- 19 Yeremia 21-24, Osinkolio le Solomon 7-8, Iasat 18
- 20 Yeremia 25-28, Nkishirat 1, Iasat 19
- 21 Yeremia 29-32, Nkishirat 2, Iasat 20
- 22 Yeremia 33-36, Nkishirat 3, Iasat 21
- 23 Yeremia 37-40, Nkishirat 4, Iasat 22
- 24 Yeremia 41-44, Nkishirat 5, Iasat 23
- 25 Yeremia 45-48, Ndung'eta e Rashe 1, Iasat 24
- 26 Yeremia 49-52, Ndung'eta e Rashe 2-3, Iasat 25
- 27 Esekiel 1-6, Ndung'eta e Rashe 4-5, Iasat 26
- 28 Esekiel 7-12, Ndung'eta e Rashe 6, Iasat 27
- 29 Esekiel 13-18, Ndung'eta e Rashe 7, Iasat 28



## Olari liong'uan

### Ewiki Isuma kuna matuan:

- 30 Esekiel 19-24, Ndung'eta e Rashe 8-9, 1 Yohana 1
- 31 Esekiel 25-30, Ndung'eta e Rashe 10, 1 Yohana 2
- 32 Esekiel 31-36, Ndung'eta e Rashe 11, 1 Yohana 3
- 33 Esekiel 37-42, Ndung'eta e Rashe 12, 1 Yohana 4
- 34 Esekiel 43-48, Ndung'eta e Rashe 13, 1 Yohana 5
- 35 Daniel 1-4, Ndung'eta e Rashe 14, 2 Yohana
- 36 Daniel 4-8, Ndung'eta e Rashe 15, 3 Yohana
- 37 Daniel 9-12, Ndung'eta e Rashe 16, Yuda
- 38 Hosea 1-7, Ndung'eta e Rashe 17, Embolunoto 1
- 39 Hosea 8-14, Ndung'eta e Rashe 18, Embolunoto 2
- 40 Yoel 1-3, Ndung'eta e Rashe 19, Embolunoto 3
- 41 Amos 1-4, Ndung'eta e Rashe 20, Embolunoto 4
- 42 Amos 5-9, Ndung'eta e Rashe 21, Embolunoto 5
- 43 Obadia, Ndung'eta e Rashe 22, Embolunoto 6
- 44 Yona 1-4, Ndung'eta e Rashe 23, Embolunoto 7-8
- 45 Mika 1-7, Ndung'eta e Rashe 24, Embolunoto 9-10
- 46 Nahum 1-3, Ndung'eta e Rashe 25, Embolunoto 11-12
- 47 Habakuki 1-3, Ndung'eta e Rashe 26, Embolunoto 13-14
- 48 Sefania 1-3, Ndung'eta e Rashe 27, Embolunoto 15-16
- 49 Hagai 1-2, Ndung'eta e Rashe 28, Embolunoto 17-18
- 50 Sakaria 1-7, Ndung'eta e Rashe 29, Embolunoto 19-20
- 51 Sakaria 8-14, Ndung'eta e Rashe 30, Embolunoto 21
- 52 Malaki 1-4, Ndung'eta e Rashe 31, Embolunoto 22

### **Kulie nkipankat:**

#### **2. Nisum Bibilia nalulung'a tiatua ilararin oopishana**

Ore jumapili pooki, isuma imatuan uni arashu ong'uan

#### **3. Nisum Bibilia nalulung'a tiatua ilararin okuni**

Ore jumapili pooki, isuma imatuan naapishana arashu isiet

#### **4. Nisum Bibilia nalulung'a tiatua olari obo ake**

Ore pooki olong, isuma imatuan uni arashu ong'uan, anaake

#### **5. Nisum Bibilia nalulung'a inkatitin are tiatua olari obo ake**

Ore pooki olong, isuma imatuan ile o lpsiai, anaake

**Arashu indim atusuja enkipankata ino.**

**Kake tusuja enkipankata!**

## Kulie Kererin Naaibung to Ltau

### **EASATA**

Enkigilata oo Nkitanapat 30:14  
Ndung'eta e Rashe 20:11  
Yohana 13:17  
Ile Efeso 2:10  
Ilkolosai 3:23  
2 Timoteo 2:15  
Yakobo 1:22  
Yakobo 2:26

### **EJEUNOTO TIATUA KRISTO**

Enkigilata oo Nkitanapat 30:19-20  
Yoab 19:25-27  
Isaya 9:6  
Isaya 53:3-6  
Luka 2:10-11  
Luka 6:40  
Yohana 1:1-4  
Yohana 3:16  
Yohana 14:1-4  
Yohana 17:3  
Iroma 5:8  
Iroma 8:1-2  
Iroma 11:33-36  
Embolunoto 3:20

### **ELIKIOROTO KITOK**

Isaya 52:7  
Matayo 4:19  
Matayo 28:18-20  
Marko 16:15-16

### **EMATUA E TOMON TENEBO**

#### **INKISHOOROT**

Malaki 3:8-10  
1 Ilkorintio 16:1-2  
2 Ilkorintio 9:6-8

### **EMAYIANATA**

Intepen 6:24-26  
Matayo 5:3-11

### **EMPUKUNOTO OO LAIRUKOK**

Ndung'eta e Rashe 3:5-6  
Ndung'eta e Rashe 4:23  
Ndung'eta e Rashe 12:18  
Ndung'eta e Rashe 15:1  
Ndung'eta e Rashe 16:3  
Ndung'eta e Rashe 21:23  
Ndung'eta e Rashe 26:20  
Ndung'eta e Rashe 27:17  
Matayo 11:28-30  
Marko 8:36  
Luka 22:26-27  
Iasat 2:42  
Iroma 8:28  
Iroma 12:1-2  
2 Ilkorintio 5:17  
Ile Efeso 4:2  
Ile Efeso 4:11-13  
Ilfilipi 2:3-4  
Ilfilipi 2:5-11  
Ilfilipi 4:8  
Ilfilipi 4:13  
1 Ilesalonike 5:16-18

### **ENG'OK**

Isaya 53:6  
Iroma 3:23  
Iroma 6:23

### **ENING'ITO OROREI LE NKAI**

Luka 11:28  
Yohana 10:27  
Iroma 10:17  
1 Ilkorintio 1:21  
Embolunoto 1:3

**ENKIBALINOTO NIMBALUNYE****YESU AJO OLAITORIANI**

Matayo 10:32  
Matayo 16:16  
Iroma 10:9-10  
1 Petero 3:15

**ENKIBALINOTO OO NG'OK**

Olkerempe le Nkai 51:3-5  
Yakobo 5:16  
1 Yohana 1:9

**ENKIBATISA**

Iroma 6:2-4  
Ilgalatia 3:27  
Iasat 2:38

**ENKIRRIDUNOTO O****EMPIUNOTO**

Enkigilata oo Nkitanapat 30:6  
Olkerempe le Nkai 51:10-12  
Iasat 3:19

**ENKIRUKOTO**

Luka 17:6  
Ilhebrania 11:6

**ENKISISA**

Olkerempe le Nkai 100:1-5  
Olkerempe le Nkai 107:1  
Olkerempe le Nkai 150:1-6

**ENKISUMATA OROREI LE NKAI**

1 Timoteo 4:13  
2 Timoteo 3:15-17

**ENKOMONO**

Olkerempe le Nkai 19:14  
Olkerempe le Nkai 23:1-6  
Olkerempe le Nkai 27:8  
Olkerempe le Nkai 55:1

**(Enkomono)**

Matayo 6:9b-13  
Iroma 8:26  
Yakobo 1:5  
Yakobo 5:13-18

**ENYORRATA**

1 Ilkorintio 13:1-13  
Ilhebrania 10:24  
1 Yohana 4:7-8

**EMPALIKINOTO**

Ile Efeso 4:32  
1 Petero 3:9

**ILNG'ANAYIO LE NKIYANG'ET****SINYATI**

Ilgalatia 5:22-23

**INKITANAPAT**

Enaidurra 20:2-17  
Enkigilata oo Nkitanapat 5:7-21  
Enkigilata oo Nkitanapat 6:4-5

**INTEMAT**

1 Ilkorintio 10:13  
Yakobo 1:13-15

**OROREI LE NKAI**

Olkerempe le Nkai 119:11  
Olkerempe le Nkai 119:34  
Ndung'eta e Rashe 1:7  
Matayo 4:4  
2 Petero 1:19-21

**OSOTUA TIALO ENDAA O****LAITORIANI**

Olkerempe le Nkai 34:8  
Yohana 6:27  
Yohana 6:53-56  
1 Ilkorintio 11:23-26

## Inkera Einosita Ororei le Nkai



## Ilairukok Einosita Ororei le Nkai

